

Nkalanj ní bwâm míme Yesuε ngáne

Lukasε

átélé

Ndibned ní kálag

Nkalanj ní bwâm míme Yesuε ngáne Lukasε átélé nílúmté Yesuε ngáne Nsoode awě Dyöb dénhōbpē aá mǝlōmē bad bé Israel. Lukasε ahóbé aá Edǝǝdǝnj é Dyöb chǝǝ épwédé Yesuε ǝpεen nkalanj ní bwâm wée betóótōkē bé bad. Mmén nkalanj mbude ahób tǝngene e'bonj bé nlém ǝbe Yesuε ǝlúmtéé bad. A mbooted menyinge ményínnédé ǝde ehǝngé ébídé tǝngene epe éche Yesuε, ményínnéd-te á asóg ǝde Yesuε ǝpúmmé ǝdyöb. Mekan míme Lukasε ákóó awéd ǝte médii: mekáne, Edǝǝdǝnj éche Esáá, mekan míme bebaád bébélé ǝfínté e nsón míme Yesuε ne alagsen ǝde Dyöb ǝlagsanné bad mbéb.

Lukasε abádé mekan ǝte wén míme médé ǝyǝl e mímén nkalanj ní bwâm dǝmpen (Nǝn e'ped é'be ne ntóób á nkabtéd).

Nkabtéd ní kálag

Ndibned 1.1-4

Echyáa éche Jǝne, Ndusεε ne éche Yesuε 1.5-2.52

Nsón míme Jǝne, Ndusεε 3.1-20

Edusen ne mekágsen míme Yesuε 3.21-4.13

Nsón míme Yesuε á Galilia 4.14-9.50

Nsón míme Yesuε ǝde ǝhídté á Galilia ǝpe á Jerusalem 9.51-19.27

E'pun bé asóg ǝbe Yesuε á Jerusalem ne benben ne á Jerusalem 19.28-21.38

Akáad ǝde békáádté Yesuε ne eche kwééd 22-23

Mpuu níme Sánḡwéé, alúmed áde ánlūmēdtē bad yāl ne níme mpume 24.1-53

¹ A-Tiofilos, mod a edúbé, ekud é bad ékétēd póndé átel mekan ásē, níme mébénlédé áfíntē e' syánē.

² Bétélé melemlen ngáne dénwōḡkē wéé bad ábe bényīnēn mó dīd se á mbooted, békálé-'e Eyale é Dyōb.

³ Né-ᵒᵒ, ntóó nímén mekan ahēd áte se á mbooted, nnyíné-'e nén mēé ébóó mēmpē rítēd póndé, rítele wē mekan ásē ahóg-ahógē.

⁴ Nén débēl wééchem mbále t̄nḡene mekan níme émáá abii.

Angel epítéd Sakaria

⁵ A póndé eche Herōde ábédé k̄n e Judeya, mod nhóg ambé bán Sakaria. Sakaria abédéé prise á nchoo níme Abiyaa. Mwaád ambé dīn bán Elisabete. Mó ámpē abédéé nḡon e túmbé eche Ar̄ne.

⁶ Alongé áde bó mwaád dēmbē bwám á'sō é' Dyōb. Béhídé'áá mbéndé éche Sánḡwéé ésyāīl.

⁷ Boḡ bénkēnwáléé mwān ké nhóg áyāle Elisabete abédé ek̄m. Bó bad bébe bēmmād-te achun.

⁸ B̄ᵒᵒ-p̄ᵒᵒ, áde póndé e nsón e nchoo níme beprise níme Sakaria bó épédé áte, ankē nsón níme prise abel á Ndáb-e-Dyōb epun ehóg.

⁹ Mó-'áá bēmpwēdté ás̄l á Ndáb-e-Dyōb ábele Sánḡwéé, áhyáad e'twé, ngáne nsón níme prise r̄hédnádtaa.

¹⁰ Ade áhyāntēé e'twé, ndun e mod embé ámbīd e ebwóg, békānne'.

11 Hê dóo ángel e Sánjú épíídé mó, etyéém mó á ped e ekáá émbáá benben ne menyán mé e'twé.

12 Anyín áde Sakaria anyíné ángel, yǎl enkóm mó áte, mbwóg ménkōb-pe mó bwámbwam.

13 Dóo ángel élanḡeé mó aá, “A-Sakaria, weebáá’. Dyōb áwógé we mekáne. Né-ǎǎ, awōḡ mwaád Elisabete, áchyāā mwǎn. Echuu ane mwǎn dñn wée Jōne.

14 Anén mwǎn áwōḡēd we menyinḡe. Ndun e mod ámpē ēwōḡ menyinḡe é echyāa échē.

15 Ebē nē áyāle ane mwǎn ábē ndale a mod á’sō é’ Sánjú. Eetāḡeneé nēe ámwágkē mīm míme méwag, káa chōm ké échē éwúú áte. Edáádəḡ éche Esáá élon mó áte se á ncháátén.

16 Atiméd bad bé Israel nlém ámbid wée Sánḡwée awē adé ádab Dyōb.

17 Abē á’sō boḡ Sánḡwée ápag. Awōḡ-’e edáádəḡ ne ngíne melemlem ngáne nkal é’dáádəḡ Elaijaa a’bóǎd ánwōḡē. Achéd bad nlém á abum, ábel bad bóǎbe bǎn bétim ásē. Abél bad ábe béwúéné Dyōb nló áte, béhəḡlén, béwōḡ debyéé nēe bad ábe bétyéeme á’sō é’ Dyōb. Né-’aá áboḡsénne epe éche Sánḡwée.”

18 Sakaria ansedéd ángel aá, “Cheé élúmte me nén bán ádén akan áde éhóbé débenléd? Mmēn mmaá achun. Awēm mwaád-te ámpē amaá kōd atóm.”

19 Dóo ángel étimtanné mó aá, “Ndíí Gabriele, mésénze míme mébenle Dyōb nsón. Dyōb álómé me áwōḡ, áláa we mímén nlébtéd mí bwám.

20 Bǎǎb-pǎǎ, ngáne wéédūbpeé dyam áde ríhóbé, wěkwě ebóbé káəḡ ne pónǎde échē mam mésyāəl míme rílanḡé we mélōnnē. Mekan mésyāəl

méβenléd-te á pónδέ echě métəŋgéné abenled.”

21 Ene pónδέ esyəál bad bésíné’áá Sakaria ámbíd ebwóg, bényāgē’ chōm éche ékээ bonj ápē abem á Ndáb-e-Dyöb-te nê.

22 Ade ábíde áwed, eéhele’áá dyamdyam ahób áwāb. Dóo béchéme nén bán, anyíne ndóg á Ndáb-e-Dyöb. Mekáá móo álúmtánáá bó, ésebán ahele dyam ahób.

23 Pónδέ e nsón echě Sakaria emaa’-’áá áte, asú á ndáb.

24 Ámbíd e pónδέ mwaád ambé nkog. Ankoó yəl á ndáb-te á etūn é ngon étáan.

25 Anhób áá “Kóəŋ ne á asóg Səŋgwéé abēnlé me ádén. Awógé me ngəl, ahúde’-ε me e’són áyāl áfínté e ábēm bad.”

Angel epítde Maria

26-27 Adě dyēm áde Elisabete ádíi ngon ntóob, Dyöb dénlōm ángel Gabriēle á dyad á Nazaret, á alonj á Galilia, wée ngondéere póg bán Maria. Maria enkēmbíí’é mwēnchóm. Mod ankií mó awe béchágé’áá bán Josebe. Josebe ámbíd á túmbé echě Kəŋ Dabide.

28 Ade ángel étáne Maria enhób áá, “A-Maria, nsaŋ mbê ne we! Edíi mmwaád awě akudé mende ne Dyöb. Titée Dyöbe adé ne we.”

29 Nén dēntagéd Maria á mewēmtēn-tē bwāmbwam. Akógláádtáá á nlém-tē ábii chōm éche ene nyaa e melēntēn éhele élúmtē’.

30 Dóo ene ángel élāŋgēé mó áá, “A-Maria! Weebáá’, nsimé ní Dyöb níde ne we.

31 Ebii wéeé, móóbē nkog. Wěchyāā mwān a mwēnchóm. Echuu mó đīn wéeé Yesue.

³² Ane mwăn äbē ndāle a mod. Béchǎg mó bán, Mwăn a Dyöb á Ngum. Titée Dyöbe mwěn äbē mó atii dé nkamlen áde sáá ambáá Dabide.

³³ Mó äkamlén abum á ndáb áde Jaköbe á ngíndé ne á ngíndé. Nkamlen míme méewónǎgé asóg.”

³⁴ Héé Maria ásedtéé ángel ne aáken, “Chán níhele nchyáá mwăn áde méebíí’é mwenchóm?”

³⁵ Ene ángel enkwentén mó aá, “Edáádǎn éche Esáá épií wε. Ngum e Dyöb éküdtēn wε. Né-óó, mwăn awě asáá, awě wéchyāā’é, ächǎgnéd bán Mwăn a Dyöb.

³⁶ Bíí wεé, Elisabete, mwănyon a túmbé póg, mómpē adé nkog á e’chun-tê. Mó awě bēnhōbpē bán adé ekom, adé dyēm bōob ngon ntóób.

³⁷ Edé nê áyāle dyamdyam déesaá áde átómé Dyöb áte.”

³⁸ Héé Maria áhóbéé aá, “Ndíí mbaledε awe Sǎngwéé. Ebê ne me ngáne éhóbé.” Dóó ene ángel étédte mó bon ékag.

Maria akii wéé Elisabete

³⁹ Mmê mesú mēn, Maria anlād yāl ne mehél méesyāāl, ákē á dyad á Juda ahóg áde ádé á e’kone-tê.

⁴⁰ Ade ápédé áwed, ansól á ndáb echē Sakaria, álēlēd Elisabete.

⁴¹ Awóg áde Elisabete áwógé Maria míme melentēn, mwăn anhóbnéd Elisabete á abum-tê. Edáádǎn éche Esáá êmpíí mó.

⁴² Dó-’aá álǎngεé Maria ne esaád é ngíne nén aá, “Nnam mbê ne wε átíntê bebaád bésyāāl. Nnam mbê ne mwăn awe wéchyāā’é.

43 Chán ébenlédé éche μεμε níkúdé échén edúbé? Chán nyaá awe Sánḡwéé áhελε áhyε áwêm-é?

44 Awóg áde níwógé níμôη melentεν, mwän ahóbté με yäl á abum-tê ne menyinḡe.

45 Dyöb ánámte we áyāle edúbpé nén weé, dyam áde Sánḡwéé álánḡé we débenléd.”

Ngase echë Maria

46 Ηέε Maria áhóbéé aá,
“Nkémte Sánḡwéé ne nlém níμēm ísyāāl,
47 edāádāη échēm ámpē éwógne Dyöb menyinḡe.

Mó adé awēm mod a e’soósonḡ.

48 Ayāle achemé με awě ndé awe mwă mbāledε ngên. Bootya bōb, áke á’sō, nyongel e bad téé éhōb bán, rídé mmwāád awě Dyöb ánámte.

49 Dyöb á Ngum abēnlé με ndāle a akan. Mó adé ane awě asáá.

50 Ngāl echë ébē nyongel ne nyongel e bad téé, ámīn e kēnzéé awě abage mó edúbé.

51 Abélé ndāle a akan ne éche ekáá chēn. Apuúdtédé bad ábe bédé kúmbε mewēmtεν áte.

52 Ahúdé benkamlεε áwāb metii mé nkamlen, boḡ achágté bad ábe bésúdté yäl.

53 Akódté bad ábe bétagne nzaa ne kase é bwēm, boḡ anané bad ábe bébúdé awóḡ aá bésūε’ ne mekáá mé ngên.

54-55 Akāmténé álóned akag áde ámbéé ábēd betaa, bootya Abrahame ne níμē mbyaa ísyāāl káāḡ ne á ngíndé. Né-ōó, awóḡgéné ábē bembāledε, bad bé Israel.”

⁵⁶ Ambīd e nê, Maria andyεέν Elisabete ngon élaán, bon ásūē' ámbīd.

Echyaá éche Jone Ndusene

⁵⁷ Ambīd e póndé, e'wε é' mwän bénkōb Elisabete. Anchyáá mwän a mwenchóm.

⁵⁸ Túmbé echê ne bad ábe bóbōo bédyéé'áá abwóg ahóg, bénsōntēn nén bán Sánjwéé ábagé mó sánkalaa a nsimé, bómpē béwóg menyinje.

⁵⁹ Mbwε mé asón-á-yäl (ámbīd e e'pun waam) áde béhyédé mwän ayag, behédé'áá mó dīn áde sáá achuu bán Sakaria.

⁶⁰ Dōo nyaá áhóbéé áá, "Aáy! Dīn débēē mó bán Jone."

⁶¹ Héε bétimtanné mó bán, "Modmod eésáá áwonj túmbé-te awé awóó ádé dīn."

⁶² Né-ó bēnhəgtén Sakaria á mekáá mīn áhed áte ngáne ádáá mwän dīn achuu.

⁶³ Héε áhəgténé ne mekáá áá bépiined mó abámbé. Antél áhed áá, "Dīn ádíí mó bán Jone." Anyín áde bad bényíne nê, menyáké mékōb bó.

⁶⁴ Abwōg-ábwōg, ehób énsālē mó á nsəl, ábootéd-te dyam ahób ámpē, ákēmtē-'ε Dyōb.

⁶⁵ Nén dénkōbēd bad bésyāāl ábe bébéde áhed mbwóg, békεené nkalanj hōm ásyāāl á myad mé e'kone á alonj á Judeya.

⁶⁶ Mod téé awé anwóg ádén akan, ankoó dō á nlém-tê. Bésédte bánken, "Ebál é mod éhéé anén mwän ábēē-yēē?" Bésédte'áá nê áyāle bémbīi nén bán Dyōb ádé ne ane mwän.

Ngase echē Sakaria

⁶⁷ Bōob-pōó, Edəédənj éche Esáá émpíi sée mwän, Sakaria. Héε ábóótédé mam ahóbtéd, ahóbé áá,

- 68 “Mekεnag mébê ne Sánḡwéé, Dyöb á bad bé Israel.
Béken Dyöb áyāle ahyedé ábē bad anyen ásē,
akǒdté-’ε bó.
- 69 Akwǒgté ngum a mod á abum á ndáb áde awě
mbəlede Dabide, móochoód syánē.
- 70 Se’ bǒód ansón bekal bé’ dǎádəŋ, alóm bó aá béhób
bán,
- 71 Mǒssoŋ syánē á mekáá mé bad bé ekoyí ábe
syánē, ne bad ábe békós syánē.
- 72 Nê dǒo Dyöb álúmteé ngəl eche ánhī’ é ábēd betaa
akag. Né-’aá ákámtené nímē melě,
- 73 nédē melě níme ámmwēē ne awed sáá ambáá
Abrahamε.
- 74 Anhób aá móōmadté syánē asoŋ á mekáá mé bad
bé ekoyí ábe syánē,
boŋ déhel mó abele ésebán debáa’.
- 75 Deébenlé mó pǒndé eched ne nlém níme rísáá ne
mbeltéd níme rídé ngáne Dyöb áhedéé,
á alongé ádēd ásyāēl.
- 76 Wε-ǒó, a-mwǎn, béchǎḡ wε bán nkal é’ dǎádəŋ
awě Dyöb á Ngum.
Wε-’aá wěsēbē Sánḡwéé á’ sō, áboŋsen mó nzii echě
ábweé áte.
- 77 Wěběl ábē bad bėbíí nén bán, Dyöb áchóŋté bó
áyāle álágséné bó nímab mbéb.
- 78 Nén débenléd áyāle ngəl e Dyöb ne ábē e’boŋ bé
nlém.
Ene ngəl chǒ-’aá ékǎŋ e’nyínen bé ekíde ábě é’bídé
ámīn é’piinéd syánē e’soósoŋ.
- 79 Né-ǒó bad ábe bédé á ehíntén-tê, ne á nsəl rí soŋ,
békūd e’nyínen bé e’kíde.
Syánē-’ε deékūd debyéé áde álúmte syánē nzii echě
epeene alongé dé nsəŋ.”

⁸⁰ Jɔnɛ ankwɔg, edædɔŋ é Dyɔb ébē-’ε mɔ ngine. Andyě é ehyánge káŋ ne á pónde eche ábóódtédé eyale é Dyɔb akal á ntálé wée bad bé Israel.

2

Yesuε achyáádté á Betelhem (Mat 1.18-25)

¹ Mmê mesú-ɔɔ Agɔstusε, Kaisεε a Roma antóméd mbéndé aá, moosyáál awě adé ásē e nímē nkamlɛn, áke átelɛn dɪn.

² Nén démbē tónyé e bad e’só. A pónde eched Kirinuse mɔ ambé nló mé alon á Siria.

³ Mod téé ankě áwē dyad ábel bon bétel mɔ dɪn ásē.

⁴ Né-ɔɔ Josεbe mómpē anhidé á dyad á Nazaret á Galilia, achágé á Betelhem, dyad áde Kâŋ Dabide á Judeya, áyāle ambíd á mbyaa ríme Dabide.

⁵ Ankě nê ábel bétôn bɔ Maria, ngɔndére eche ánkí’é. Maria mɔ-’ε ambé nkog.

⁶ A Betelhem wê dɔ-’aá achád ákóbé Maria.

⁷ Anchyáá mwăn a mwɛnchóm awě átúbné abum. Ankaán mɔ e’pɛd bé mebad, ánāād-ε mɔ á ebwɔg éche bédídtéé e’lém áte, ngáne etál éebédeé á ndáb e beken.

Angel építidé benɔn bé mbód

⁸ Apɛd eched, benɔn bé mbód bɛnóné’áá échāb echon é’ mbód á hóm dé medyé nkuu.

⁹ Angel e Sánjú empií bɔ táléd, ehúmé é Sánjú éləŋnéd bɔ. Mbwóg ménkōb bɔ.

¹⁰ Héε ángel élāŋgeé bɔ aá, “Nyéebáá’, mpiínédé nyé kase e nkalan echě éwōgéd bad bésyāál menyinge bwāmbwam.

11 Nyébii bán, epun é'chii, Nsoode awên achyaáadté á dyad áde Kâη Dabide. Mó adé Ane awé Dyöb Awógté. Mó adé Sâηgwéé.

12 E'chemléd ábe níbagéé nyé é'dii bán, nyéētān mwān awe békāηné e'ped bé mebad ngáne ánánjé á ebwōg éche bédídtéé e'lém áte."

13 Melemlem mé pónde echoη é ángel émbid eníní ángel á nkəg táléd, ékené Dyöb bán,

14 "Ehúmé ébê ne Dyöb áde ádé se ámín, nsaη-
'ε níbê ne baányoη ábe ábágé nsimé á nkōjsé!"

15 Ambid e nê, échê ángel énsū ámín. Héε benən bé mbód bélāηgέé nhóg ne aníní bán, "Syáā dékag á Betelhem, déke dényín ádé akan áde Dyöb á Ngum álúmté syánē áte aá ábénlédé."

16 Dó-'aá békíí á mehélé-te, boη bédíbté Maria bó Joseb ne nkáál ní mwān néε rínánjé á ebwōg éche bédídtéé e'lém áte.

17 Bémáá-'aá anyín nê, dōo bébóótédé nkalan akal ngáne ángel énlāā'é bó tāηgene ane mwān.

18 Bad bésyāēl ábe bēnwōg nê, menyáké ménkōb bó.

19 Maria ankoó nímén mam mésyāēl á nlém-tê, ádolé mó áte.

20 Héε benən bé mbód bétímé ámbid, békēmtē Dyöb, békēné-'ε mó áyāle mam mésyāēl níme bēwógé, boη bényínén-ne dīd nēηgáne bēnlāā'é bó.

21 Ambid e e'pun waam, mbwe níme béyagέé mwān, bēnchuí mó dīn bán Yesue. Adé dīn dōo ángel émmadté mó achəg boη nyaá ābē dyēm.

Béyééné Yesue á Ndáb-e-Dyöb

22 Bōob-pōó, mbéndé e Mosεε ehedáá bán, ámbid e echyáa bébe mendε áwobe nyě mwān bó sée

mwän. Ade bémádé nê, Maria bó Joseb bènkeén mwän á Jerusalem álúmed mós á'sō é' Sánjú.

²³ Bènkě nê nchoo ne ngáne éténlédé á mbéndé e Sánjú bán, Mwän a mwenchóm téé awě bétúbné abum, bébe mós á mekáá mé Dyöb.

²⁴ Bènkě nê kááñe ábe mendε ne álóned mbéndé e Sánjú echě ehóbé bán mod ábe bé élāā bébe káa mbəñgé ésad ébe.

²⁵ A Jerusalem wê, mod ambé bán Simionε. Ane mod anwōñ abé áde atəñgéné á'sō é' Dyöb, ákonjé-ε mbéndé é Dyöb. Edəádəñ éche Esáá émbē ne mós. Asiné'áá pónde echě Dyöb désonjé alongé á bad bé Israel.

²⁶ Edəádəñ éche Esáá émmäd-tε mós alúmed nén áá, éewáá ésebán ányiné Ane awě Sánjwéé Áwógté.

²⁷ Edəádəñ éche Esáá émbəl Simionε ankě á Ndáb-e-Dyöb. Dóo Maria ne Joseb bépééné awab mwän Yesue áhed, ngáne mbéndé éhédé'áá.

²⁸ Simionε ankobén bó mwän, abwáá mós, bonj ákēmtē Dyöb nén áá,

²⁹ “A-Sánjú, ngáne élonťé ádōñ akag, téd-tō mε, řkag ne nsəñ.

³⁰⁻³¹ Ayāle mřd řmēm řnyřné awōñ mod a e'soosōñ awe ébōñséné wεé moosyāál ányřn.

³² Abē e'nyřnen bé ekřde ábe bēbəl bad ábe béesě bad bé Israel ábíi wε, āpéén-ne edúbé wεε ábōñ bad bé Israel.”

³³ Josebe ne Maria bémbě menyáké áwóg mam řmē behóbé təñgεne awab mwän.

³⁴ Héε Simionε ánámťé bó, bonj álāñgē Maria áá, “Nōné', anén mwän awě nyényinėé nén, Dyöb dóo

álómé mós. Abēl bad behóg békud ebébtéd, ábíní-
'ε békūd e'soósouη á alouη á Israel. Abē nēηgáne
e'chemléd é' Dyōb, bou ekud é bad étī mós ámín,
bétāηgān mós.

³⁵ A pón dé eched mod téé míme mbeltéd mēn
mébidēd míme mewēmtēn áwed. Héε ndutul
ésouηgé wε á nlém néε nkwáté.”

³⁶⁻³⁷ Nkal é'daédouη a mmwaád nhóg abédé, dīn
démbe mós bán Anaa, mwān awe Panuεε awē
abíde á túmbé e Aσεε. Anaa anchūn bwāmbwam.
Bós nchóm bēndyεé mwē saámbé á e'wóngé, bou
ályāgē mós akúd káouη ne á móom mé mwé waam
ne mwē níniin. Eésyāηge'aá á Ndáb-e-Dyōb.
Akánné'aá nkuu ne mūte, ádidé-'ε yāl nzaa á
mekáne-tē.

³⁸ Ade Maria bós Joseb bépééné Yesuε á Ndáb-e-
Dyōb pεεnén, Anaa ambé áhed. Héε ábóótédé Dyōb
akēn, ákanlé-'ε bad nkalaη tēηgene ane mwān.
Abē bad bēbédéε bad ábe bésiné'aá pón dé eche
Dyōb déwōbée dyad á Jerusalem. Anláá bós nyaa e
mod echē ane mwān ábēε.

*Joseb é bós Maria bétimné
mwān ámbíd á Nazaret*

³⁹ Ade Maria bós Joseb bémádné mam mésyāēl
ngáne mbéndé e Sāηgú éhédé'aá, bēntīm áwāb
dyad á Nazaret á alouη á Galilia.

⁴⁰ Ene pón dé mwān mós-'ε ákwogé', áwūē' áte,
debyéé ákwogé mós, nsimé ní Dyōb mós-'ε níhīdē mós.

Yesuε akii á Ndáb-e-Dyōb

⁴¹ Bōōb-pōós, émbē bán, mwē téé Yesuε sáá bós nyan
békágé'aá á Jerusalem áyāle Ngande e Nnyíme-
ámín.

42 Ade Yesue ápedé dyôm á mwé ne níbe, bóbō bēnkě á ngande ngáne êmmenténné abé.

43 Ngande emaa'-aá bon nyaá bó sán bésūē' á dyad. Yesue anlyǽg ámbíd á Jerusalem ésebán bēbíí.

44 Mewēmtēn mémbe bó nēn bán, adé á echoŋ éche ésúé'áá. Bon áde békékeé bootya mbwembwe káŋ ne ngukél, dō bēbóótédé mó ahed, bésēdtē mó wēe bad bé túmbé ne bad ábe bóbō bébyééné.

45 Anyín áde béenyíneé mó, bēntīm ámbíd á Jerusalem áhed mó áwed.

46 Alōntēn e'pun é'láán dōo bétímé mó adibed á Ndáb-e-Dyōb. Andyéé átíntē e bemeléede, áwōglān bó, ásedtē-ε bó mam.

47 Mod téé awē anwóg mam míme Yesue áhóbé'áá, ambé menyáké áyāle nsōhtēn míme ánwōŋgē ne nyaa echě ákwéntánnáá bó.

48 Ade nyaá bó sán bényíneé mó, yǽl enkóm bó áte. Dōo nyaá ásedtēé mó aá, "A-mwǎn, chán-nō ébélé sé nēn? Sé sōŋ sēkómé wε ahed, sétagé-ε áte."

49 Bon Yesue ankwentēn bó aá, "Cheé ékáá bon nyéhédé me? Nyénkēmbíí'é bán, ntāŋgéné abé á ndáb echě echem Sāŋ-ε?"

50 Bēnkēnhēnlé dyam áde áhóbé asōhtēn.

51 Ámbíd e nē, dōo Yesue áhídé nyaá bó sán, bon bóbō bésūē' á Nazaret. Enkēnwúénné bó nló áte. Nyaa'-ε ankoó mímēn mekan mésyāēl á nlém-tē.

52 Ngáne Yesue ákwógé'áá, debyéé dōmpē ákwógé'áá mó. Nsimé ní Dyōb ne ní baányōŋ nhídē mó.

*Jone, Ndusene abojsan nzii
(Mat 3.1-12; Mak 1.1-8; Jon 1.19-28)*

¹⁻² A póndé echě nkamlene Tiberiose, ákēbēē Kaisere a Roma áyāle dyōm á mwě ne rítáan, Dyōb dénlōm Jone mwān awe Sakaria ne nlébtéd á ehyánge wée ábédé. Ene póndé-’ε dōo Pontus Payledε mós-’ε ábédé Nkamlene á Judeya, Herode ákamlán alon á Galilia, mwānyan Filibe-’ε ákamlán alon á Ituria ne alon á Trakoniti. Bon Lisania mós-’ε akamlánnáá alon á Abilene. Mmē mesú mēn-naá Anase bó Kaifase bébédé beprise bémbáámbáa.

³ Jone abwágé’áá mebwóg mésyāāl nīme mélónédé edīb é Jodan. Akag ákalé eyale é Dyōb nén áá, “Nyétede Abel dé mbéb, nyékud edusen ábel bon Dyōb álagsen nyé mbéb.”

⁴ Nén dénlōnēd chōm-ée éténlédé á kálag echě nkal é’daádəŋ Yesayaa bán, “Ehánge ébídé á ehyánge bán, nyébojsen epe éche Sán gwée. Nyétii echě nzii.

⁵ Nyélóned nhog té. Nyésuded mbōod ne ekone té. Nyétii mebwóg nīme méhyómé. Nyétaled mebwóg nīme médé pwōgléd pwōgléd.

⁶ Abel bon moonyon asyāal ányīn ngáne Dyōb ásoo’ε alongé á bad.”

⁷ Ndun e mod empě wée Jone béhedé bán, ádusen bó. Mós-’ε ásdétté bó aáken, “Píí é nyě chén! Nzée múmó alánge nyé áá nkáásé í Dyōb ríhúe’ bon aléb-pe nyé áá nyékúme abánge?”

⁸ Nyéchyáa e’pum ábe é’lúmte bán nyétedé Abel dé mbéb, tómaa áhób áwen nlém-té bán, ‘nyédé

bǎn ábe Abrahamε, nyéekudté nkógsen ní Dyöb.'
Boη níláa nyé nén meé, Dyöb áhεle ábenléd nímén
meláá átīméd mó bǎn ábe Abrahamε.

⁹ Bǒǒb-pǒǒ, ehón émáá anaa á nkan ní mel. Né-
ǒǒ, bwel ké é'héé ábe béechyāā' e'pum é' bwām,
békwel bó, bébwém-me bó á muú-te."

¹⁰ Hê dóǒ, bad bésedtεé mó bánken, "Chán-nō
sébenlé bǒǒb?"

¹¹ Jǒne antimtén bó aá, "Mod awě awóó mbóté
ébe, ábe póg wéε ane awě eewóo chǒmchǒm. Ane
awě mó-'ε awóó ndyééd, ákabe bad ábe béewóo."

¹² Belad bé tááε ábe bǒmpē bēnhyǒ edusen akud
bēnsédéd mó bán, "A-melééd, cheé sébenlé?"

¹³ Antimtén bó aá, "Nyéēsanté tááε tómaa
ngáne bétíídé."

¹⁴ Nguse é sánze chǒ-'ε énsédéd mó bánken,
"Chán-náa sé, sébel chán?" Jǒne ankwentén
aá, "Nyéékobné bad mǎné. Nyéebáné-'ε bad
mekan áyāl ngēn, boη nyébê menyinge ne chǒm-εε
nyékudεé née nsábe."

¹⁵ Bǒǒb-pǒǒ, bad ábe bébéde áhed, nímab
mewēmten mēmbootéd achége ne e'lyág bé nlém,
békǒglád á nlém-tê nzé édé bán Jǒne mó adé Ane-
awě-Béwógté.

¹⁶ Héε Jǒne átimtanné bó moosyǎál aá, "Ndusan
nyé bǒǒb ne mendíb, boη mod ahúε' awě atómé
me. Meékwognedéé áhune ké nímē nkǒod mé
metámbé. Ádusén nyé ne Edǎdǎη éche Esáá,
ádusén-ne nyé ne muú.

¹⁷ Awánlé échē epeben á ekáá, ábel nén, ápeb
níme menyán ámīn. Nzé amadé, áład mbum é
bwām áte, ákōō chǒ. Boη áład e'pǎé, ahyáád bó á
ebonde é muú éche éēdīmē'."

18 Né-ɔ́ Jɔne alábé'áá bad ne ekud é póle émpēe, ákanlé-'e bó nkalanj mí bwâm.

19 Jɔne anhób kááñne wée nkamlene Herode aá, abelé mbéb ngáne áwóó Herodyase, mwaád awě mwānyan, nchoo ne e'bébtéd bé mekan bémpēe ábe âmbenlé.

20 Abád-te áyāle nímê mbéb n̄syāāl Herode anhé Jɔne á mbwōg.

Bédúséné Yesue
(Mat 3.13-17; Mak 1.9-11)

21 Bɔɔb-pɔ́, áde Jɔne áamá ekud é bad adusen, Yesue mó ámpē ampě aá ádusen mó. Ade áamá mó adusen, ábwōg-ábwōg ankáné. Ade ákānnéé nê dɔ́ ngob e dyōb énédnédé.

22 Hé-'áá Edáádəñ éche Esáá ébídé ngáne élāā, bonj ésudé mó á nló mín. Ehób chímpē émbíd ádyōb nén, “Edíi awem mwān a nlém awě n̄dáo bwāmbwam. Ndé menyinje ne wε.”

Abum á ndáb áde Yesue
(Mat 1.1-17)

23 Yesue ambé dyam móom mé mwě méláán bonj ábootád míme nsón. Bad bényíné'áá mó née mwān awě Josebe. Josebe ambé mwān awe Eliε. Eliε ambé

24 mwān awe Matate. Matate ambé mwān awe Leviε. Leviε abédé mwān awe Melekyε. Melekyε ambé mwān awe Janne. Janne ambé mwān awe Josebe.

25 Josebe abédé mwān awe Matatya. Matatya ambé mwān awe Amɔse. Amɔse abédé mwān awe Nahumε. Nahumε ambé mwān awe Esilyε. Esilyε ambé mwān awe Nagaya.

26 Nagaya abédé mwān awe Maate. Maate ambé mwān awe Matatya. Matatya ambé mwān awe

Simene. Simene ambé mwăn awe Joseke. Joseke ambé mwăn awe Jodaa.

²⁷ Jodaa abédé mwăn awe Joanane. Joanane ambé mwăn awe Resa. Resa ambé mwăn awe Serubabele. Serubabele ambé mwăn awe Salatyε. Salatyε ambé mwăn awe Nerie.

²⁸ Nerie ambé mwăn awe Melki. Melki ambé mwăn awe Adie. Adie ambé mwăn awe Kosame. Kosame ambé mwăn awe Elamadame. Elamadame ambé mwăn awe Ere.

²⁹ Ere ambé mwăn awe Josua. Josua ambé mwăn awe Elesaa. Elesaa ambé mwăn awe Jorime. Jorime ambé mwăn awe Matate. Matate ambé mwăn awe Leviε.

³⁰ Leviε ambé mwăn awe Simione. Simione ambé mwăn awe Judaa. Judaa ambé mwăn awe Josebe. Josebe ambé mwăn awe Joname. Joname ambé mwăn awe Elyakime.

³¹ Elyakime ambé mwăn awe Meleya. Meleya ambé mwăn awe Mena. Mena ambé mwăn awe Matate. Matate ambé mwăn awe Natanε. Natanε ambé mwăn awe Dabide. Dabide

³² mwăn awe Jese. Jese mwăn awe Obede. Obede ambé mwăn awe Boase. Boase ambé mwăn awe Salmonε. Salmonε ambé mwăn awe Nasonε. Nasonε

³³ ambé mwăn awe Aminadabe. Aminadabe ambé mwăn awe Ademinε. Ademinε ambé mwăn awe Arenie. Arenie ambé mwăn awe Heseone. Heseone ambé mwăn awe Perese. Perese ambé mwăn awe Judaa.

³⁴ Judaa ambé mwăn awe Jakobe. Jakobe ambé mwăn awe Aisige. Aisige ambé mwăn awe Abrahamε. Abrahamε ambé mwăn awe Tera. Tera ambé mwăn awe Nahō. Nahō

³⁵ ambé mwăn awe Seruge. Seruge ambé mwăn

awe Rewεε. Rewεε ambé mwǎn awe Peleγε. Peleγε ambé mwǎn awe Eβεε. Eβεε ambé mwǎn awe Sela. Sela

³⁶ ambé mwǎn awe Kananε. Kananε ambé mwǎn awe Apasadε. Apasadε ambé mwǎn awe Semε. Semε ambé mwǎn awe Noa. Noa ambé mwǎn awe Lamεκε.

³⁷ Lamεκε ambé mwǎn awe Metusεla. Metusεla ambé mwǎn awe Hεnεκε. Hεnεκε ambé mwǎn awe Jarεde. Jarεde ambé mwǎn awe Mehalελε. Mehalελε ambé mwǎn awe Kenanε. Kenanε

³⁸ ambé mwǎn awe Enosε. Enosε ambé mwǎn awe Seta. Seta abédé mwǎn awe Adame. Adame-ε abédé mwǎn a Dyöb.

4

Satanε akəgé Yesue

(Mat 4.1-11; Mak 1.12-13)

¹ Bəəb-pəó, áde Yesue abidé á edíb é Jodan, anlón ne Edəádəŋ éche Esáá. Entimén mó á ehyánge.

² Andyεé áwed móom mé e’pun méniin, Devəle ákəgé mó. Mmé mesú mésyāāl enkēndyáá chōmchōm. Ambíd e né-óó nzaa ewagáá mó.

³ Dóó Devəle álāngeé mó aá, “Nzé wε-εé edé Mwǎn a Dyöb, kamlén ádén aláá wεé, átim ewele.”

⁴ Yesue antimtén mó aá, “Eténlédé á kálag e Dyöb nén bán, ‘Saké ndyééd chēmpen edide moonyon á alongé.’ ”

⁵ Hée Devəle ákééné mó á ekone mín, álūmtē mó melonj mé nkōnsé mésyāāl áyāle mwǎ esonj é pónde.

⁶ Dóó álāngeé mó aá, “Nəné’, bébágé me nkamlen ámin e ábén bwēm é’syāāl. Nwóó-ε kunze áβε mod ké ahée awe rídáá abε. Měbě wε mó.

7 Né-ɔ́ nze ebagé me edúbé, né wée ewóó ábén bwēm é'syā́l."

8 Yesue antimtén mó aá "Eténlédé nén bán, 'Ebwógke' Sǎngwéé ádon Dyöb mebóbón, ébage-'ε mó edúbé.

Mwēnpēn-naá étǎngéné abele.' "

9 Héε Satane ákééné Yesue á Jerusalem. Atyēēmān mó á nzoŋge e Ndáb-e-Dyöb mín, boŋ álāngē mó aá, "Nzé wε-εé edé mwān a Dyöb, éheb á bwεle-mín hén, éhūn á ndɔɔb.

10 Eténlédé á kálag e Dyöb nén bán, 'Dyöb dékamlén éche ángel ásb wε,'

11 'épēm-me wε ámīn, ábel nén weébōmē ekuu á aláá.' "

12 Yesue-'ε antimtén mó aá, "Kálag e Dyöb ehóbe nén aá,

'Weékāgē Sǎngwéé, ádon Dyöb áte.' "

13 Devāle amaá-'aá mó akāg áte menzii mésyā́l, boŋ áhidte', áhāg mó mwǎ etál.

*Yesue aboótédé nsón á Galilia
(Mat 4.12-17; Mak 1.14-15)*

14 Yesue antīm ámbíd á Galilia. Edáádəŋ éche Esáá émbē ne mó, dīn dó-'ε ákanlád mó mbwóg áte ésyā́l.

15 Ayágté'áá bad áwab ndáb é mekáne, moosyā́l ákēmtē mó.

*Bad bé Nazaret béekobéé Yesue
(Mat 13.53-58; Mak 6.1-6)*

16 Ade ápedé á Nazaret wée ákwógé, ansól á ndáb e mekáne á Mbwe-mé-nkóme-áte, ngáne ámmēténné abel. Dóó átyéémé ámīn, álán eped.

17 Bémbě mọ nhíbe rí kálag é metelag níme nkal é'daádəŋ Yesayaa. Anhuné chọ áte, ákūnē eped éche éhóbe nén bán,

18 “Edaádəŋ éche Sánḡwéé édé ne me, áyāle Dyōb ápwédé me aá, níbel eháŋgé é nkalan ní bwām wée betóótōkē bé bad.

Alómné me eháŋgé aá, bad ábe bédé á mehanḡé, béhide á mehanḡé,

aá, bad ábe békwédé ndím, bényīnēn

aá, bad ábē békude metuné á mekáá mé baáb, nhúd bọ á metuné-te

19 aá níbel-le eháŋgé nén meé pónidé epedé echē Dyōb álūmtéé bad ngəl.”

20 Amaá-aá alán, ádib kálag áte, ábag chọ ámbīd wée mod awē anəne ndáb e mekáne. Ankě ádyēē ásē, mīd mésyāəl ménəné mọ.

21 Dóo álánḡéé bọ aá, “Echén eped éche nyéwógé, éloné epun é'chii.”

22 Moosyāəl ankéméd mọ, menyáké mékób bọ áyāle kase e póle echē ebídáá mọ á nsəl, bésedté bánken, “Kíné saá mwän awē Josebe mọ nén-ε?”

23 Yesue ambád bọ aláa aá, “Mbíí meé, nyéēkalé me ngan bán, ‘A mod a bwel, choód yəl.’ Nyéēlāā-ε me bán, mekan níme nyéwógé bán mbélé á dyad á Kapenahum bán, níbel-láa mọ áwēm dyad-tē hén.”

24 “Nlāa nyé nén meé, nkal é'daádəŋ eewóó'é edúbé áwē dyad.

25 Nyébii-óó nén bán, á pónidé eche Elaijaa, mbúú eechódéé áyāle mwē nílāán ne eped. Nē dēmbēl sánkalaa a nzaa ambé alon áte ásyāəl. Bekúd híin bémbē á mbwóg e Israel hén ene pónidé.

26 Boŋ Dyöb dénkênlómme Elaijaa áwāb. Anlóm mó dāsō á alonj á Sidon á dyad á Sarefa wéε nkúd a mmwaád ampée.

27 A pónde echē nkal é'dəádəŋ Elisha ámpē ndun e mod e meləŋ embé á Israel. Boŋ Elisha enkēnsáádté mod a meləŋ ké nhóg awě ambíd á alonj á Israel. Namanε, mod awě ambíd á alonj á Siria móó ánsáádtē.”

28 Ade bad ábe bémbē á ndáb e mekáne béwógé-ε nē, ekaŋ énkōb bó áte.

29 Héε bépádté ásē, béhé mó abum ámīn, békēēn mó á asóg á dyad. Ngáne bénlōŋgē á ekone mīn, bēntimén mó á mbám mé ekone ábēl bétined mó á ekone sé.

30 Boŋ ansam bó áfīntē, ákē-ε mó.

*Mod awě edəádəŋ é mbéb émbēε áte
(Mak 1.21-28)*

31 Yesuε ansyógé á dyad á Kapenahum á mbwóg e Galilia, ábootéd ayáged á mbwε-mé-nkóme-áte.

32 Nyaa eche áyágté'áá enkóméd bad yǎl áte bwāmbwam áyāle ábē e'yale bémbē ngíne.

33 A ndáb e mekáne wéε áyágté'áá, mod ambé awě edəádəŋ é mbéb ékámlánáá. Héε ábóótédé abón áá,

34 “Bób! A-Yesu, mod a Nazaret, cheé syánē déwónné? Ehyedé sé awúu-yε? Mbíí wε bwām. Edfí mod awě Dyöb álómé, awě asáá.”

35 Dóó Yesuε ákánné échē edəádəŋ é mbéb áte áá, “Lám, bíd ane mod áte!” Héε ébómé ane mod ásē áfīntē bad, boŋ ébidē mó á yǎl, ésebán élógné mó.

36 Menyáké ménkōb moosyáál, bésēdtē nhóg ne aníní bánken, “Nyaa e nhóbtéd ehéé nēn-ē? Chán

mod ákamlánné e'dáádəŋ bé mbéb ne kúmbe esyáál, é'wōgnē-'ε mó?"

³⁷ Dīn dēnkě mó mbwóg áte esyáál áyāle mekan míme ábélé'áá.

*Yesue achōŋtė ekud é bad
(Mat 8.14-17; Mak 1.29-34)*

³⁸ Ade Yesue áhídté á ndáb e mekáne, ankě á ndáb wéε Simōne. Antán néε Simōne mwaád nyaá ákonléé, ahéb ámbáá dēnsog mó. Bēnchāŋ Yesue bán, ádid mó bwām.

³⁹ Dóo Yesue ásídté mó á nkəg, awúlén ásē, aláá ahéb áded aá, áte de mó. Abwōg-ábwōg ahéb dēmmaá mó á yǎl, ásyāē ásē, ákōb-pe bó nken.

⁴⁰ Βοοb-ποό, áde enyεn ébóótédé asud, bad bésyāál ábe bēnwōŋ bad bé nkole ábe békónlé'áá nkole nyaa ne nyaa bēmpεén bó áwē. Ambán nhóg téé ekáá ámīn, ádidé bó bwām.

⁴¹ E'dáádəŋ bé mbéb bómpē é'bidē ekud é bad á yǎl, é'bōnē' bán, "Edii mwǎn a Dyōb!" Ankáné bó áte, eémwage'aá-'ε aá bēhōb akan, áyāle bémbíi bán, adii Ane awē Dyōb Áwógté.

*Yesue akalé nkalanj mí bwām
á ndáb é mekáne é bad bé Israel
(Mak 1.35-39)*

⁴² Mbwεmbwε pírib, Yesue ansyáá á dyad-tē, ákē á ahánge á hōm. Bad bēmbootéd mó ahed. Ade bédíbté mó, bēnkēnháá mó etál áke hōm.

⁴³ Dóo álángeé bó aá, "Ntángeéné ake á myad mémpēe, ábel nén níláa bómpē nkalanj mí bwām tēngene nkamlen ní Dyōb. Mmén nkalanj mós níkáó boŋ Dyōb álōmē με."

44 Né-ṓ akalé'áá nkalanj ní bwâm á ndáb é mekáne é mbwóg é Judeya.

5

*Yesue apwéde bembapεε
(Mat 4.18-22; Mak 1.16-20)*

¹ Mbwe nhóg Yesue antyéém á nkin mé edib é Genesarεt. Bad bēnləɲéd mós áwóg eyale é Dyöb.

² Héε ányíné bétəɲgé myžle méβε á nkin. Bekób-bé-súu bēnkēmbáá áwēd-te. Bėwópé'áá échab mbínzé.

³ Dósó ásólé á bžle ábe Siməne, aláá mós aá, ásyəɲned mós á nkin. Adyεé-'áá á bžle-tē, boɲ ábootéd bad ayáged.

⁴ Ade ámadé nē, anláá Siməne aá, “Kéén bžle wée ndib édíí, boɲ nyébwēm mbínzé.”

⁵ Siməne antimtén mós aá, “A-Sáɲ, sėkébwēm mbínzé nkuu nsyāəl, séėkōbē chōmchōm! Boɲ mēbēl ngáne éhóbé.”

⁶ Dósó bėbwémé mbínzé. Bėnkōb ndun e súu káəɲ mbínzé éhape'.

⁷ Bėnlēbē baáb ábe bėbédé á bžle ábíníí bán béhyε bėwōɲgen bó. Ade baáb bėpédé, myžle mésyāəl méβε ménlōn ne súu káəɲ mébootéd asú ásē.

⁸ Ade Siməne Petro ányíné nē, ankwε Yesue á mekuu, áhōbē aá, “A Sáɲgú, sōn! Syəə wée ndíí ayāle ndii mbelé-mbėb.”

⁹ Siməne anhób nē áyāle émbē bóəbe baáb menyáké bwāmbwam ányín ndun e súu eche bėkóbé.

¹⁰ Menyáké ménkōb káəɲne Jemse bó Jəɲ, bán ábe Zebediε, ábe bėmbē á echoɲ é akób á súu.

Héε Yesue álângeé Simone aá, “Weebáá’. Bootya chii nyéētēdē bad nlém á abum áhíd me.” ¹¹ Ade bépééné nímab myóle á nkin, bēntēdé chōm ésyā́l áhed, bébootéd-tē Yesue ahíd.

*Yesue achōjté mod awě meləḡ mékóbé
(Mat 8.1-4; Mak 1.40-45)*

¹² Mbwe nhóg Yesue abédé dyad ahóg. Mod awě meləḡ mékóbé yál esyā́l ampě áwē. Anyín áde ányíné Yesue, ankwε mó á mekuu, áchā́a mó aá, “A-Sán, nzé edə́ə ehεle ébēl me nsánj.”

¹³ Dóo Yesue ábídté ekáá, ábānē mó á yál bonj álāḡgē mó aá, “Ndə́ə, sánj!” Abwōg-ábwōg nímé meləḡ mēmmaá ane mod á yál.

¹⁴ Yesue anláá mó aá, eelāḡgé modmod, aláá-’ε mó aá, “Kǎg élúmed yál wée prise, ásimen wε. Ebag-ke mende ngáne mbéndé e Mosεε éhεdεé álúmed bad wεé mósā́a.”

¹⁵ Ké nēḡgáne Yesue ánkāḡgē mó aá eelāḡgé mod, dīn démbē ákag mó mbwóg áte esyā́l áyā́le nímē mbeltéd. Nē démbēl ndun e mod éladné mó á nkəḡ, áwóg chōm éche áhóbεé, ne ábεl ádid bó bwām.

¹⁶ Bonj nzé pónDé empě mó, ayōgké’áá atim á ahéḡgé, ákáne.

*Yesue achōjté mod awě awédé epεd
(Mat 9.1-8; Mak 2.1-12)*

¹⁷ Mbwe nhóg ampē Yesue ayógté’áá bad. Be-farisia ne bemeléede bé mbéndé bémbē áhed. Bémbīd dyad ne dyad téé á mbwóg é Galilia ne Judeya, kááḡne á Jerusalem. Ngum e Dyōb empīí mó, ádid bad bé nkole bwām.

18 Dó-'áá bad behóg béπεεεέ mod á mekále m̄n awě awédé eπεd. Béhéde'áá nzii echě bésōnléé mó á ndáb-te, ânaad mó á'sō-te wée Yesue.

19 Bénkēnkudté etál áyāle ndun e mod enlón áhed. Dóo béchágké á ndáb m̄n. Dóo bénédte n̄n̄, bésudéd ane mod bóobe mekále á etále-té á'sō-te wée Yesue.

20 Ade Yesue ányíné adúbe ádě ábe bad béwóó áte anláá ane mod awě awédé eπεd áá, “Amúē, nlagséné wε mbéb.”

21 Dóo bemeléede bé mbéndé ne Befarisia bébóótédé anyoo áte bánken, “Ebál é mod éhéé ésyáa Dyōb nén? Nzéé ahēle se álagsén mbéb ésebán Dyōb dēmpen?”

22 Yesue anchem bó mewēmtēn áte. Héε ásedtēé bó aáken, “Cheé ékáá boη nyéwōō' enén ndín e mewēmtēn?”

23 Ahéé adé dyam ásad, áhób wεé, ‘Nlagséné wε mbéb,’ káa áhób wεé, ‘Syáá ásē, ébooted akε?’

24 Boη mēlūmēd nyé mεé, Mwān-a-Moonyoη awóó kunze álagsen mbéb á nkōjsé.” Héε álāngéé ane mod awě awédé eπεd áá, “Nlānge wε nén mεé, syáá ásē, étēd nímōη mekále, ésúε' á ndáb.”

25 Abwōg-ábwōg ane mod anhidé ásē áfinté e bad, atéd nímē mekále, ásūē-'ε mó á ndáb, ákag ákēmtē Dyōb.

26 Menyáké ménkōb moosyáál awě ambé áhed. Héε bébóótédé Dyōb akēn ne mbwóg áte bán, “Sényíné akan dé menyáké chii nén.”

*Yesue achénlé Levié
(Mat 9.9-13; Mak 2.13-17)*

27 Ambid e nê Yesue ansyáá áhed. Ade ákagké nê, annyín nsaad-a-tááse nhóg bán Levié. Levié

andyé áse á ndáb echê ákóbáá tááse áte. Héε Yesuε ál̄ngéé mó n̄n aá, “Hídé mε.”

²⁸ Dóo Leviε átyéémé ám̄n, áchēnē chōm ésyā̄l áh̄idē-’ε mó.

²⁹ Bōōb-pōó, Leviε anchăg sán̄kalaa a ngande áwe ndáb á d̄n̄ áde Yesuε. Besaad bé tááse híin ne bad bémp̄ē bémbē áhed.

³⁰ Héε Befarisia ne ábāb bemeléede bé mbéndé bén̄yongéé áte wéε Yesuε ábē bembapεε, bésēdtē bó bánken, “Cheé ékáá bon̄ nyáābe besaad bé tááse ne bebel bé mbéb bémp̄ē nyédyāg ndyééd, nyé mwāg-ke m̄m hōm ahóg?”

³¹ Yesuε antimtén bó ne ngan aá, “Bad ábe bédyéé bwām béetógn̄n̄é mod-a-bwel. Bad ábe békonle’ bōó bétógn̄né mod a bwel.

³² Nyéb̄ii n̄n bán, meépedéé ách̄le bad ábe békóbn̄dé á’sō é’ Dyōb, bon̄ mpedé ách̄le bebel bé mbéb m̄é bésōg mbéb abel.”

*Nsēdtéd t̄ngene
adid á ȳl̄ n̄zaa á mekáne-tē
(Mat 9.14-17; Mak 2.18-22)*

³³ Befarisia bémbād ahób bán, “Bembapεε ábe Jonε béménténé ȳl̄ n̄zaa adid á mekáne-tē. Melemlem né-’aá Befarisia ábāb bembapεε bómp̄ē bébeléé. Cheé ékáá bon̄ ábōn̄ bédyāg ndyééd, bémwāg-ke m̄m?”

³⁴ Yesuε ankwentén bó ne ngan aá, “Chán bad ábe bélébpé á ngande e e’wōngé béhele bédidé ȳl̄ n̄zaa á mekáne-tē áde mod awé akude sómbé ád̄ii adé ne bó?”

³⁵ Bon̄ epun ép̄é éche békobénné bó mod awé akude sómbé. Echê epun dóo bédidté ȳl̄ n̄zaa á mekáne-tē.”

³⁶ Yesue anláá bó ngan aá, nzé mod ahóbe aá, mónabpe' mbóté, eeséléé eped é abad áyāle mbóté ekóólé bon ánabnáád mbóté e nchun. Nzé abelé nê, né asalé mbóté ekóólé. Ké eped ékōōlē-ε éetāngánné ne mbóté e nchun.

³⁷ Melemlem nêngáne mod éētēdēē mīm mékōōlē se ahé mó á nchun mé ntyág, se ápen. Ayāle nzé abelé nê, né mīm méhōd káān ntyág rýéd, mīm mémād asyoge, ntyág-ke ámpē mbéb.

³⁸ Bétāngéné béhé mīm mékōōlē á apom dékōōlē.

³⁹ Bad ábe bó-ε bémwāg mīm, béemaá'é mīm mé nchun amwé se béhéde mékōōlē. Bébele béhób bán, "Saá mé nchun móō mébōó-ye?"

6

Nsedté tāngene abel dé nsón á mbwε-mé-nkóme-áte (Mat 12.1-8; Mak 2.23-28)

¹ Mbwε nhóg Yesue ne ábē bembapεε bétómé'áá á nzag e ngun-tê. Nén démbē á mbwε-mé-nkóme-áte. Ábē bembapεε bēmbootéd e'sóg é' ngun apád, bépāgke', bedyág.

² Nguse é Befarisia bényiné-'áá nê, bon bésedté bó bánken, "Cheé ékás bon nyébelé akan áde mbéndé éebagéé kunze ábel á mbwε-mé-nkóme-áte?"

³ Héε Yesue mó-ε ásedtéé bó aáken, "Nédē nyéeláá'é á kálag e Dyōb dyam áde kān Dabide āmbenlé áde nzaa ékóbé mó ne ábē bad-ε?"

⁴ Ansól á Ndáb-e-Dyōb mó ne bad ábe bēnwoón mó, atéd e'wεle ábe é'bédé ndε e Dyōb, adyé. Bon echéd mbéndé éebagéé mod ké nhóg kunze

ádyē ábê e'wale étōméé prisε. Mwën andyé, ábē-'ε kááηne bad ábe bénwoón mó donge."

⁵ Yesuε ambádé bó áte aá, "Mwǎn-a-Moonyon awóó nkamlεn kááηne ámīn e mbwε-mé-nkóme-áte."

*Yesuε achōjté mod awě ekáá éwédé
(Mat 12.9-14; Mak 3.1-6)*

⁶ Epun émpēe Yesuε ankě á ndáb e mekáne. Ambootéd bad ayáged. Nén ámpē démbē á mbwε-mé-nkóme-áte. Mod nhóg-ke ambé áhed awě ekáá émbáá éwédé.

⁷ Bemeléede bé mbéndé ne Befarisia bénóné'áá mó chodchod, ányín nzé áđđd ane mod bwám á mbwε-mé-nkóme-áte, ábel nén békóben mó awusé.

⁸ Yesuε mó-'ε anchēm bó mewēmtεn áte. Héε Yesuε álângeé ane mod aá, "Hyé étyéem áfínté hén." Ane mod anwógén mó.

⁹ Dóó Yesuε ásedtéé bad aá, "Nyéláa me ké édé mbéndé ábel mbon á mbwε-mé-nkóme-áte, káa ábel mbéb. Edé mbéndé áson alongé á mod, káa áwúu mó?"

¹⁰ Ahóbe nê, anone-'ε bad á mesó. Dóó álângeé ane mod aá, "Sálé ekáá áte." Asále áde ane mod ásánlé ekáá áte, ekáá éndyéé mó bwám ámpē.

¹¹ Nén dénkóbéd Befarisia ne bemeléede bé mbéndé ekan áte, béhǎgké mó ápid mó mekáá.

*Yesuε apwedé bembapεε bé
nlomag dyôm ne bébe*

(Mat 10.1-4; Mak 3.13-19)

¹² Ambīd e pónđé Yesuε ankě á ekone mín ákáne. Ankáné nkuu nsyā́l kááη ne mbwεmbwε.

¹³ Bon áde bīn é'kénlé, anchélé ábē bembapεε, ápwedé dyôm ne bébe áwab fínté, áchǎgé bó aá,

bembapεε bé nlómag. Abê bembapεε bé nlómag
bébédéε,

¹⁴ Simōνε awe âmbagké dñn aá, Petro, bó
mwānyaη Andreyā, Simōνε, Jakōβε, Jōνε, Filibe,
Batolomyo,

¹⁵ Matyo, Tōmasε, Jemσε mwān awě Alfōσε,
Simōνε mod a kán,

¹⁶ Judasε, mwān awě Jemσε ne Judas Iskariōδε
awě antīm Yesue asóm.

*Yesue ayágté, achōhté-'ε ndun e mod
(Mat 4.23-25)*

¹⁷ Dóo bóobe bembapεε bésyógké á ekone sé,
bépag á hōm áde átánlé. Béntān bembapεε
bémpēε híin ne ndun e mod áhed. Ene ndun
e mod embíd á mbwóg e Judeya-tê esyāól, á
Jerusalem, káηne á myad mé Tirε ne Sidōn á nkin
mé edíb é nkŵě.

¹⁸ Bēmpě nê âwóg Yesue eche póle, ne âbel nén
ádid bad ábe békonle bwām. Adidé'áá bad ábe
edāádāη bé mbéb é'tágté'áá bómpē bwām.

¹⁹ Mod téé ahedáá aá mó nsidtén mó ngáne émbēē
bán, ngíne ebídé'áá mó á yǎl echě edidé'áá bad
bwām.

*Mekan mé nnam ne mé medim
(Mat 5.1-12)*

²⁰ Hēε ábóótédé ábē bembapεε akalēn aá,
“Nnam míbê ne nyé betóótōkē bé bad áyāle nyédé
ásē e nkamlēn rí Dyōb.

²¹ Nnam míbê ne nyé ábe nyédé nzaa bōob, áyāle
Dyōb dékōdēd nyé.

Nnam míbê ne nyé ábe nyélebe bōob áyāle nyéēwōó.

22 Nnam níbê ne nyé nzé édé bán ngáne nyéhídéé Mwän-a-Moonyon, bad békóó nyé, bébáa nyé á yäl, bésyáa nyé, béchäge-'ε nyé mñn mé mbéb.

23 Nyéwóge bwám, nyébwεεν ámñn mímê mbwε, áyāle nsábe míme nyékudté ádyōb níchábé ámñn. Melemlem nê dáo besáá bê' bód bómpe bésyáá'áá bekal bé'dáádəŋ.

24 Boŋ édé ngəl ne nyé ábe nyédé nhən, áyāle nyémaá echēn ndε akud.

25 Edé ngəl ne nyé ábe nyékódé bəəb, áyāle pónde ɛpě echē nyétaké nzaa.

Edé ngəl ne nyé ábe nyéwəə bəəb, áyāle nyéēlēb, nyéchi-'ε.

26 Edé ngəl ne nyé nzé moosyáál ákəmte nyé. Nê dáo ábāb besáá békémtáá bekal bé'dáádəŋ bé metóm.

Nyédəŋ bad ábe békóó nyé

(Mat 5.38-48, 7.12a)

27 “Boŋ nlänge nyé ábe nyéwóglan mε hén bəəb mée, nyédəŋ bad ábe béhede nyé kəkəə, nyébenle-'ε bad ábe békóó nyé mboŋ.

28 Nyénamed bad ábe bésyāntad nyé, nyékānnad-tε bad ábe bébele nyé nhel mé mekan.

29 Nzé mod abəmé wε abén á akəg, ékunnéd mó ádíníí ámpē. Nzé mod akōbné wε nímdōŋ nkobe, weebāŋné mó ké echoŋ sôte.

30 Kénzée awě achómé wε chōm, bεé mó. Mod ké ahée-'ε awě adumné wε bwēm, weéhēdné mó bó ámbíd.

31 Kéchée éche édáá wεé bad bébel áwōŋ, ébel chó áwāb.

32 “Nzé nyédəə bad ábe bédáá nyé bēnpεn, né mekεnag méhéé nyékudté ne nê? Káəŋne bebel bé mbéb bómpe bédəə bad ábe bédáá bó.

³³ Nzé nyêbele mbonj dásō wée bad ábe bébenle nyé mbonj bēnpen, né nsyóŋ ríhée nyékudté ne nê? Káŋne bebel bé mbéb bómpē bébele nê.

³⁴ Nzé édé nén bán bad ábe nyélyágé nlém bán bómpē bébāl nyé bwēm bēnpen bóo nyébáleé bwēm, né nsyóŋ ríhée nyékudté ne nê. Ké bebel bé mbéb bébále baáb ngáne búbí bán bómpē bébāl bó melemlem.

³⁵ Bonj nyédan bad ábe béhede nyé kəkə, nyébenle-’ε bó mbonj. Nyébále-’ε bad bwēm ésebán nyésine dyamdyam ámbíd e nê. Nê débēl Dyōb ábe nyé nsábe míme ríchábé á mín, nyéchəgnéd-tε bán, bán bé Dyōb á Ngum. Nyébíi-’ε bán, Dyōb ádé ngol ne bad ábe béēsāgnān Dyōb, ne ábe bébébé nlém.

³⁶ Nyéwōŋ nlém rí ngol melemlem ngáne awên Titée áwóó nlém rí ngol.

*Nyaa echě bad bébidté mbaku
(Mat 7.1-5)*

³⁷ “Nyéekáádté bad, bonj Dyōb dómpē déēkāádtē nyé. Nyéehóbé bad, bonj Dyōb dómpē déēhōbē nyé. Nyélagsan bad bonj Dyōb dómpē álagsan nyé.

³⁸ Nyébage bad, bonj Dyōb dómpē ábage nyé. Akab áde nyékudté, békīn dó, bépuméd-tε dó ámīn, káŋ asyogke, bonj bépémtéd nyé. Melemlem mé nhəgtéd míme ébenléde móo Dyōb dómpē débēnlédte.”

³⁹ Yesue ankalé bó ngan aáken, “Mod awě akwedé ndím ahēle alyágéd waáb mod a ndím-ε? Bó bad bébe béehúnné ebíi-yε?

⁴⁰ Mwän-a-ayáge eetóméé mod awě ayágte mó, bonj kénzéé awě amadé ayáge áte, abelé abé ndágke eche awe meléede.

41 “Cheé ékáá bonj éwāmsān mwă púuted anyín á d̄id á w̄ñ, ésebán ehēle nkɔg míme níde emōŋ á d̄id anyín?

42 Chán éhēle-se eláá mwănyonj wεé, ‘Amúē, mwě, nh̄úd wε mwă púuted á d̄id’, áde wéenyínēē nkɔg míme níde mmōn á d̄id? A-bedog-bad! Sébé éh̄úd nkɔg míme níde mmōn á d̄id, d̄óo wétōŋ’é púuted echě edé mwănyonj á d̄id anyín, bonj ehúdtē ch̄ó.

*A epum d̄óo bécheméé bwel
(Mat 7.16-20, 12.33-35)*

43 “Alín á bwel á bwām déebeléé-se áchyáá e’pum bé mbéb. Alín á bwel dé mbéb-pe déechyāā’é e’pum é’ bwām.

44 A epum é bwel d̄óo bécheméé alín á bwel. Ebyééné bwām bán, béēpādēē ngun á ȳl e mbísan káa besabé á ȳl e mewāŋ.

45 Mod a bwām abele bwām áyāle é’bide mó á nlém-tê wéε bwām ékónédé. Mod a mbéb-pe abele mbéb áyāle mbíde mó á nlém-tê wéε mbéb nkónédé. Edé nê áyāle, mam míme níloné mod á nlém-tê, mó-’áá mébide mó á nsəl.

*Belōŋ bé ndáb béε
(Mat 7.24-27)*

46 “Chán nyéchəgέé mε pónde téé bán, ‘A-Sán, A-Sán,’ bonj nyéēbēlē dyam áde nílanğéé nyé?

47 Mod téé awě apedé áwem, awě awógé ábēm e’yale, bonj ábelé-’ε ngáne nh̄óbεé, mēhəgtén nyé nyaa e mod echě ákóó abé.

48 Adé néε nlōŋ-a-ndáb, awě anlímé mekon mé ndáb se ásē, ásūmē ene ndáb eláá mín.

Edíb énlōnē, éból mó á ndáb-te ne ngíne, boŋ énkēnhēnlé ch́ apán, áyāle ambíí ch́ alón.

⁴⁹ Boŋ kénzéé awě awóge ábēm e'yale boŋ eébele ngáne é'hóbéé adii nēngáne mod awě anlón ndáb ésebán asumme ch́. Ade edíb ébólé mó á ndáb-te, ene ndáb enkwě melemlēm mé póndé, epáá-'ε nyaa eche ekamé ahəgtēn."

7

*Yesue achōhté mbaledε
awě mod ambáá a sánze
(Mat 8.5-13)*

¹ Bad bésyāēl bēnwōg nímén mekan míme Yesue áhóbé'áá. Ade ámáá mó ahób, ankě á dyad á Kapenahum.

² A dyad-tē wē, mod ambáá a sánze é Roma ambé awě akamlan mbwókel e sánze. Awě mbaledε nhóg awě ándəngé ákónlé'áá kóəŋ áhédé awé.

³ Néε ane mod ambáá a sánze áwóge Yesue dúu, anlóm belyáged bé dyad áá béchēnled mó Yesue, áhyε áhood awě mbaledε.

⁴ Bépédé-'áá wéε Yesue, boŋ béchāā mó ne nlēm nhóg bán, "Hyě éhébe ane mod. Adii mod awě atəngéné mímoŋ nhébe akud.

⁵ Adəá ádēd alon á bad, alónge-'ε syánē ndáb e mékáne."

⁶ Yesue anwoón bó. Boŋ áde ákwóge apε á ndáb wéε ane mod ambáá a sánze, d́o mod ambáá a sánze ne álóméé baáb wéε Yesue ámpē áá, béléá mó bán, "A-Sán, weétagtε wε yəl, mmēn meékwognedéé ákob wε nken áwēm ndáb.

⁷ Nén ábélé menkênhenlé ké ape áwon e'só. Bon ké eyale chów wénhōbpē, awēm mbāledε ādyéé bwām.

⁸ Mmēn ndii mod awě adé ásē e nkamlēn, mmēn-ne nwóó sánze éche nkamlanné. Nlānge póg mēé, 'Kǎg', ékǎg-ke nē dēn. Nlānge empée mēé 'Hyǎg', éhyǎg-ke nē dēn. Nzé nlānge awēm mbāledε mēé, 'Běl échén', ábélé-'ε nē dēn."

⁹ Ade Yesuε áwógé nê, yǎl enkóm mó áte. Héε ákúnné e'só wéε echon é bad éche éhídé'áá mó, álāngé bó aá, "Ne mbále, nlānge nyé mēé, meényīnēē mod á alon á Israel ké nhóg awé awóó nyaa e adúbe eché anén nken-e-mod áwóó."

¹⁰ Atim áde bad ábe bēnlōmmē bétímé ámbid á ndáb, bēntān nēngáne ane mbāledε áamáá bwām adyεε.

Yesuε apuúdté nkúd a mmwaád mwǎn

¹¹ Eebeméé áte* Yesuε ankě á dyad áde béchǎgεé bán Nain. Abē bembapεε bēmbē ne mó ne echon é bad.

¹² Ade ápédé benben ne mmwε ní dyad, bad bēmbīdēn ndim ní mod níme mémbē mpom ní mwǎn níme nyaá. Nyaá abédé nkúd a mmwaád. Ndun e mod eché embid á dyad-tê, embé ne mó.

¹³ Ade Sǎngú Yesuε ányíné ane mmwaád, ankóbtén mó etyǎg. Dóó álāngεé mó aá, "Lénéd awé!"

¹⁴ Ansídé á'sō, ásitén mekále níme bēmpēmē ndim ní mod ámīn. Bepém bentyéem. Héε áhóbεé aá, "A-kódemod, nlānge wε nén mēé, syǎó ásē."

* **7:11** Eebeméé áte: Donje á kálag dé'só éwóó: *Nēε bīn é'sǎngé.*

15 Dóo ane kódemod echě anwě ésyǎngé ásē, bon ɛbootáád dyam ahób. Héε Yesue ábágé mó wěε nyaá.

16 Mbwóg ménkōb moosyǎál, békēmtē Dyōb bán, “Nkal é’dǎǎdǎη ambáá abídé áwεd tǐntē,” bēhōbē-ε bán “Dyōb ápíídé ábē bad!”

17 Mmén nkalan tǎηgene Yesue ménwōgnēd mbwóg e Judeya áte esyǎál ne meloη míme médé benben.

*Jōne, Ndusene alómé abē bembapεε wěε Yesue
(Mat 11.2-19)*

18 Bembapεε ábe Jōne bómpē bēnwōg mímén mam. Héε békíí mó aláa.

19 Dóo átédé bébe, álómé bó wěε Yesue, áá bésɛded mó nén bán, “Wε-εé edé ane awě Dyōb áhóbé áá móǎlōm-ε, ngé sébê sésine’ mod ampée?”

20 Abē bad bépédé-’áá wěε Yesue, bēlǎngē mó bán, “Jōne, Ndusene alómé sé áwōη áaken, ‘Wε-εé edé ane awě Dyōb áhóbé áá móǎlōm-ε, ngé sébê sésine’ mod ampée?’ ”

21 Póndé eche bépédé áhed nê, adidé’áá ekud é bad bwám ábe bétágnáá nkole nyaa ne nyaa, ábe bēnkūd medim ne bad ábe e’dǎǎdǎη bé mbéb é’bédé áte. Amběl bad híin ábe bēnkwě ndím bényinne’.

22 Héε átimtanné Jōne ábē bembapεε áá, “Nyétime’ ámbíd, nyéke nyéláa Jōne mekan míme nyényinné dǐd ne míme nyéwógé. Nyéláa mó bán, bad ábe bēnkwě ndím bényinne’, ábe bésyágté’áá békag bwám, ábe meloη ménkōbpē bésáá.† Abe

† **7:22 Asdad ayál:** Nzé meloη ménkōb mod bétédé’áá mó née mod awě eesáa. Bébéné’áá mó bán eesíté wěε bad bédí.

bênkwě ndóg béwógne', ábe bénwē, bépuude', nkalaŋ mí bwâm-me ámpē níkalte' wée betóótōkē bé bad.

²³ Nnam míbê-'ε ne kénzée awě eéhəŋlene nlém á abum t̄ŋgene me."

Yesue aláŋgé bad nyaa e mod echě Jone ádii

²⁴ Ade mésénze míme Jone mímáá atim ámbid, Yesue ambootéd ndun e mod echě embé áhed akale t̄ŋgene Jone. Ansedéd bó aáken "Póndé echě nyémbídtē áke dé atán Jone á ehyánge, cheé nyéwēmtēnnē bán nyéenyín? Apab á chyaá áde epub éságtée-yε?

²⁵ Cheé nyênkéé anən? Mod awě ahédé kase é mesan-ε? Nyébii nén bán, bad ábe béwáa' kase é mesan, boŋ bétagné-'ε yǎl, bédyεε dásō á ndáb é k̄ŋ.

²⁶ Cheé-ō nyênkéé anyín? Nkal é'dáádəŋ móo nyênkéé anyín-ε? Nê dēn! Ne mbále, nlánge nyé mée, nyényíné mod awě atómé nkal é'dáádəŋ.

²⁷ Jone mó adé ane awě béhóbé'áá áde bétélé e'yale ábe Dyōb áhóbé áá,

'Nóné', nlóme mímēm mésénze míme mésēbē we á'sō,

áboŋsen we nzii.'

²⁸ A mbále mod ké nhóg awě abidé á abum dé mmwaád eetómé Jone. Boŋ ké nê, mod awě adé ndimtēn átintē e bad ábe bédé á nkamlēn ní Dyōb, adé etógnén tómaa Jone."

²⁹ (Bad bésyāēl ábe bénwōg chōm éche Yesue áhóbé, k̄ŋne besaad bé tááε bênkwentēn bán ntii ní Dyōb ní t̄ŋgéné, áyāle bênküđ edusen éche Jone.

30 Boŋ Befarisia ne bemeléede bé mbéndé bénchīm yāl káŋne ntíi ní Dyöb áyāle bém̄bāŋ edusen éche Jōne akob.)

31 Yesue ambád ahób aáken, “Cheé mēhəgténné nyonŋel é bad e’chii? Chán bēn békóó abé?”

32 Bédii nēŋgáne bēndem ábe bédyéé á dyad-té, boŋ bélébpē nhóg ne aníníi bán, ‘Sétónŋé nyé e’lon, boŋ nyéeságéé. Sékónné nyé nkáŋgé ní kwééd, boŋ ké nē nyéēchyē’ é awé.’

33 Ade Jōne, Ndusene apédé, eéyake’aá ndyééd adyé, eemwáge’aá-’ε mīm. Nyébootéd ahób bán, ‘Edəádəŋ é mbéb édé mó áte!’

34 Mwān-a-Moonyon apédé, ádyāg ndyééd, á mwāg-ke mīm, nyéhābē bán, ‘Nyénóne mó, adəə ndyééd bwāmbwam. Mmwé mīmε ngēn, awonŋe belad bé tááε ne bebel bé mbéb.’

35 Boŋ káŋŋ ne á asóg, mod téé awē abíi dyam abelé ahób aá, nzii e Dyöb etəŋgéné.”

Mmwaád awē bélégséné mbéb

36 Farisia nhóg anlébé Yesue aá ahye ádyē ndyééd áwe ndáb. Ade apédé áwed, andyεé ásē, ádyé ndyééd.

37 Mmwaád nhóg mó-’ε abédé á dyad-té wē, awē abédé mbélé-mbéb. Awóg áde áwógé bán Yesue adyāg ndyééd á ndáb e Farisia, ampεén apom á dyöŋ dé elod é bwām áhed.

38 Anyogén ásē benben ne mekuu míme Yesue, ábootéd achii, ásəbté’ mó mekuu ne mészod. Ampíné mó mekuu ne échē esid é nló, ámwāā mó mekuu álúmed edúbé, anyönlé-’ε mó mekuu ne ádé dyöŋ dé elod é bwām.

39 Anyín áde ane Farisia ányíne nê, anhób áwe nlém-tê aá, “Nzé nkal é'daádəŋ móō anén mod ânkongé abé, né abágé'áá abíe' nyaa e mmwaád eche anén mmwaád awě akidtan mó ádíí ne abé áde áwóó, né abíí-'ε nén aá anén mmwaád adíi mbélé-mbéb.”

40 Héε Yesue áləŋgeé mó nén aá, “A-Siməŋ ndəó we mwă pőle aláa.” Farisia ne ankwentén aá, “A-meléed, cheé édé? Kăg á'sō, éláa me.”

41 Dóó Yesue áhóbéé aá, “Mod nhóg abédé awě abalé'áá bad ngáb. Ane mod akalé'áá bad bébe melúm. Akalé'áá nhóg móom mé e'kále métáan, aníníí-'ε e'kále étáan.

42 Bó modmod bėnkėnhenlé atuε. Né-óó anlagsén bó mod téé áde alúm. Bəəb-pəó, áyāle bó bad bébe, nzé-módé édúbpé weé ätōmtēŋ mó adəŋ?”

43 Siməŋε antimtén mó aá, “Ndúbpé meé, ane awě alúm déntōmtēnnē achab ámín.” Dóó Yesue áhóbéé aá, “Etəŋgéné.”

44 Dóó ákunneé wée ane mmwaád, boŋ áləŋgē Siməŋε aá, “Enyíne anén mmwaád-ε? Ade rísólé áwōŋ ndáb, wenkėmbaá me mendíb weé řwobned mekuu. Boŋ anén mmwaád asəŋtė me mekuu ne rímē mėsəđ, apíné-'ε mó ne échē esid.‡

45 Wenkėnháá me təl, boŋ taa mensól hén, eésógéé me mekuu anyəle.

46 Wenkėnwógédtė me dyǝg á nló ákob me nken, boŋ awógte me dyǝg dé elod é bwām á mekuu.

47 Edəŋge é ngíne éche anén mmwaád álúmtė, édé nhəgtén ne alagsen áde ákúde áyāle ekud é

‡ 7:44 A mbwóg e bad bé Israel, nzé mod akobé'áá mod nken, antəŋgén mó mendíb abε áwobe mekuu, ahé mó təl, awógéd-te mó dyǝg á nló.

mekan mé mbéb éche ábélé. Mod-te awě béebudεé mbéb alagsen, eébūdēē edənge alúmed.”

⁴⁸ Héε Yesuε álāngeé mmwaád ne aá, “Ekudé alagsen dé mbéb áyāle mbéb nímōη n̄syā̄l.”

⁴⁹ Bad ábe bóbōó bedyágé’áá ndyééd bēnsédéd yāl bánken, “Ebál é mod éhéé chén éche éwóó káηne kunze álagsen mbéb?”

⁵⁰ Yesuε anláá mmwaád ne aá, “Adúbe áde éwóó áchóηté wε, kǎg ne nsan.”

8

Nguse é bebaád éhíde Yesuε

¹ Ambīd e nê Yesuε ambootéd akε myad ne myad, mémbaá ne mésad. Akagé’áá, ákalé’ nkalāη n̄ bwām mé nkamlen n̄ Dyōb. Akεéné’áá ábē bembapεε dyōm-ne-bébe.

² Bebaád ábe e’dəódəη bé mbéb bémbēē áte ne ábe békónlé’áá nkole mémpēe, boη áchōōd bó, bómpē bémbē á echoη. Abē bebaád bēbédéε, María mmwaád a dyad á Matala awě ánhūd̄tē e’dəódəη bé mbéb saámbé á yāl,

³ Joanaa, mmwaád awe Kusa, mod awě abédé nló áyāle bembəlede ábe Herōde, Susanaa ne ekud é bebaád bēmpēe. Abē bebaád bēbénlād̄táá ábab bwēm bēn, bétōgnán Yesuε ne ábē bembapεε.

Ngan e mbál-e-bū

(Mat 13.1-9; Mak 4.1-9)

⁴ Ekud é bad émbīd dyad ne dyad téé áhyε dé anyín Yesuε. Ade béléádné áte nê bōob, ankalé bó ngan nén aá,

⁵ “Nkwel-é-nzag nhóg ankě mbál asob á nzag-tē. Ade ásobéé mó nê, donge dénhūn á nzii-tē, betóm

bé nzii bémad mó akogted ámin, menon mómpē mémad mó asômted. ⁶ Donje dé mbál dénhūn á eláá mín. Mmê ménkōb, boŋ ménhyēlē áde méepedeé akwog, ngáne édíí bán ndoob e eláá mín eékonjéé mendíb.

⁷ Donje ámpē dénhūn wéé mekôd médíí. Néé bōōbōō békwoḡē, mekôd ménkāŋ ábê bwēm.

⁸ Mbál mémpēe méntān ndoob e bwām. Mēnkwoḡ, íchyáá-'ε bwāmbwam. Donje dé e'sog dénwālē mbwókēl é mbum." Ade Yesue ámadé nê, ambád áte aá, "Kéńzée awě awóo metúu áwóge'."

*Chõm éche ékáá boŋ Yesue ákalé' ngan
(Mat 13.10-17; Mak 4.10-12)*

⁹ Ambíd e pónde, Yesue ábē bembapeε bénlāā mó bán, átógned bó ene ngan.

¹⁰ Héé álāŋgeé bó nén aá, "Dyōb ábágé nyé kunze ábíi kun é nkamlēn ní Dyōb. Boŋ bad ábe bélyágé ásē, bēwōḡ chó néé ngan ábel nén, bényíne', boŋ béecheméé, bēwóge', boŋ béēsōŋtānnē.

*Yesue atógké ngan e nwén-é-mbál
(Mat 13.18-23; Mak 4.13-20)*

¹¹ "Boob-poó, rítógned nyé ene ngan. Mbál ndíi Eyale é Dyōb.

¹² Mbál míme ménhūn á nzii-tê nílúmte bad ábe bēwóge eyale é Dyōb, boŋ ámbíd e pónde Devæle áhye ahúd bó chó á nlém-tê, ábel nén béédūbpē Dyōb se békūd e'soosōŋ.

¹³ Mbál míme níhúné á meláá-tê nílúmte bad ábe, nzé bēwóge Eyale é Dyōb, békobe chó ne

menyiŋge, boŋ échê eyale éēwēnnādtē bó á nlém-tê. Bédúbpe Dyöb á esóŋ é pónde boŋ á pónde e mekaɣsen bédol yəl ámbíd.

¹⁴ Mbál míme ríhúné á mekôd-te, rílúmte bad ábe béwóge Eyale é Dyöb, boŋ kááŋ ne á asóg, mpúlé mé nkôŋsé, abud á bwēm awóŋ, ne menyiŋge mé nkôŋsé ríkáŋ bó nlém áte. Nê ákəə', béhelelé kəse é e'pum achyáa.

¹⁵ Mbál míme mó-'ε méntān kəse e ndəəb, rílúmte bad ábe béwóge Eyale é Dyöb ne nlém rísyāəl, békōō-'ε chó á nlém-tê. Nê ábele' béwesən kááŋ béchyáá e'pum.

*Nzé béchódé etrukán, béekoŋgéé chó
(Mat 4.21-25)*

¹⁶ “Modmod eémā' é etrukán achod se ákōō chó á ebwəg-sé, káa atibéd chó á anəŋ sé. Abelé ákēle chó dásō ámín, ábel boŋ kénzéé awě asóle á ndáb, ányíne ekíde.

¹⁷ Dyam téé áde áde á e'koŋéd-te débíd á nhéné. Kéchéé-'ε éche ênsəóm á e'koŋéd ébyēen, ébíd-te á enyen.

¹⁸ Né-óó, nyétêd pónde ngáne nyéwóglanné. Kénzéé awě awóó nsōŋten ní kun é nkamlən mí mín, Dyöb débād mó mímé nsōŋten abe. Ane awě mó-'ε eewóó, ábəd ké éche áwémténé aá mówōō.”

*Túmbé eche Yesue
(Mat 12.46-50; Mak 3.31-35)*

¹⁹ Bəəb-póó, áde Yesue nyaá ne baányan béhyédé mó anyín, bénkēnhēnlé mó ape benben, áyāle etál éébēdeé ngáne ndun e mod ênləŋnédté mó.

²⁰ Dóó bad bélāŋgeé mó bán, “Pón nyoó bóəbe baányon bétyéémé á ebwóg, béhele-'ε we anyín.”

21 Hée Yesue átimtanné bó nén aá, “Bad ábe béwóge eyale é Dyöb, bébelé-’ε ngáne éché eyale éhóbεé, bóó bédé awem nyaá ne ábêm baányan.”

*Yesue ahóódté ekudkud
(Mat 8.23-27; Mak 4.35-41)*

22 Mbwe nhóg Yesue ansól á böle-tê ne ábē bembapεε, aláá bó aá, “Syáá déchabe πεd e edib eníníí.” Dóó bébwógké eke.

23 A eke-tê wê, e’chó bénkōb Yesue. Hê dóó ekukud étáné bó átínté e edib. Mendíb ménsōl bó á böle-tê kááη, mam mébéén bó ebébtéd.

24 Hée bekíí Yesue anyem ásē boη bélāngē mó bán, “A-Sán, a-Sán, pón syánē dewág-ōō!” Dóó ányémmé ásē, ákännē ekukud éched áte, éhóó-’ε. Edib éche éhódé’áá áte chómpē énsōg ahod.

25 Dóó ásedtεé bó aáken, “Nédē nyéedúbpéé me-ye?” Nén dénkōbēd bó mbwóg, yäl-le enkóm bó áte bwāmbwam bésedté nhóg ne aníníí bánken, “Ebál é mod éhéé chén, éche ékamlan kááηne ekukud ne mendíb, kááη béwōgnē-’ε mó?”

*Yesue achōhté mod a Gerasin
awě e’daádāη bé mbéb bémbēē áte
(Mat 8.28-34; Mak 5.1-20)*

26 Yesue ne ábē bembapεε bēnchabé edib, bootya á Galilia, bépē á múde nímíníí, á mbwóg e Gerasin.*

27 Ade ábídé á nkin amboméén mod a dyad nhóg awě e’daádāη bé mbéb bémbēē áte. Ebédé etún é póndé áde ane mod ééháge’áá mbóté. Eédyεε’áá ké á ndáb-te, nzése á soóbaδε.

* **8:26 Gerasin:** Donje á kálag dé’só áwóó *Gadara*, émpēε-’ε éwóó *Gεεσα*.

28 Anyín áde ányíné Yesuε, ankwě mó á mekuu ne esaád á nsal, ábōnē aá, “A-Yesu, Mwän a Dyöb á Ngum, cheé sóo déwónné? Sôn, weekógsán mε.”

29 Nê démbē áde Yesuε ámáá e'dáádəŋ bé mbéb akamlɛn aá, é'bíd mó áte. Ngen ne ngen, nzé e'dáádəŋ bé mbéb bénsāl mó áte, ké á mehanǵé dóo ámbēē, apádtádtáá bengəbéngəbē ábe béhédé mó á mekuu ne mekáá, boŋ edáádəŋ é mbéb ékεεné mó á ehyánǵe.

30 Yesuε ansɛdéd mó aáken, “Chán dĩn ádíí wε?” Ankwɛntén aá, “Amutεε.” Anhób nēŋgáne e'dáádəŋ bé mbéb híin bénsānlē mó áte.

31 E'dáádəŋ bé mbéb ábed é'cháá'áá Yesuε bán, eehúnté bó á echóg échě éewóo asóg,†

32 Esog é nguu ébédé áhed édyāǵ medyé á mbám mé ekone. Dóo ábē e'dáádəŋ é'cháá'é Yesuε bán áte de básāl ké á esog é nguu-tē. Dóo Yesuε ábágé bó kunze.

33 Abíd áde e'dáádəŋ bé mbéb bē é'bídé ane mod áte, básāl échē nguu áte. Dóo nguu éwúbpé ásē, ényəǵt' á e'láá bé nkin mé edib, éhún á edib-tē, éhó'-ε.

34 Áde benɔn bé nguu bényíné nê, béntōm mehélé, békag bėkanlé bad nkalan á dyad-tē ne á mebwoǵ níme médé benben.

35 Awóg áde bad bėwógé-'aá nê, bėbwógé'-ε ásē ákε dényĩn dyam áde ábėnlédé. Bėpédé-'aá wεε Yesuε ámbēē, bényín ane mod awě ánhũdtē e'dáádəŋ bé mbéb áte ngáne ádyéé mó á akéb, ahédé mbóté á yǎl, ádyēē'-ε bwám. Dóo mbwóg ríkóbé bó.

† **8:31 Ebi:** Mewēmten mémbe bad bán e'dáádəŋ bé mbéb bēbē á mbwog á ndib e ebí káŋŋ né echab pón dé e nkóǵsen epedé.

36 Bad ábe bennyīnēn dīd bēnkale bó ngáne Yesue áchónṭé ane mod.

37 Hée bad bé mbwóg e Gerasin bēlanḡé Yesue bán ásyəə áwāb ndəəb, áyāle mbwóg ní ngíne ménkōb bó. Dóo ásólé mó á bǎle-tê, bon ásuē’.

38 Mod awě bēnhūdtē e’dəədəḡ bé mbéb áte anchāḡ mó aá búmō békag, bon Yesue antiméd mó ámbīd aá,

39 “Timé’ áwōḡ dyad, éke ékanle bad ndəle a dyam echě Dyəb ábénlé wε.” Ane mod ansú á dyad, ákag, ákanle mod téé dyam áde Yesue ábénlé mó.

*Yesue apuúdté ngəndéré póg
áchōōd-tε mmwaád ampée
(Mat 1.18-25)*

40 Ade Yesue áhúú, ndun e mod enhyě mó aságnen ne menyīḡe ngáne émbēē bán bésíné’áá mó.

41 Hée mod nhóg awě béchógé’áá bán Jairuse ápédé áwē. Jairuse abédé nhóg átínté benkamleḡe á ndáb e mekáne. Ankwε Yesue á mekuu, áchāā mó aá, áhyε áwe ndáb. Aá

42 nímmē mpəm ní mwān a mmwaád níhede awé.
Ade Yesue ákagké áwed, bad bēnləḡnéd mó.

43 Mmwaád nhóg ambé áhed awě akōnlé’áá nkole níme mekií mébídé’áá mó á yǎl pōndé ésyāəl. Mmē nkole níbédé mó á yǎl á etūn é dyōm-a-mwé ne níbe ésebán modmod ahele mó bwām adid.‡

44 Hée ábídé Yesue ámbīd, bon ásitén Yesue mesó mé nkobe níme ánwāā’é. Abwōḡ-ábwōḡ mekií ménsōḡ mó abíd á yǎl.

‡ 8:43 Donḡe á kálag dé’só ébadé bán: *Ammád chōm ésyāəl éche ánwōḡḡe abébed wéε bad bé mel.*

45 Dóo Yesue áseǵtεé aáken, “Nzé-módé asidténe me?” Modmod enkênkwεnténné. Dóo Petro áhóbεé aá, “A-Sáη, ngómē ndun e mod elāηnéde wε, kááη békáηnéne-’ε wε.”

46 Bon ké nê Yesue anhób aá, “Mod akidténe me, áyāle nwógé ngáne ngíne ebíde me á yǎl.”

47 Ade ane mmwaád ányíne nê bɔɔb aá móðheleé yǎl akoo, ambíd Yesue á’sō. Anáá’áá ne mbwóg. Ankwε mó á mekuu. Héε áhóbεé á’sō wée bad bésyā́l chóm éche ékáá bon ásitén mó, ne ngáne módyéé bwám melemlém mé pónde.

48 Dóo Yesue áhóbεé aá, “A-mwǎn-a-mmwaád, adúbe ádōη ádíde wε bwám. Kǎg ne nsāη.”

49 A pónde eche Yesue áhóbεé nê, dóo mod awē bélómé wée Jauruse ápedé bon áhōbē nén aá, “Weétagné wε Meléede ataged. Awonη mwǎn amaá mó awé.”

50 Yesue awógé-’aá nê, bon álāηgē Jauruse aá, “Weewógé mbwóg! Dúbé dúbpén, né mwǎn ádyéé wε bwám.”

51 Ade Yesue ápedé wée Jauruse áwe ndáb, enkênháá etál aá, mod ampée áhíd mó á ndáb-te éetóméé Petro, Jōne ne Jεmσε, nchoo ne ane mwǎn sáá bó nyāη.

52 Bad béchyé’áá, bélebé-’ε. Yesue anláá bó nén aá, “Nyéēchyēē’. Ane mwǎn eewédeé, akúne kúnén.”

53 Bad bēmbotéd mó awɔɔ, ngáne bém̄bī’ é bán amaá awé.

54 Héε Yesue áchāηgé mó ekáá, bon áchāgέ mó aá, “A-mwǎn, páde áse.”

55 Dóo edāédāη étímé mó á yǎl, apáde-’ε áse ábwōg-ábwōg. Yesue anláá bó aá, bébe mó ndyééd, ádyê.

⁵⁶ Yǎl enkóm nyaá bó sǎŋ áte bwâmbwam, bon Yesue anláá bó aá, béekanlé modmod dyam áde ábénlédé.

9

*Yesue alómé bembapεε dyôm-ne-bébe
(Mat 10.5-15; Mak 6.7-13)*

¹ Yesue anchélé ábē bembapεε dyôm ne bébe abwóg ahóg. Ambag bó ngíne ne kunze áhúd bad e'dǎádǎŋ bé mbéb áte, ne ámad nkole nyaa ne nyaa.

² Anlóm bó aá, béke békale nkalan mé nkamlen ní Dyöb, béchoŋte-'ε bad.

³ Dóo álângeé bó nén aá, “Nyéewánlé chömchöm á eke, ké ntón, ké ekwe, ké ndyééd káa ngáb, modmod eewánlé-'ε mbóté ébe.

⁴ Ndáb ké ehéé echě nyésólé áte, nyédyεε áwēd-te káŋŋ ne mbwe míme nyésyŋgeé.

⁵ Dyad ké áhéé-'ε áde béekobéé nyé nken, nyétēdē dó, nyékūd-te ebumbú á mekuu álúmed nén bán échab ebébtéd éŋone bēn.”

⁶ Héε bembapεε bébwógké ásē, békǎg dyad ne dyad téé, békalé nkalan ní bwâm, bédidé-'ε bad bwâm hóm ne hóm téé.

*Herode atage áte
(Mat 14.1-12; Mak 6.14-29)*

⁷ Bóob-póo Herode awě akamlánnáá alon á Galilia anwóg mam mésyāāl míme mēmbenléd. Mewēmten métágé'áá mó áte áyāle bad behóg béhóbé'áá bán, Jōne apuúdé,

⁸ ábíní bán, Elaijaa atimé ámbíd á nkōŋsé, bémpēe-'ε bán, nkal é'dǎádǎŋ nhóg a'bóód mó atimé ámbíd á alonjé.

9 Herɔde anhób aá, “Mêmbel bésēl Jone nló. Nzéé ampée íwógéé bán abele nímén mekan?” Nê dêmbël ádān aá mónyín ane Yesue.

*Yesue adíté ndun e mod
(Mat 14.13-21; Mak 6.30-44; Jon 6.1-14)*

10 Ade bembapεε bé nlomag béhúú ámbid, bēnlāá Yesue mam míme bēbélé. Héε átédé bó bon átímné bó á ahǎngé á hǎm á dyad á Betsaida.

11 Ade amute á bad áwógé nê, dénhid mó áwed, káǎn bétán mó. Ankob bó bwám, ákanlé bó pǎle e nkamlen í Dyǒb, áchoǎté-’ε bad ábe bēhédé’áá bwám adyεε.

12 Ade ngukél épédé dǎo bembapεε bēlǎnge Yesue bán, “Chené ábén bad, bétíme’ á myad-tê míme médé benben, ábel bēhed ndyééd ne hǎm áde bēnaá’é. Ndyééd eésáá hén, e’noǎ-’ε béesaá wéε dédí nén.”

13 Héε Yesue álǎngeé bembapεε aá, “Nyé bó nyébe bó chǎm éche bédyēē.” Dǎo bēhóbéé bán, “Séwóó e’wεle é’táan ne súu ébe. Ene ndyééd eéhēlēē bad bésyāāl akwog.”

14 Mesǎngé mé bad ábe bēbédé áhed mémbe e’kálé é’táan. Bon Yesue anláá ábē bembapεε aá, “Nyélad bad áte, nyékab bó bon akab téé ábē móom mé bad métáan.”

15 Bēnkǎb bad áte ngáne ánhǎbpē.

16 Héε Yesue átédé ábē e’wεle é’táan ne échē súu ébe, ákabé áte, ásāgnān Dyǒb bon ábagé bembapεε aá békabpe bad.

17 Bad bésyāāl bēndyē, békód-te káǎn ene ndyééd élyāg asē, eche bēladé áte e’lǎn dyǎm ne é’be.

*Nzé-módé Yesue mwēn ákóó abé?
(Mat 16.13-28; Mak 8.27-9.1)*

18 Mbwe nhóg Yesue anchíb yǎl áke dé akáne. Bembapee bēnpen bóó bémbe áhed. Ansedéd bó aáken, “Nzé-módé bad bó béhóbeé bán ndé?”

19 Bēntimtén mó bán, “Donje á bad béhóbe bán, edii Jone Ndusene. Donje áhōbē bán, Elaijaa, bēmpēe bán, nkal é’dáádəŋ a’bóód atimé ámbíd á alongé.”

20 Dóó Yesue áhóbeé aá, “Bon nyébēn-ne, nzé-módé nyéhóbeé bán ndé?” Dóó Petro áhóbeé aá, “Edii Ane Awě Dyōb Awógté.”

21 Héé ásíméé bó etúu áte, álāngē-’ε bó aá béepanlé áte.

22 Ambád aá, “Mwǎn-a-Moonyon atəŋgéné ákūd metake hiin, bad bémháá bóóbe beprise bémháá ne bemeléede bé mbéndé bēbāŋ-’ε mó á yǎl. Běwūū mó, bon e’pun ábe é’lonténé é’láán, əpuú.”

23 Anláá moosyǎl áhed aá, “Kéznzéé awě adəá me ahíd ásob yǎl mendíb, ápēm ádē awəg mbwe tée, bon áhíde me.

24 Ayāle kéznzéé awě ahede ádē alongé ason, əbōd dó. Kéznzéé-’ε awě abódé ádē alongé áyāl echēm, ákūd alongé áde déemaá’.

25 Nsyáəŋ ríhéé mod ákudté nzé akudé nkōŋsé rísyǎl bon abóó, ké’ε abódé échē edəádəŋ.

26 Kéznzéé awě ákwāgēn me ne ábēm e’yale, Mwǎn-a-Moonyon mómpē ákwāgēn mó á pónde échē ápeé ne ehúmé échē, nédē ehúmé é Sán ne ángel échē ésáá.

27 Bon á mbále, baahóg bédé nló ámīn bəəb, béenyínénne kwééd díd, áde béēsēbpéé nkamlen ní Dyōb anyín.”

*Yǎl ehǎhǎléné Yesue
(Mat 17.1-8; Mak 9.2-8)*

28 Née émadé ké e'pun waam, áde Yesue áamá ahób nê, ankeén Petro bó Jon ne Jemse á ekone mîn âkáne.

29 Ade ákânneé nê, e'só bēnhǎhǎlén mó á nló, nkobe nímē mó-'e nípúbé féréd, nímwaá-'e áte.

30-31 Abwōg-ábwōg bad bébe, Mosee ne Elaijaa, bémbīdēn ehúmé é ngum, bébootéd mó akalēn. Békálé'áá ngáne álōnēdtē ntíi ní Dyōb tǎhǎne kwééd eche áwēē á Jerusalem.

32 E'chó bénlōn Petro ne baáb á dīd. Ade békábnédé bényīn ehúmé échē ne bad bébe áhed.

33 Ade ábē bad bébe bétēdtéé Yesue, dōo Petro álǎhǎgēé mó aá, "A-Sǎh, ébóó ngáne syáá dēdí hén. Délōh e'bem é'láán, échōh, éche Mosee ne éche Elaijaa." Anhób nê ésebán abíi chōm éche áhóbéé.

34 Eépēdéé ké amad á nsal, boh mbag ébid, ékúdtén bó. Nén dénkōbēd bó mbwōg.

35 Héé béwógé ehób ébīde á mbag-tē nén, "Mwǎn awēm mó nén. Móo nípwédé. Nyéwōgne mó."

36 Emáá-'aá ahób nê dōo bényíné Yesue mwēnpēn. Bénkoó ádén akan ésebán bēkanle modmod dō.

*Yesue achōhté kódemod
echē edǎǎdǎh é mbéb émbēē áte
(Mat 17.14-18; Mak 9.14-27)*

37 Ade bīn é'sǎhǎgē, Yesue bóobe bembapēe bēnsūd á ekone-sé. Ndun e mod ehye mó abomēn.

38 Héé mod nhóg á echoh é bad-tē wē álébpēé mó aá, "A-meléed, sōn, ncháa' we méé, énon awem mwǎn á dīd. Adii me mpōm ní mwǎn.

39 Edǎǎdǎŋ é mbéb étagte mó. Nzé échǎŋgé-'é mó, abelé abón esaád, ahún ásē, ánúadá kǎŋ mehod mébidē mó á nsəl. Elédte mó achene, né émáá mó yǎl ached áte.

40 Mempεέν mó wée ábōŋ bembapεε, nchǎŋ bó meé, bébided mó edǎǎdǎŋ é mbéb chē áte, boŋ béehεεlé.”

41 Dóo Yesuε átimtanné aá, “Wáā, nyé bad bē' chii, mbéltéd nímēn méētyéemεé, nyéewóo-'áa adúbe. Chán mápéé nyé adyεen boŋ nyédúbé me? Hyεené awoŋ mwǎn hén.”

42 Ade ane mwǎn áhúé'é nê, edǎǎdǎŋ é mbéb éched émpii ane mwǎn, ébǎm mó ásē, ánúadá. Dóo Yesuε ákǎnné échē edǎǎdǎŋ é mbéb áte, ádíđ ane mwǎn bwám, ábāg-ke mó wée sáá.

43 Menyáké ménkōb moosyǎál, ányín ndǎle a akan awé Dyōb ábélé.

*Yesuε akǎnlé eche kwééd ngan ámpē
(Mat 17.22-23; Mak 9.30-32)*

Ade bad bélyágé bényágéé nê, áyāle chǎm éche ébénlédé, Yesuε anláá bembapεε nén aá,

44 “Nyésōŋgtēn dyam áde níhedéé nyé aláa bwám. Bébé Mwǎn-a-Moonyoŋ á mekáá mé baányoŋ.”

45 Boŋ ábē bembapεε béenkēnsóŋtēnné chǎm éche ánhōbpē. Embē née ngan eché elélé bó atóge, bébáá'áá-'é mó aseded.

*Nzéé atómténé mod
ambáá abé á'sō é' Dyōb?*

(Mat 18.1-5; Mak 9.33-37)

46 Bembapεε bēmbootéd aswanŋtēn tâŋgene mod awé atómténé mod ambáá abé áwab tǎntē.

47 Yesuε anchēm bó mewémtēn áte. Antéd mwǎmpǐn ní mwéndem, ápēēn mó áwe akéb.

48 Dóo álânḡεέ bó nén aá, “Kénzée awě akobé anén mwän á dīn ádēm, né akobé με. Kénzée-’ε awě akobé με, né akobé ane awě alómé με. Né-óó, ane awě adé mwämpīn áwen tínté, né mó atómé mod ambáá abé.”

Mod awě adé awōḡ
(Mak 9.38-40)

49 Jone anhób aá, “A-Sáḡ, sēnnyín mod abídte bad e’dəódəḡ bé mbéb áte á dīn ádōḡ, sēnláá-’ε mó bán ásōḡ abel nê, áyāle eésaa ne syánē.”

50 Dóo Yesue álânḡεέ bó aá, “Nyéelánḡé mó bán ásōḡ abel nê. Kénzée awě eetāḡán syánē né adé ne syánē.”

Bébáá Yesue nken akob

51 Bəəb-póó, pónde eche Yesue ántāḡēnē akε ádyōb embootéd apε. Né-óó, ammad atíi aá, mótāḡēnē akε á Jerusalem.

52 Hé-’aá alómé mésénze á’sō. Mēnkě á mwă dyad a Samaria nhóg, ábele mó mboḡsén.

53 Boḡ áde ápédé áwed bad bé dyad bēnkēnkobpé mó nken áyāle á Jerusalem dóo ákágé’áá.*

54 Ade bembapεε, Jemse bó Jon bényíné nê, dóo bésédté Yesue bánken, “A-Sáḡ, edəó wεé séchéle muú ádyōb, níhyε níhyáad bó-yε?”†

* **9:53** Aloḡ á Samaria démbē áfínté meloḡ mé Galilia ne Judeya. Boḡ bad bé Israel bēnkēnkobpé bad bé Samaria née baányan. Né-óó bad bé Samaria béekwεntannaá bad bé Israel ábe bēbídé’áá á Galilia nken akob nzé békágé’áá ngande achog á Jerusalem.

† **9:54** Donḡe á kálag é’só ébáde bán: *nēḡāne Elaijaa ámbenlě.*

55 Boŋ Yesue ankuné áwāb, ákānñē bó áte.‡

56 Héε bóbbōó békíí á dyad démpēe.

Bad ábe bēmpōn Yesue ahíd

(Mat 8.19-22)

57 Ade békagké nê, mod nhóg anláá Yesue aá, “Měhíd wε kéhéé áde ékagké.”

58 Dóó Yesue átímtanné mó aá, “E’bubwóg é’wóó ábab e’lóm wée bésóléé, menən-nε ámpē méwóó nímab mŭm, boŋ Mwǎn-a-Moonyoŋ eewóó’é hŏm áde ábannéé nló.”

59 Yesue anláá mod ampée aá, “Hyǎg, éhíde mε.” Boŋ ane mod antímtén mó aá, “A-Sǎŋ, mwě, nísébe níke nílime echem sǎŋ.”

60 Yesue anláá mó aá, “Mwě ndim nílime nímāb ndim ní bad. Boŋ wε, éhedne bán, éke ékanle bad nkalaŋ mé nkamlɛn ní Dyöb.”

61 Mod ampée anláá Yesue aá, “A Sǎŋgú, měhíd wε, boŋ mwě, nísébe níke nílyógtɛn echem ndáb.”

62 Boŋ Yesue anláá mó aá, “Kéznéé awě aboótédé hŏm alíi, boŋ ánəné’ ámbíd, eékwognedéé ábel nsón ásē e nkamlɛn ní Dyöb.”

10

Yesue alómé bembapεε móom saámbé ne bébe

1 Ámbíd e nê, Sǎŋgwéé ampwěd bembapεε bēmpēe móom saámbé ne bébe.* Anlóm bó á’sō bébe bébe dyad téé ne hŏm téé áde ámbíí’é aá móōpě.

‡ 9:55 Donje á kálag dé’só ébáde bán: *anhób-pε aá, “Nyéebti’é edə́dəŋ éche ékamlan nyé. Mwǎn-a-Moonyoŋ eépedéé áwíu bad, apedé dásə əsoŋ bó.”* * 10:1 Móom saámbé ne bébe: Donje á kálag dé’só áwóó: *móom saámbé.*

² Anláá bó aá, “Nzag echyáá bwâmbwam, bwēm é’hednad apád, boŋ bepád béebuu’é áte. Né-óó, nyékânne nén bán, nwóó-nzag álôm bepád.

³ Nyékag-kóó, boŋ nyébíi bán nlóme nyé née ndyᵛᵛᵛ mí mbód átíntê e ngᵛ.

⁴ Nyéewánlé ekwε é ngáb á yäl, ké ekwε empée, káa metámbé. Nyéebwäg-ke mod aleled á nzii.

⁵ Ndáb ké ehée eche nyésōnlē, nyéleled bó nén bán, ‘Nsaŋ míbê ne nyé.’

⁶ Nzé mod a nsaŋ adé áhed, né nímēn nsaŋ mébē ne mó. Nzé eēsš, né métimén nyé bēn.

⁷ Ndáb ké ehée eche nyésólé, nyédyēē áhed. Nyéēpenlád ndáb áte. Nyékob-pe kéchéé éche bébagεé nyé ádyé káa ámwé, áyāle mod a nsón atōŋgéné née ákudéé míme nsábe.

⁸ Dyad ké ahée áde nyépédé áte, boŋ békob nyé nken, nyédyē kéchéé éche bébágé nyé.

⁹ Nyédide bad bé nkole bwám, nyéláa-’ε bó nén bán, ‘Nkamlēn ní Dyōb nípedé nyé benben.’

¹⁰ Boŋ dyad ké ahée áde béekobεé nyé nken, nyéke á ntém nzii, nyéhōb nén bán,

¹¹ ‘Ké échén ebumbú éche émbē sé á mekuu, sēkudté nyé chó, boŋ ké nē nyébíi bán nkamlēn ní Dyōb níde benben.’

¹² Nlānge nyé mēé, á epun é nkáásé, nkógsen míme dyad á Sodom dényinnē mébē mwāmpin tómaa míme bad ábe bédé áde dyad áte békudté.

*Edé ngᵛl ne bad ábe béekunne mbíd
(Mat 11.20-24)*

¹³ “A-bad bé Korazin, ébēēn nyé ebébtéd! Ebēēn nyémpē ebébtéd á-bad bé Betsaida! Áyāle nzé émbē bán, ndāle é mekan éche Dyōb ábélé áwēn

myad, êmbenléd nê á dyad á Tirε ne dyad á Sidon, né bénwāā melebe se etûn, bémwagtéd-te mbúmbú áyāl álúmed nén bán, béhənléné ádab abé dé mbéb.

¹⁴ Bon mbwε mé nkáásé, nkáá míme bad bé Tirε ne bé Sidon mébē mwāmpīn tómaa mímēn.

¹⁵ Nyé bad bé Kapenahum ámpē, nyêwēmtan bán,

nyêmaá ape ádyōb,

bon bésudéd nyé kəη se ásē á dū-á-muú.”

¹⁶ Hée áləηgée bembapεε nén aá, “Kénzée awě awógné nyé, né awógné mε, bon kénzée awě abáá nyé á yəl, né abáá kəηne mε. Kénzée-’ε awě abáá mε á yəl, né abáá kəηne ane awě alómé mε á yəl.”

*Bembapεε Móom saámbé
ne bébe béhúú ámbid*

¹⁷ Ade bembapεε móom saámbé ne bébe ábe Yesuε ánlōmmē béhúú ámbid, bēnlāā mó ne menyinge mésyāāl bán, “A-Sáη, kəηne e’dəádəη bé mbéb bēnsudéd yəl áwεd e’só, atúb áde sétúbé wε dīn.”

¹⁸ Dóo Yesuε áhóbeé aá, “Nnyíne Satanε ahúné ádyōb nēηgáne emwεdmwεd.

¹⁹ Mbagé nyé kunze ádyaa nyə bóobe ben-gaabobe bé mpwεn ámīn, ne átóm ngíne esyāál eche Satanε áte, Satanε ne ane awě akóó syánē. Dyamdyam déebenlé nyé.

²⁰ Bon ké nê ámpē, menyinge míme nyéwógée méebāg nén bán, áyāle e’dəádəη éwógné nyé, bon pεn nyéwóg menyinge dásō nén bán, mīn méténlédé nyé ádyōb.”

Yesue awógé menyinje
(*Mat 11.25-27, 13.16-17*)

²¹ Abwōg-ábwōg Edáádəŋ éche Esáá† énwōgēd mó menyinje bwámbwam, ahób aá, “A-Tê, Sánḡwéé a nkoŋ ní sé ne mí mín, nságnen núbê ne we áyāle elúmté mpín mí bëndem mam míme ébáŋné bad bé debyéé ne bad bé nsōŋten. Εε, a-Tê, nê dēn dōo édáá wéé, ébenled.

²² Nlāa nyé mēé, Echem Sán ebagé mekan mésyāāl áwēm mekáá. Mod ké nhóg eékoŋtēé mwān abii ésebé Dyōb Titée. Mod ké nhóg-ke ámpē eebii’é ngáne Titée ákōŋté abé ésebé mwān, ne kénzēé awē mwān ádáá aá mólúmed mó.”

²³ Héé ákúnné wéé bembapεε, boŋ álāŋgē bó á kun-tê nén aá, “Nsimé ne bad ábe bényine’ mekan míme nyényínεé nén!

²⁴ A mbále nlāŋge nyé nén mēé, bekal-bé-e’dáádəŋ híin ne kāŋ é bad híin bēnwanén ānyín mekan míme nyényíné ne áwóg mekan míme nyéwógé boŋ bénkényinné, bénkēnwóg-kaá.”

Ngan e mod a Samaria awē aboo nlém

²⁵ Bōob-pōó meléede a mbéndé anhyé Yesue akag áte aá, “A-meléed, cheé mébenlé boŋ níkūd alongé áde déemaá?”

²⁶ Yesue antimtén mó aá, “Chán éténlédé á kálag e mbéndé. Cheé éláá áwēd-te?”

²⁷ Meléede a mbéndé ankwentén aá, “‘Étāŋgéné bán édəŋ Sánḡwéé ádōŋ Dyōb ne nlém nísyāāl, ne edáádəŋ ésyāāl, ne ngíne esyāál, ne mewēmten mésyāāl.’ ‘Edəŋ-’ε mwānyoŋ nēŋgáne echoŋ yǎl.’ ”

† **10:21** Donje á kálag dé’só áwóó *Edáádəŋ éche Esáá*; émpēe bán, *éché edáádəŋ*.

28 Yesue anláá mó aá, “Ebíi akwɛntɛn. Nzé ebelé áned, né wěkũd alongé áde déemaá”

29 Ngáne ane mod áhédé’áá aá mósuud yǎl nɔm, ansɛdéd aáken, “Nzé béchəgɛé wɛn nê?”

30 Atimtɛn mó, Yesue ankál ngan aá, “Mod a Israel nhóg akagé’áá eke, ambíd á Jerusalem, átimé á Jeriko. Ade ápédé á etũn-tê, bechíb bɛnkɔb mó, békɔbɛn mó chõm esyǎal éche ánwǎlɛ. Bɛmbɔmtéd mó kááj áhɛdé awé. Dóo béchénné mó á nkəg ní nzii.

31 Prise póg chómpɛ esyǔgkɛ’áá melemlem mé nzii. Dóo átáné ane mod. Ambamé nkəg ní nzii níminíí.

32 Mod a túmbé e Levi awě abelé’áá nsón á Ndáb-e-Dyõb‡ awě mómpɛ ampɛ áhed, bonj anyín mó, ambamé melemlem.

33 Bonj mod a Samaria nhóg awe atómé’áá ene nzii, ampɛ áhed. (Bad bé Samaria bóɔbɛ bad bé Israel béechemtannaá.) Ade ányíné mó, anwóg mó ngɔl,

34 ákɛ áhed, ahé mó mɛl á sii-tê, ákanj chó, bonj ápɛmɛ mó á ésel mɛn. Apɛéné-’aá mó á dyad-tê, bonj ásɔnlɛ mó á ndáb e beken, ábõngɛ mó. 35 Nɛɛ bɛn é’sángé ahúd e’kálé é’táan, ábag nwóó ndáb aá, ‘Téd nɛn, étognan anén mod, kéchéé émpɛe éche wébɛbɛdte, mɛtimtéd wɛ ámbíd á ehúu.’ ”

36 Héɛ Yesue ásɛdteé ane meléede a mbéndé aáken, “Atínté e ábê bad bɛláán ábe bɛntán ane mod awě bechíb bɛnləgɛnnɛ, ahéé anlúméd aá módɛ waáb?”

‡ 10:32 *Mod a túmbé e Levi*: Dyõb dɛmpwɛd enén túmbé ábɛl nsón á Ndáb-e-Dyõb. Bɛwõngánnáá prise ánabe Ndáb-e-Dyõb áte ne ábonɛn ntíi ní mɛnde.

³⁷ Meléede a mbéndé ankwentén aá, “Ane awě anwóg mó ngɔl.” Héε Yesuε álângeé mó aá, “Käg-kō, wémpē ébele’ melemlen.”

Mataa bó Maria békóbe Yesuε nken

³⁸ Yesuε ne ábē bembapεε bēmpě mwă dyad nhóg. Mmwaád nhóg awe béchágé’áá bán Mataa ankōb bó nken.

³⁹ Ane mmwaád mwănyan abédé dñn bán Maria. Maria anhyě Yesuε adyεε á nkæg, áwóg mekan níme áyágté’áá.

⁴⁰ Boη Mataa anhágén áte ne nsón ní ndáb-te. Dóó áhyédé Yesuε aláa aá, “A-Sánjú, weenyínéé nén wεé, awem mwănyan atědnédé mměmpen nsón rísyāēl-ε? Láá mó wεé, áhyε áwōngen mε.”

⁴¹ Boη Yesuε antimtén mó aá “A-Mata, nlém rítage wε áte áyāle ekud é mekan.

⁴² Boη dyam ádé ahóg áde ákóó etógnén abé. Maria apwεdé dó, ádé-’ε bwâm. Meéhēlēē-’áá se mbel se békōbēn mó dó.”

11

Ayáged dé mekáne
(Mat 6.9-13, 7.7-11)

¹ Mbwe nhóg Yesuε ambé hōm, ákánne’. Ade áamáá akáne awě mbapεε nhóg anláá mó aá, “A-Sán, yágéd sé ngáne békánneé ngáne Jone án’yágēdtē ábē bembapεε.”

² Yesuε anláá bó aá, “Nzé nyêhede akáne, nyéhôb bán,

‘A-Tê, edúbé ébê ne ádon dñn.

Mmon nkamlen ríhyε rítéd etál.

³ Bǎg sé echɛd ndyééd e epun é bǐn* mbwɛ téé.

⁴ Lagsén sé nǐmɛd mbéb,

áyāle sémpē sêlagsan mod téé awě apǎnné sé,
weémwāg se sêhún á mekǎgsɛn-tê.’ ”

⁵ Dóo áhóbɛé aá, “Nzé ewóó wěn, boŋ ekií áwē melúde wɛé, ‘Amúē, bál mɛ e’wɛle é’láán hê,

⁶ sôn, nkúde nken awě achabé abíd, awem nsón-a-echoŋ apedé áwēm. Meewóo-’áa chǒm-éé ríchágtanné mó.’

⁷ Boŋ ane wěn mó-’ɛ atǐmténé wɛ á ndáb-te aá, ‘Weétagté mɛ. Mmaá mɛ ekob adib, syāabe ábēm bǎn sêmaá anaa ásē. Méehɛnlé apáde ásē ábɛ wɛ chǒmchǒm.’

⁸ Nláa nyé á mbále mɛé, saké ké echoŋ éche nyédíí, chóo épād mó ásē. Boŋ abádnɛn áde wébádnɛnnē wěn, dóo dékǎŋ boŋ apádé ásē, ábɛ wɛ kéchéé éche éhɛdɛé.

⁹ Nlǎnge nyé nén mɛé, hɛdén Dyǒb, ábɛ wɛ. Hěd, Dyǒb débɛl enyín, kǔm ekob, Dyǒb dédibnéd wɛ.

¹⁰ Ayāle kénzɛé awě ahědné Dyǒb, ákǔd, awě ahɛdé-’ɛ, ǎnyín. Kénzɛé-’ɛ awě akumé ekob, Dyǒb dédibnéd mó.

¹¹ Nyé besáá bé bǎn, nyé ahéé mwǎn áhɛdénné súu, boŋ mó-’ɛ átímé ébagé mó nyǎ?

¹² Káa nzé ahědné wɛ akii á kúb, boŋ wɛ-’ɛ étímé ébagé mó ngabobɛ a mpwɛn?

¹³ Nzé e’bɛbtéd é’ bad nɛɛ nyé nyébage ábɛn bǎn kǎse é bwēm, tógtén-naá echɛn Sǎŋ awě adé ámǐn? Chán-nō éebaá bad Edǎódəŋ éche Ésáá ábe béhédné mó chó.”

* **11:3** *Ndyééd e epun é bǐn; káa ndyééd e epun éche éhúé’.*

*Yesue eesaa nlatén ne kâh e e'daádəh bé mbéb
(Mat 12.22-30; Mak 3.20-27)*

14 Epun ehóg, Yesue abídté'áá mod edaádəh é mbéb áte éche ênkwið ane mod ebóbé. Ade é máá mó abíd áte, ane mod ambootéd dyam ahób. Nén, dénkōbēd ndun e mod echē ebédé áhed menyáké bwāmbwam.

15 Boḡ nguse é bad énhōb bán “Belzebule, kâh e e'daádəh bé mbéb móo abage mó ngíne ábíded bad e'daádəh bé mbéb áte.”

16 Bémpee ábe béhéde'áá mó akəg áte bénhōb bán, álúmed bó e'chemléd ábe é'húú ádyōb.

17 Mó-ε ambíí mímāb mewēmtən, né-ōó, anláá bó aá, “Aloḡ ké ahéé áde ákábne áte, boḡ nchemtən méesě, débēb. Abum á ndáb áde nchemtén-ne méesě, dōmpē dēpāntēd áte.

18 Nzé édé bán, nkamlən míme Satanε íkábne áte, chán-nō méhenlé atyéem? Nhóbe nê áyāle nyéhóbé bán, mbídte' bad e'daádəh bé mbéb áte ne ngíne echē Belzebule.

19 Nzé ngíne eche Belzebule chóo mibenladté ábíded bad e'daádəh bé mbéb áte, né ngíne eche nzéé-ōó ábēn bad ábe bébíde e'daádəh bé mbéb bébenladté? Bēn bóo békwið nyé nkáá.

20 Boḡ ngáne édíí nén bán ngíne e Dyōb chóo mibenladté ábíded bad e'daádəh bé mbéb áte, nê álúnte nén bán nkamlən ní Dyōb nípedé áfinté echēn.

21 Nzé ngíne e mod ebōhséné yāl, enone adē dyad, échē chōm ké ehóg éekagké hōm.

22 Boḡ nzé mod awē atómé mó ngíne, abulé mó áte, abwōgké-ε mó, abelé ákōbēn bwēm ábe áwannéé nzum, ákabtéd-te bwēm ábe ákóbne mó.

23 Né-ɔ́, kénzée awě eésě ne me, né atāngan me. Ane awě eewóhgan me álad, apáa páán.

Nzé edáádəŋ é mbéb étimé mod á yāl ámpē
(Mat 12.43-45)

24 “Nzé edáádəŋ é mbéb ébídé mod áte, ébelé ébwāgē á ehyánge áhed abwóg áde ákōmméé áte. Nzé éekude, ébelé éhób aá, ‘Mětim ámbíd á ndáb eche mémbídtē áte.’

25 Ape áde épagké-’ε, ébelé étán née ndáb ésáá áte, bénábpé-’ε chó áte.

26 Héε ékagké bɔɔb, éke épēēn e’dáádəŋ bé mbéb bémpēe saámbé ábe é’dé ebébtéd tómaa mwēn, bon é’hye é’sól ane mod áte, é’bwóg-ke e’dii áhed. Akēn eched, ane mod abāg ebébtéd tómaa ngáne ánsēbēē abé.”

Menyinge mé mbále

27 Bɔɔb-pɔ́ áde Yesue áhóbé nê, mmwaád nhóg átíntē e bad, ankánéd ehób ámīn aá, “Nnam núbê ne abum áde áchyáá wε, ne abii áde ámwánjté wε.”

28 Yesue anhób aá, “Nnam mébē dásō né bad ábe bėwógé’ Eyale é Dyōb, bėbelé-’ε ngáne éhóbéé.”

Bad bé’ chii béēhīdēē e’chemléd dīd
(Mat 12.38-42)

29 Amute á bad dēmbootéd akəl. Héε Yesue áhóbéé nén aá, “Nyongel e’chii edii nyongel e e’bébtéd é’ bad. Béhéde e’chemléd bé menyáké anyín, bon béekudté, nzése e’chemléd bé menyáké ábē Jonaa.

30 Nyaa eche Jonaa ámbēē née e’chemléd wée bad bé Ninive, chów Mwǎn-a-Moonyon ábēē wée enén nyongel e bad.

³¹ A Mbwe mé Nkáásé, mmwaád awě akamlánnáá alon á Seba, anyemé á son-tê, nchoo ne nyongel e bad bé e'chii. Abíid mbón echě ěkwid bó nkáá. Běkwě nkáá áyāle ambíd se nchabnede wēε nkōnsé n̄sógé, āhyε déwógl̄en mam mé debyéé míme Solomonε áyágté'áá. Bon chii n̄n mod adé h̄n awě átómé Solomonε.

³² A Mbwe mé Nkáásé bad bé Ninivε bényemé á son-tê nchoo ne en̄n nyongel e bad. Bébíid mbón echě ěkwid en̄n nyongel e bad nkáá, áyāle bad bé Ninivε b̄nt̄edé m̄mab mbéb áde Jonaa ânkaléé bó Eyale é Dyōb. Bon chii n̄n mod adé h̄n awě átómé Jonaa.

*E'nyinen bé ekide é' yāl e mod
(Mat 5.15, 6.22-23)*

³³ “Modmod eémāā'é etrukán achod se ákōō chó káa akúdt̄n chó † á ebwōg-sé. Bon abelé ákēlē chó dásō am̄n, ābel bon kenzéé awě asóle á ndáb, anyinne ekide.

³⁴ D̄id d̄óo adé ngáne etrukán é yāl e mod. Nzé d̄id ákénlé wε áte, echoŋ yāl esyāál chómpē ebélé ekélé. Bon nzé déēk̄enle, yāl chómpē ebélé elón wε ne ehint̄n.

³⁵ Né-óó, nyētóo, ābel chōm éche énȳnte nyé ekide, éetimé abé chōm éche étimte'nyé á ehint̄n-tē.

³⁶ Nzé édé bán echoŋ yāl esyāál elóné ne e'nyinen bé ekide, ésebán ehint̄n édé abwōg ké ahóg, né yāl ěmwaá áte, melemlem ngáne etrukán ép̄entéé ekide.”

† **11:33** Donge á kálag dé'só éewóó'é káa akúdt̄n chó.

*Yesue aselé Befarisia ne bemeléede bé mbéndé
(Mat 23.1-36; Mak 12.38-40)*

³⁷ A póndé eche Yesue áhóbéé nê, Farisia nhóg, anchélé mó aá, áhye búmwō bédyê ndyééd áwe ndáb.

³⁸ Né-ó ankě, asól á ndáb-te, búmwō bédyēē á tébele. Ane Farisia ambé menyáké ányín bán Yesue eéwopéé mekáá ngáne éhédnádtáá, boŋ ábootéd ndyééd adyé.

³⁹ Dóo Sánḡwéé álânḡéé mó aá, “Nḡné’, nyé Befarisia, nyéwobpe mbwendé ne dīse ámbīd e ebwóg, boŋ adum á bwēm ne ebébtéd bóo bélóné áwēn nlém-tê.

⁴⁰ E’dimdim é’ bad ngên! Mod awě ahagé ámbīd e ebwóg, saá mó ahagé káḡne áte-yé?

⁴¹ Boŋ nyétêd bwēm ábe é’dé áwēd-te, nyébage’ betóótōkē bé bad. Né chōm ésyāāl áyāl echên ésāŋ.

⁴² “Medim ne nyé, Befarisia! Nyétéde ké meseb ne nduu ne byaá ábíníí é’syāāl bémpēe, nyébage Dyōb donḡe nhóg áfíntê e moŋḡe dyōm. Boŋ nyééhēdēē e’boŋ bé nlém ne edāḡe é Dyōb alúmed. Nyētāḡéné nímén mésyāāl abel, ésebán nyêchōbte’ nímíníí.

⁴³ “Medim ne nyé Befarisia! Nyédəə metii mémháá adyéé á ndáb é mekáne, nyédəə-’e melentēn mé edúbé akud á dyōn-tê.

⁴⁴ Medim ne nyé! Nyédíí nēe soŋ éche ésóómé, éche bad bétóméé ámīn, ésebán bēbíí.”

⁴⁵ Dóo meléede a mbéndé nhóg álânḡéé mó aá, “A-meléed, nzé ehóbe nê nédē né esyáá’ sémpē.”

⁴⁶ Yesue ankwētén mó aá, “Medim ne nyémpē bemeléede bé mbéndé! Nyépēmtad bad nted

míme ríléle apém, boŋ nyébën nyéebanéé ké ekáá âpémed bó mó.

⁴⁷ Medim ne nyé! Ayāle nén, bekal bé'dáádəŋ ábe besóó bənwū'é, nyélónǵé bó soŋ.

⁴⁸ Né-ɔ́ nyébíde' mbón, nyélúmte-'ε bán, besóó bēmbel bwām ngáne bənwū'é bekal bé'dáádəŋ. Nyé-'áá nyélónǵé bó soŋ.

⁴⁹ Ayāle nê, Dyōb ne áde debyéé anhób nén aá, 'Mēlōmē bó ábēm bekal bé'dáádəŋ ne bembapεε bé nlomag, bēwū behóg, bēhəǵké-'ε ábíníí.'

⁵⁰ Né-ɔ́, enén nyonǵel e bad chóó ěkūd nkóǵsen áyāle bekal bé'dáádəŋ bésyāal ábe mímāb mekií mésyǵké se á mbooted mé nkōŋsé,

⁵¹ mbooted ne mekií míme Abεε átimé' wéε Sakaria, awě bənwū'é átínté e menyán mé mendε ne hōm áde ásáá. A mbále, enén nyonǵel e bad ěkūd nkóǵsen áyāle mímē mekan mésyāal.

⁵² "Medim ne nyé bemeléede bé mbéndé! Nyékáá e'kii bé ekob é debyéé. Nyébën nyéesaá asól, nyékáá-'ε bad bémpēe ábe bēhede asól."

⁵³ Ade Yesuε ásyəŋǵéé áhed áke, bemeléede bé mbéndé ne Befarisia bēmbootéd mó ahób bwāmbwam, bésedté-'ε ekud e mekan.

⁵⁴ Bébélé'áá mímén mésyāal áhíined mó melám ábel békóben mó awusé.

12

Elébé tǵŋǵene bad bé elǵǵé

(Mat 10.26-27)

¹ Ambíd e pónde ndun e mod enladén áte, káəŋ etál éebédéé. Dóó Yesuε ábóótédé bó akalən, mbooted ne bembapεε álǵŋē bó nén aá, "Nyétéd

póndé ne elanǵé éche Befarisia, édé nêṅgáne esultɛn.

² Dyamdyam déesaá á e'koṅnéd-te áde déebíd áwed. Ké ahóǵ-ke déesaá, áde ásóómé boṅ bán déebyéénné.

³ Dyam ké áhéé-'ε áde nyéhóbé á ehintén-tê, déwǒgnéd á e'nyínen bé ekíde. Dyam áde nyékálé-'aa á kun-tê ámbíd e ekob, dékanléd á nhéné.

Ane awě bétǵǵéné abǵṅ

(Mat 10.28-31)

⁴ “Amúǵ, á mbále, nyéewógé mbwǒǵ ne moonyon awě ahele awúu ekob é yǎl ésebán ahele dyam démpǵe abel. Awǎb eetóméé nê.

⁵ Nlǵa nyé meé, mod awe nyétǵǵéné abǵṅ, adíí ane awě néε ámáá wε pemε e alongé akoben, awóṅ-'ε ngíne echě ábwéméé wε á dǵ-á-muú. Ne mbále ane móo nyétǵǵéné abǵṅ.

⁶ Eesaá mbále nén bán, kábpe ébe ngên, chóo béchannéé ndun étáan-ne? Boṅ ké nê Dyǒb déechatǵnné ké pǒǵ.

⁷ Dyǒb ábíí kǵǵǵne mesonǵé mé e'sid ábe é'dé nyé á nló. Né-ǵó, nyéewógé mbwǒǵ, nyédé etóǵnén tómaa ndun, ké êmbuú ké áte.

Akob Yesuε kǵa abǵṅ mó á yǎl

(Mat 10.32-33, 12.32, 10.19-20)

⁸ “A mbále, kénzée awě ábíd me mbón á'sǒ é' baányon, Mwǎn-a-Moonyon mómpǵé ábíd mó mbón á'sǒ é' ángel é Dyǒb.

⁹ Boṅ mod awě abáá me áyǎl á'sǒ é' baányon, me-'ε mǵbǵṅ mó áyǎl á'sǒ é' ángel é Dyǒb.

¹⁰ Kénzée-'ε awě ahóbé eyale é mbéb tǵṅǵene Mwǎn-a-Moonyon, ákǵd alagsen, boṅ kénzée awě

ahóbé e'bébtéd é' mekan t̄ηgene Edə́ədəη éche Esáá éekudté alagsen.

11 Nzé édé bán bésómné nyé wée belyáged bé dyad ne benkamlene, nyéētāgē áte, ngáne nyékāā' é káa dyam áde nyéhōbpē,

12 áyāle nzé póndé epedé, Edə́ədəη éche Esáá éyāgēd nyé chōm éche nyétāngéné ahób."

Ngan e eyókél é nhon mí mod

13 Atíntê e ene ndun e mod, nhóg anláá Yesue aá, "A-meléed, láá mwānned wée ákabe sūmō mbwóg áte."

14 Boη Yesue antimtén mó nén aá, "Nzé-módé abānné me née mod awē akáadte' bad, ákabe nyé mbwóg áte?"

15 Dóo álāngéé bó moosyāál aá, "Nyêtóo, nyéebanné nlém áyāle awóη á bwēm, áyāle saké nhon mós ndide moonyon á alongé."

16 Ankalé-'ε bó ngan aá, "Nhon mí mod nhóg mémbe. Anwóη nzag. Ade ene nzag échyáá, embidéd medyé nkute ne nkute.

17 Nhon mí mod mē ménhōb áwe nlém tē aá, 'Chán mébenlé bōob áde etál éelyāgēé wée ríkonḡéé medyé?'

18 Dóo ádólé áte chóóη boη áhōbē aá, 'Nén dóo mébenlé. Mēpāη échem ndáb é e'konḡéd, nlóη émpēe éche ékálé áte, boη nkúm medyé áwēd-te, ne nhon nímēm rísyāál.

19 A póndé eched-taá mélāā' é échēm edə́ədəη mēé, nlădté yāl nhon míme médyéé mwé ne mwé. Bōob-pōó mēched yāl, rídyāg, nímwāg, ríchogé-'ε alongé.'

²⁰ Bon Dyöb dénlāā mó nén, aá ‘Edimdim é chöm chén. Nkuu nén dĕn mĕkobĕn wε pemε e alongé. Abĕ bwĕm é’syāāl ábe émáá-’aá alad áte, nzé-módé wĕlyāgnĕdtĕ bó?’

²¹ Nĕ dŏo édĭí ne ké nzé-módé awĕ akúmmé yĕl nhŏn, bon eēsĕ nhŏn á’sŏ é’ Dyöb.”

*Weētāgĕ áte á alongé
(Mat 6.25-34)*

²² Dŏo Yesuε álāngĕé ábĕ bembapεε nén aá, “Né-ŏŏ nyĕētāgĕ áte á alongé se nyéhŏbĕ nén bán cheé nyĕdyĕĕ, ké’ε cheé nyĕwāā’ĕ á yĕl.

²³ Alongé átómé ndyééd, échen yĕl-le ámpĕ edé etógnĕn tŏmaa mbóté.

²⁴ Nyénŏne’, nkŏnĕkŏn. Méĕwĕnĕĕ bwĕm, méĕpādĕĕ, méĕwŏo-’áa hŏm áde bĕkŏngĕé medyé. Kĕnĕ, Dyöb adídte mó! Nyĕebĭí’ĕ bán nyĕdé etógnĕn bwāmbwam tŏmaa menŏn-ε?

²⁵ Nzé-módé áwĕn tĭntĕ ahele átāg áte káŏŏ, abád ké epun ehŏg áwĕ alongé áyāle átagĕé áte?*

²⁶ Nĕε nyĕ modmod nyĕehelĕé mpĭn mé akan nĕε nĭmĕ abel, cheé ékáŏ bon nyĕtagé áte áyāle mam nĭme mélyágé ásĕ?

²⁷ “Nyénŏne’ mbonja ngáne ékwogĕé. Eebelĕé ntŭ, éebāngĕé mesāŏ. Nlāngĕ nyĕ nén mĕé, ké kĕŏ Solomonε ne nĭmĕ nhŏn nĭsyāāl eewāa-’aá mbóté éche épédé échĕn mbonja ké pŏg e’bon.

²⁸ Nzé Dyöb áhelεε áwāādtĕ e’sum ábĕ é’bāg chĭi bon chān bĕhé bŏ á dŭ, né éetómmé nyĕ awāad né-yε? Chān adúbe ádíí nyĕ mwāmpĭn nĕn?

* **12:25** *Abád ké epun ehŏg áwĕ alongé káa áchab tŏmaa ngáne adĭi.*

29 “Nyéēbanné nlém bán, cheé nyédyēē káa cheé nyémwēē. Nê déetagté nyé.

30 Echê nyaa é bwēm chóo bad bé nkõhsé béchyεε’ é akud. Awên Titée mwën abíí áá nyétógnéné ábén bwēm.

31 Né-óó, nyésébe nyéhed mam mé nkamlen í Dyõb, dóo Dyõb débéé nyé ábíníí bwēm.

Nhòn míme ndé ádyõb

(Mat 6.19-21)

32 “A-bãnbãn, nyéewógé mbwæg. Echên Sán awóó mewêmten míme mésáá ábe nyé ngíne e nkamlen.

33 Nyésóm áben bwēm, nyébag betóótõkē bé bad mone. Nyéhed ekwe é ngáb éche éhelé amaa ásē. Nyéhê nhòn nímēn á e’kõnnéd ábe é’dé ádyõb, wée dyamdyam déebenlé mó, wée bechíb béehenlé mó achíb, sii-’ε éehenlé mó adyé.

34 Nyêbíí bán wée nhòn mbágkē mod, áhed dóo nlém-me mbágkē mó.

Mod-tée ábê mbohsén

35 “Nyépûd abad, nyéchod-te etrukán,

36 nêngáne bad ábe bésine’ echab sán awě akií á ngandé e e’wóngé ábel boñ nzé ahúú húén, boñ akumé ekob, bédnedé mó ábwæg-ábwæg.

37 E’boñ é’ yál áte ne bembaledé ábe echab sán épéé, boñ atán ngáne bedyéé epin, bésinéé mó. A mbále ábohsén, ádíid bó ásē, atómtéd-te bó ndyééd.

38 Ké melúde dóo âmpéé, káa epog é mbwembwe, boñ atán bó melemlem, e’boñ é’ yál áte bélyæg é’tán bó.

³⁹ Nyébii-’ε bán, nzé nwóó-ndáb abyéé’áá póndé eche nchíb áπεέ, né ádyéé epin, ésebán atεdte aá, básal mó ndáb.

⁴⁰ Nyémpé nyétánǵéné mbonǵén abé, áyāle Mwǎn-a-Moonyon ǻpě á póndé eche nyéewēmtεnεé bán ǻpě.”

*Mbǻledε awě abεle mímē nsón
ne nlém nhóg ne awě eébēlē’
(Mat 24.45-51)*

⁴¹ Petro ansεdéd aáken, “A-Sǻn, sé bēn pεn-εé ékanléé enén ngan-ε, káa bad básyāāl?”

⁴² Sǻngwéé ankwentén aá, “Né-ǵó, nyé mod té ábê néε mbǻledε awě awóó debyéé, awě abele-’ε mam míme eche sǻn álánǵé mó aá ábεl. Mó adé mbǻledε awě eche sǻn ábánné aá ákamlen bembǻledε ábíníí, ányín-ne nén aá békúdé ádáb akab á ndyééd póndé echě etánǵéné.

⁴³ Nnam mébē ne ane mbǻledε awě eche sǻn áhūū’é, bon atán nēnǵáne ábεléé mam míme ányǻgtēnnē mó.

⁴⁴ Ne mbále, nlánǵe nyé nén mεé, ane mbǻledε eche sǻn ábané bwēm é’syāāl ábe áwóó áwe mekáá aá ákamlan.

⁴⁵ “Bon nzé ane mbǻledε adé mbǻledε a mbéb, bon ahóbé áwe nlém-té aá, ‘Ebēm áte bon echem sǻn áhūū á eke-tē.’ Né-ǵó aboótédé ábíníí bembǻledε bé bebaád ne bé baachóm ábe bédé ásē eché awanεn, ádyág bwēm, ámwág-ke mím mékóbe mó,

⁴⁶ ane mbǻledε eche sǻn áhūū epun éche éewēmtεnεé ne á póndé echě énkēmbíí’é aá áhūū. Né bēbwēm mó á ebwóg,† békóǵsén-ne mó ne nhel

† **12:46** *Bēbwēm mó á ebwóg káa básēl mó áte e’són é’bε.*

melemlem ne bad ábe béwúú nló áte.

⁴⁷ Ane mbəledε awě abíí ntíi mé nsón míme sáá-andáb, boŋ eéboŋsene, káa eehíde mímē ntíi ámbíd, ákud mbéte e ngíne.

⁴⁸ Boŋ ane awě enkēmbíí ntíi, boŋ ábelé epandé, békūdē mó kúdtén. Mod ké ahéé awě bébúdé abε, né-'aá bébudté mó ahεden. Ane-'ε awe bétómténé abud dé abε, né-'aá bétōmēnnē mó abud dé ahεden.

Yesue aá mápééné nkabén

(Mat 10.34-36)

⁴⁹ “Muú móō ríhyédé akwéd á nkōŋsé. Mendəŋ-'ε mεé, né mēmmad akóben.

⁵⁰ Boŋ ntəŋgéné nsébé ríkud edusen é metuné, mēmăd-te chó akud boŋ nlém mēpwiitéd mε.

⁵¹ Nyēwēmtan bán, nsəŋ móō ríhyédé apεen á nkōŋsé-yε? Aáy, saké nsəŋ, nkabén móō mápééné.

⁵² Bootya bəəb áke á'sō, ndáb echě ewóó bad bétáan ékabén áte, béléáán bétəŋgén bébe, bébe-'ε bétəŋgén béléáán.

⁵³ Kəkəə əbē.

Sáá áttəŋgēn mwăn a mwεnchóm,

mwăn a mwεnchóm áttəŋgēn sáá.

Nyaá áttəŋgēn mwăn a mmwaád,

mwăn a mmwaád áttəŋgēn nyaá.

Nyăŋkálé áttəŋgēn mwăn a mmwaád,

mod mwăn a mmwaád áttəŋgēn nyăŋkálé.”

E'chemléd é' bīn

(Mat 16.2-3, 5.25-26)

⁵⁴ Yesue anláá amute aá, “Nzé nyēnyíné mbag ébide á mbəŋ, nyēbelé nyéhób bán, ‘Mbúú échə bəəb’, ébenléd-te áned.

⁵⁵ Nyēnyíne-'áa epub éhúε' á pεd e mbəŋ, nyéhābē' bán, 'Enyεn ébēnēd mod bəəb,' ébé-'ε áned.

⁵⁶ A-bad bé elangé. Née nyépédé abii ngáne béláa'ε bin nén, cheé ékáá bon nyéēhēlē mam nime mébenlad nyé á'sō-te chii nén achem?

⁵⁷ "Cheé ékáá bon nyébēn nyéēhēlē adol áte nén bán, kase e akan nén echē ehεdnad abel?

⁵⁸ Nzé mod ahóbé aá, mókεεne wε á kóte, hēd nzii káəŋ nyúmō bétim áse á nzii. Esebé nê, nzé ahédé wε á kóte, kóte chό-'ε ēbεé wε á mekáá mé plúse, plúse chό-'ε éhē wε á mbwəg.

⁵⁹ A mbále, nlāŋge wε meé, weéhēlēē-se ebíd á ndáb e mbwəg-tê wê káəŋ né etwedé ádōŋ alúm ásyāāl."

13

Nyétεde abel dé mbéb, nyétimεn Dyəb

¹ Ade Yesue ádíi ahóbéé nê, dōo nguse é bad éche émbē áhed élāŋgeé mó ngáne Payledε ánwū'ε bad bé Galilia áde bεbágé'áá Dyəb mendε mé e'lém.

² Yesue antimtén bó aá, "Nédē mewēmtεn médé nyé bán, ábē bad bé Galilia ábe bēnkūd échē eben, bétómé ábiníi bésyāāl ebébtéd abé áyāle bēnwēē ene ndín e kwééd-ε?

³ Aáy! A mbále, nzé nyéētεdte nímεn mbéb se nyétimεn Dyəb, né nyé moosyāāl nyéēwé, nyébós-'ε.

⁴ Chán-náa ábiníi dyōm á mod ne waam ábe ntōŋ-ntōŋ ní ndáb ménkūmtēdtē ámín á dyad é Silom, bon bεwé? Nédē mewēmtεn médé nyé bán, béntōmtēn ebébtéd abé tómaa bad bésyāāl ábe bēnlōŋ á Jerusalem-ε?

⁵ Aáy! A mbále, nzé nyéētēdte rímen mbéb se nyétīmēn Dyōb, né nyé moosyǎál nyéēwē, nyébóó-’ε.”

Ngan e bwel ábe béēchyāā

⁶ Hée Yesue ákálé ngan aá, “Mod anwōŋ alín á bwel á nzag-tē. Ankě epum é bwel ahed áwedé-mín ngen ne ngen, boŋ enkēnyínné ké ehóg.

⁷ Hée álāŋgēé nnōn-a-nzag aá, ‘Edé bōob mwě ríláán áde rípagké á bwel-sé hén mwě téé, boŋ meenyínéé epum ké ehóg. Kwel bó. Chán é’hele é’madé ahóŋ á ndōob-tē ngēn?’

⁸ Hée nnōn-a-nzag átímtanné mó aá ‘A-sāŋ, tēdé bó ké mwě nhóg ámpē. Mēnabé bó ásē, nhíí-’ε bó nkúmbág.

⁹ Nzé é’chyáá e’pum mwě ríme ríhúé’, né édé bwām. Nzé-’ε béechyáa, né békweł bó.’ ”

*Yesue adidé mmwaád nhóg
bwām á Mbwe-mé-nkóme-áte*

¹⁰ Mbwe-mé-nkóme-áte nhóg, Yesue ayágté’áá bad á ndáb e mekáne póg.

¹¹ Mmwaád ambé áhed awě edǎǎdǎŋ é mbéb émbēē áte á etún é dyóm á mwě ne waam. Embēł mbíd enwúmēn mó nyaa echě éhelaá yǎl asále áte bwām.

¹² Ade Yesue ányíné mó, anchélé mó, aláá mó aá, “A-nyan, nkole ríme ékonléé rímáá.”

¹³ Ade ábáné mó mekáá á nló, ane mmwaád ansalé yǎl áte ábwōg-ábwōg, ábootéd-te Dyōb akēn.

¹⁴ Hée mod awě abédé nló á ndáb e mekáne, alíí áyāle adid áde Yesue adidé ane mmwaád bwām á mbwe-mé-nkóme-áte. Alāŋgē bad aá, “E’pun é’dé ntóób ábe mod átāŋgēné nsón abel. Nzé nyédǎǎ

bwâm adyεε nyépē ábê e’pun, saké á mbwε-mé-nkóme-áte.”

¹⁵ Héε Sánḡwéé ákwεntanné aá, “Nyêdodge bad. Nyé ahéé eéhunné nyag káa ésel á ebem-tê se ákēēn chó á edíb á mbwε-mé-nkóme-áte?”

¹⁶ Anén mmwaád adíi mwân awe Abrahamε. Satanε anhanj mó ne nkole á etûn é dyôm á mwě ne waam. Nyéláa με ké mbéβ móó rídé, áhúd mó á mehanḡé á mbwε-mé-nkóme-áte?”

¹⁷ Chõm éche ánhõbpē énwõḡed bad ábe bétánḡánnáá mó e’sõn. Moosyáál anwóg menyinḡe áyāle mam mé ményáké níme Yesuε ámbenlé.

Ngan éβε é nkamlen ní Dyõb:

Ngan e mbál níme níchiné

(Mat 13.31-32; Mak 4.30-32)

¹⁸ Yesuε anháb aá, “Chán nkamlen ní Dyõb níkóó abé? Cheé níhele níhḡtén mó-yēē?”

¹⁹ Ndíi nēḡáne mbwé e mbál-e-bũ echě mod átédé bonj ásob á nzag-tê. Ade ékwógé, étím bwel bēn, menḡn méhyě mélõḡ á nḡen-tê.”

Ngan e esulten

(Mat 13.33)

²⁰ Yesuε ansédéd aáken, “Cheé níhele níhḡtén nkamlen ní Dyõb-é?”

²¹ Ndíi nēḡáne esulten éche mmwaád ámuúnédé asii á pân é mbumé ní nḡun éláán káõḡ ésule.”

Asól á ekob éche échiné áte

(Mat 7.13-14, 21-23)

²² Yesuε andíi ambé á eke-tê éche ákágé’áá á Jerusaleḡ. Dyad téé áde átómé’áá, ámbáá ne ásad, ayáḡté’áá bad.

23 Mod nhóg ansédéd mó aáken, “A-Sánjú, mesonǵé mé bad níme Dyöb désonǵé alonǵé, mébuú áte káa méebuú’é?” Yesue anláá bad áhed aá,

24 “Nyéwanen káəñ nyésôl á ekob éche éhíné áte, áyāle, á mbále, ekud á bad éwanén asól, bon béehenlé.

25 Póndé ɛpɛ echɛ nwóó-ndáb áhidéé ásē, bon ápēn ekob. Ene póndé dǔo nyébootédté atyéem á ebwǔg, bon nyékumé’ ekob nyéhōbē bán, ‘A-Sán, dibnéd sé ekob.’ Mó-’ε átimtén nyé aá, ‘Meebíí’é wéε nyébídé.’

26 Nyé-’ε nyéēhōb bán, ‘Syánē dendyé ndyééd, demmwé-’ε mīm hōm ahóg, eyǔgté’áá-’ε áwēd myad.’

27 Átimtén nyé aá, ‘Syánē deewōñné dyamdyam. Nyésyǔə me á dǐd-te. E’bébtéd é’ bad ngēn!’

28 Ade nyényinnē Abrahamε, Aisige ne Jakōbe bóōbe bekal bé’dǎádəñ bédé á nkamlen ní Dyöb-te, bon nyé pən nyéchág á ebwǔg, achii dé awé ne adyé dé meson á nsəl, dǔo détéđ etál póndé eched.

29 Bad bébíđ á akuu ne á mbəñ, á mekonekone ne á mehúléhúlé, bétéd medii á ngande e nkamlen ní Dyöb.

30 Á póndé eched, bad ábe bēnlyǧ mbíd bóo béťim á’sō, bé’sō-’ε bélyǧ mbíd.”

Yesue alebe áyāle bad bé Jerusalem

(Mat 23.37-39)

31 Melemlem mé póndé nguse é Befarisia êmpɛ wéε Yesue, bélāñǵé mó bán, “Syǎó hén, ékag hōm démpēe, áyāle kəñ Herōde ahede we awúu.”

³² Yesue ankwentén bó aá, “Nyéke nyéláa échê esɔb bán, ‘Chii ne chǎn mǎhūd bad e’dǎádǎn bé mbé́b áte, íchōōd-te bad, boŋ sùú ébe mǎmǎd nímêm nsón.’

³³ Boŋ ké chǎn ébēē, ntǎngéné abé á nzii chii, chǎn, ne sù ébe, áyǎle éeboó’é bán, nkal é’dǎádǎn áwê hǒm démpēe ésebán á Jerusalem.

³⁴ Wóowó! A-bad bé Jerusalem, nyêwúe bekal-bé-e’dǎádǎn nyéwúennē-’e bad meláá ábe Dyǒb álómé! Nkénwǎn áte ngen ne ngen álad nyé áte nêŋgáne nyaá-kúb ákútanné bán, boŋ nyéehédéé etál!

³⁵ Nyénǎne’, Dyǒb déte dé echen ndáb. A mbále, nlǎnge nyé nén mēé, nyéenyínénné me díđ ámpē káǎn ne á pónde eche nyéēhǒbpē bán, ‘Nnam ne ane awě apedé á đĩn á Sǎngú.’ ”

14

Yesue achǒŋté mod awě melóg mékóbé

¹ Mbwe nhóg Yesue ankě ndyééd adyé wéé ndǎle a Farisia póg. Nén démbē a mbwe-mé-nkóme-áte. Ade ápedé áwed, bénóné’áá mó chodchod.

² Mod mó-’e ambě áhed awě melóg mémbidtē á yǎl.

³ Héé Yesue ásedtēé bemeléede bé mbéndé ne Befarisia aáken, “Edé kunze ádid mod bwám á mbwe-mé-nkóme-áte, ngé éesaá?”

⁴ Boŋ bénkênhǒbpé dyamdyam. Dóo ákóbé ane mod awe melóg mébidé á yǎl á ekáá, ádidé mó bwám, asúúd-te mó á ndáb.

⁵ Ambíd e nê dóo ásedtēé bó aáken, “Nyé ahéé adé awě mwǎn káa nyag éhūnnē echóg, boŋ eékaŋ chǒ

abidede ábwōg-ábwōg, ké émbē bán á mbwε-mé-
nkóme-áte?”

⁶ Bon bénkênwōngé dyamdyam áhób.

Akε dé e'ken ne akob dé nken

⁷ Ade Yesuε ányiné bad ábe bēnlēbēē ádyé
ndyééd bésyāāl ábe bēpédé bēbóótédé medii
mémháá apwεd, ankalé bó enén ngan aá,

⁸ “Nzé mod alébpé wε ngande, weépāg-sε éhεdé
e'dii é'mháá, áyāle éhεle ébé né bélébpé mod
ampée awě adelé áte tómaa wε.

⁹ Nzé ene nyaa e mod epedé-'ε, mod awě alébpé
nyé moosyāāl ālāā wε aá, 'Bεé anén mod atii.' A
póndé eched dōó étiméé atii asad atéd ne akwáké.

¹⁰ Bon nzé epedé ene ndín e hōm, etédεé e'dii ábe
é'dé á ahāngé, ábēl nén nzé nwóó-ngande anyiné
wε, mōō ālāā wε aá, 'Amúē, ké édyεε á atii ámbhá
híníí.' A póndé eched dōó ékudεé edúbé átínté e
bad ábe nyāābōō nyétédé tébele.

¹¹ Né-óó, nyébíi bán, kénzéeé awě achágté yāl,
Dyōb désudéd mó. Kénzéeé-'ε awě asūdté yāl Dyōb
déchāgēd mó.”

¹² Hé-'aá álāngéé mod awě anlébé mó nén
aá, “Nzé ehóbé wεé, móchagé' ngande, weehóbé
wεé mólébpε ábon bēn, káa ábon baányan, káa
echon túmbé, káa bewōn bé ngáb ábe nyāābōō
nyébyééné. Nzé ehídé nē, né bómpē bēlēbē wε. Nē
ábεle átim ehéen ne metuuten.

¹³ Bon nzé echagé ngande, elébé dāsō betóótōkē
bé bad, ne bad ábe bēhúné epεd, bóōbε bad ábe
békwdé ndím.

¹⁴ Nzé ebélé nē, né wēkūd nsimé áyāle béehēnlé
wε asábe ámbíd. Dyōb désābē wε áde bad bé
bwām bēpuú'ε.”

*Ngan e sánkalaa a ngande
(Mat 22.1-10)*

15 Ade mod nhóg awě bóabe Yesue béntēd tébele áwógé nê, dóo álângeé Yesue aá, “Nsimé ne bad ábe bédyē ndyéed á ngande e nkamlen ní Dyöb!”

16 Dóo Yesue álângeé bó aá, “Mod nhóg anchäg sánkalaa a ngande, ábūd-te bad alébe.

17 Ade pónde e ngande épédé, anlóm awe mbaledε wée beken ábe ánlēbēē aá, ‘Nyéhyag, mboḡsén rísyā́l nímáá abé.’

18 Bon bó moosyā́l, bēmbbootéd mechánge abe nhógē-nhógē. Nhóg anhób aá, ‘Nchané etúú, ntángeéné chó akε dé anyín. Ncháa wε, méehenlé ahyε.’

19 Ampée anhób aá, ‘Bóab nén dēn, dóo ncháné nlád ní nyag rítáan éche élíε’ nzag. Chóo ríkagké ahagtεn nén. Són, méehenlé apε!’

20 Ampée-ε anhób aá, ‘Nkudé sómbé ekóólé-ekóólé. Né-óó, méehenlé apε!’

21 Ane mbaledε antīm ámbid, áke aláá eche sán mam mésyā́l. Dóo ekan ékóbé eche sán áte, bon álōmē ane mbaledε. Anhób aá, ‘Käg mehélé, ékag á ntém ní nzii, kóáḡne á mēte mé nzii mé dyad-tē, éhúen betóótōkē bé bad, ne ábe béhúné eped, ne ábe békwédé ndím, ne ábe béehelé akε.’

22 Eebeméé áte ane mbaledε anhúú ámbid, aláá sáá-a-ndáb aá, ‘A-sán, mbelé ngáne wénhōbpē, bon ké nê, etál élyágé édé.’

23 Dóo Sáá-a-ndáb áhóbéé aá, ‘Käg á nzii émbáá ne nzii é mehín, échéle kénzée wée áhyag ábel bon ndáb élón.

24 A mbále, mod ké nhóg awě ménsēbēē alébe, éewógké chōm ké ehóg á nsal á ngande-té hén!’ ”

Abé mbapεε
(*Mat 10.37-38*)

²⁵ Mbwε nhóg ndun e mod éhídé'áá Yesue ámbid. Héε ábóótédé bó aláa nén aá,

²⁶ “Nzé mod ahóbé aá, móhíde με, ésebán achădténé nyaá, sáá, mwaád, bǎn, baányan, kóǎne adē alongé dĕn, ene ndín e mod eékwognedéé ábē awēm mbapεε.

²⁷ Kénzéé awě eepéme adē awǎg, boŋ áhídnē με, eékwognedéé ábē awēm mbapεε.

²⁸ “Nzé-módé ábē awě áwōŋ mewēmten álōŋ sǎŋkalaa a ndáb, boŋ eesébpé adyεε ásē, áhǎgten nkun níme ene ndáb étēdtē mó, ábíi ké móǎhĕl chó amad, káa móǎhenlé?

²⁹ Nzé amaá-'ε ndáb asume, boŋ eéhele chó amad, moosyǎál awě anyíné abelé ábootéd mó awel, béhōbē

³⁰ bán, ‘Mod nhóg ansáá ndáb, boŋ eéheleé chó amad.’

³¹ “Nzé kǎŋ póg ewémténé waáb kǎŋ bel akum, abelé asébé yǎl ahǎg á ekáá ké mesongé mé sánze níme áwóó dyam dyôm dé ekále, béhĕl ábe waáb awě awóó sánze dyam móom mé ekále mébe.

³² Nzé anyíné aá móǎkwognedéé, abelé alóm belyáged bé dyad á'sō wéε waáb, waáb adēpe mó benben, ábel nén békôm nsan.

³³ Melemlem nê dǎǎ édíí né ké nzéé awě eehúde chǎm ásyǎál nlém. Ene ndín e mod eékwognedéé awēm mbapεε ábē.

Nkwě níme níbódé e'nyin
(*Mat 5.13; Mak 9.50*)

³⁴ “Nyébíi bán nkwě nídé chǎm é bwâm. Boŋ nzé níbódé alan, chán béhele-se bényīnēd mó ámpē?

35 Méesaá dyam dé abelen ámpē. Apim dōo bépiméé mós. Bad ábe bēwóó metúu, bésōn̄ten bwâm.”

15

Ngan e rídyon̄ ní mbód níme mém̄bōo (Mat 18.12-14)

¹ Mbwe nhóg belad bé tááse ne bebel bé mbéb bém̄pēe, bém̄p̄ wée Yesue.

² Dōo Befarisia ne bemeléede bé mbéndé bényon̄gēé áte bán, “Nédē anén mod awon̄ne bebel bé mbéb, bóbōo bēdyag-ke ndyééd hōm ahóg.”

³ Hée Yesue ákánlé bó ngan nén aá,

⁴ “Nzé-módé adé awē áwōn̄ mbwók̄el é rídyon̄ ní mbód, bon̄ nhóg níbōo, bon̄ eéted̄té nímn̄n̄í móom mé rídyon̄ ní mbód abog ne abog á etún-tē, áke dé ahed̄ nímn̄ē nhóg níme níbōó káon̄ né ad̄ib̄té mós?

⁵ Adibed̄ áde ad̄ibte-’áa mós, áhāg mós á abol ne menyin̄ge mésyā̄l.

⁶ Bon̄ n̄eé ápédé á dyad-tē álad besón̄ bé echon̄ ne baányan̄ áte, aláá bó aá, ‘Syánē déwōg menyin̄ge áyāle nd̄ib̄té nímn̄m̄ rídyon̄ ní mbód níme mém̄bōo?’ ” ⁷ Yesue ambád ámpē aá, “melem̄lem-’áa nílan̄gēé nyé m̄eé, menyin̄ge métōm abé n̄ē ádyōb̄ ámn̄in̄ e mbel̄é-mbéb nhóg awē at̄d̄é abel̄ dé mbéb bon̄ at̄im̄né Dyōb̄ tómaa ámn̄in̄ e móom mé bad abog ne abog ábe bésáá, ábe béehed̄nád ahon̄len̄.

Ngan e kábpe ech̄ embōo

⁸ “Káa, mmwaád ahéé adé awē áwōn̄ kábpe dyōm, bon̄ n̄eé póg ébōó, eéchōdē’ ekag, bon̄ áhed̄é ndáb áte, atón̄ ahed̄ káon̄ né ad̄ib̄té ch́ó?

9 Adibed áde ádíbe-'áa chó, alade baáb ne baányan áte, aláa bó aá, 'Nyéwóγεν με menyinge áyāle ndíbté ene kábpe echě embóó με.'

10 Melemlem-'aá rílāγγεέ nyé nén μεέ, menyinge métōm abé nê ádyōb ámīn e mbelé-mbéb nhóg awě atědté abel dé mbéb boη átīmēn Dyōb."

Ngan e mwān awě ambóo

11 Yesue ambád ahób aá, "Mod nhóg ambé, anchyáá bān bé baachóm béβε.

12 Dóo epun ehóg, mwān asad álāγγē sáá nén aá, 'A-sán, beé με ádēm akab á mbwóg áde rítāγγéné akud.' Héε sáá átédé chōm ésyāāl éche ánwōγγē, boη ákabpé bó áte.

13 Nguse é e'pun étómé-'aá, boη mwān asad áladé nímē nted rísyāāl, ákǎg á alonη démpēe áde áchábndé. Awed-taá ápédé boη ábootéd alonģé á mbaambaa achog, ábēbtē ngáb esyāāl echě ánwōγγē.

14 Ade chōm ésyāāl émáá mó áyāl né bōob, sánkalaa a nzaa anhún á alonη-tê wê. Atóg dō-'ε ábóótédé mó asól áyāl ngíne-ngíne.

15 Héε ákíi kunze e mod póg atán á dyad-tê wê, áchóm mwā nsón. Ane mod mó-'ε alóm mó aá, áke ádítdad mó esog é nguu.

16 Anwónη á mewēmtēn aá, mōlōntē abum ké ne medyé mé nguu, boη modmod enkēmbaá mó chōmchōm éche áhēlese adyé.

17 Dóo ádyéé chóón, boη ákwanlád, áhōbē aá, 'Nōnē' ngáne bembaledε bélóné echem sánη á ndábte, boη ké nê bedyág medyé méchōbe ásē, boη με-'ε ríwāg nzaa hén!

18 Měsyə́á, níke ntán echem sán, nláá mó meé, A-sán, mbélé mbéb á'sō é' Dyöb ne á'sō é'bôn.

19 Mmën meékwognedéé áchagned néé awon mwän ámpē. Téd me ké nêngáne awôn mbəlede nhóg.'

20 “Hê dōó ápádté ásē, bon ásūē' á dyad wéé sáá. Bon áde ákwógé ape á ndáb nê, sáá annyín mó mwă etún. Ankóbtén sáá ngəl. Sáá annyagéd, alúm mwän ámín, ahé mó tâl.

21 Dōó mwän álāngē mó nén aá, 'A-sán, mbélé mbéb á'sō é' Dyöb ne á'sō é'bôn. Meékwognedéé áchagned néé mwän awôn ámpē.'

22 Héé sáá mó-'ε áchénlé ábē bembəlede, álāngē bó nén aá, 'Nyéhiinad me nsob míme ítómténé adəñ nê, á mehélé-te. Nyéwáad mó mó á yəl. Nyéhê-'ε mó ebón á ekáá, nyéhê-'ε mó metámbe a ékuu.

23 Nyétéd nchóm-é-nyag awē dékálté nê, nyékwel mó, ábel nén, syánē moosyáál dédyê débél-le apaté.

24 Nyêbíí bán, awem mwän nén ammăd awé, bon atimé ámbíd á alongé. Ambóó, bon abídé áwed.' Hé-'aá bébóótédé ngande achog.

25 “Mmën mésyāāl mēmbenléd áde mwānyan ambáá adíí á nzag-tê. Ade áhúú, dōó áwógéé bad békóne, béságe-'ε bwēm á ndáb-te.

26 Dōó áchénlé mbəlede nhóg, bon ásedté mó dyam áde ábenlaad.

27 Dōó mbəlede ne álúmtéé mó áte nén aá, 'Pón mwānyon ahúú ámbíd-óó. Sóó akwēnlé mó nchóm-é-nyag ne, áyāle anyínen áde anyínné mó díd ámpē, ésebán dyamdyam ábélé mó.'

28-29 “Awóg áde áwógé nê, anlîḡ, eékwentene asól á ndáb-te. Héε sáá ábíde á ebwóg, boḡ áhye achán mó. Dóo mó-’ε átimtanné sáá nén aá, ‘Nḡné’, mēé nkéndyεén we hén mwē ne mwē áde mbenléε we ntũ mé nsón, ésebán nwúene we nló áte. Boḡ ké echεd é mbód weébāgēε me weé, mbel apaté ne ábêm bēd.

30 Boḡ ngáne awoḡ mwān a nlém ápédé ámbíd, mó awē amaá echoḡ ngáb esyāál abébed ne bekwalεε, ewúúde mó nyag echē etómténé akál.’

31 Héε sáá álāḡgēε mó nén, ‘A-mwān, we-εé edé ne me hén pónde ésyāál. Kéchéé éche níwóó-’ε édii échōḡ.

32 Embē bwām syánē áchog ngande, áwóg menyinḡe. Nén, mwānyoḡ ammad awé, boḡ atimé ámbíd á alongé. Ambóo, boḡ abidé áwed.’ ”

16

Ngan e mbaledε awē abédé mwane

1 Yesuε anláá ábē bembapεε ámpē aá, “Nhḡn ní mod nhóg mémbe. Bad bényhyε mó aláa bán awē mbaledε ambáá abéhte mó ngáb.

2 Héε níme nhḡn ní mod nílóme mbaledε awed achəḡ, boḡ ásedté mó aá, ‘Ebál é póle éhéε níwógéé áyāl echōḡ nén? Lúmed me áte ngáne mesoḡgé mé bwēm níme mēmbanéé áse echōḡ médíí, áyāle échē etál é nsón émááné we áte.’

3 Dóo mbaledε ádóle áte chóoḡ boḡ áhābē aá, ‘Chán-nō mébenlé bəəb áde echem sán áhεdeé me ahúd á nsón? Ngíne eésaá me echē níkwenléε nzag. Nzé ntimé-’ε á nchómbé, né nê dépiinéde me akwágké á ngíne.

4 Ahâ, nkudé debyéé áde méhægkê, âbel bonj ké á nsón dǒo bénhūdtē me, bad bélyǎg békōb me nken áwab mendáb.’

5 “Héε áchēnlé mod téé awě anwálé sáá alúm, áchægé bǒ nhógē-nhógē. Ade mod e’só ápédé, ansédéd mó aáken, ‘Mesonjé métǎj echem sǎj ékáléé wε?’

6 Ane mod aá, ‘Mbwókkel é e’kwém é’ mǒl waam.’ Ane mbǎledε anláá mó aá, ‘Nǎné’, echonj kálag e melúm chǒ nén. Dyéé ásē, étel á mehélé-te wεé, mbwókkel é e’kwém é’niin.’

7 Ansédéd mod awě alónténé béβε aá, ‘Alúm ádé wε mesonjé métǎj?’ Ane anhób aá, ‘Mbwókkel é nkute ní ngun éláán.’ Ane mbǎledε anláá mó aá, ‘Kǒb echonj kálag, étel wεé, mbwókkel é nkute éβε.’

8 Ade nímé nhǎn ní mod níwógé nê, ménkēmēd échē ekúkú é mbǎledε aá, ‘Abēnlédé debyéé á bwâm.’ ” Yesuε ambád áte nén aá, “Nê dǒo bad ábe béhíde mekan mé nkǒjsé bédíí. Bédé mehél áhægεn échāb nyaa é bad debyéé, tómaa bad ábe béhíde e’nyínεn bé ekíde é’ Dyǒb.”

9 Yesuε ambád aá, “Nlǎa-’ε nyé mεé, nyéβεnled nhǎn mé nkǒjsé, ákób e’chonj, áyǎle á pǒndé eche mémaá’é áte, békob nyé nken wεε bad bédyεε’é á ngíndé ne á ngíndé.

10 Ké nzé-módé awě awánlé mpín mé akan bwâm, né áwālē ámbáá bwâm. Kénzée-’ε awě eéhele mpín mé akan awále, né éehεnlé ké ámbáá awále.

11 Nzé édé-’ε bán, weewánléé ngáb e nkǒjsé ngáne étǎjgéné awále, nzé-módé ábě wε nhǎn ní mbále.

12 Néε wéewânléé nhǎn níme méesě nímonj bwâm, nzé-módé ábǎg wε nhǎn nímonj mwěn?

13 “Modmod eéhēlēē-se abé mbàledε a bewōŋ bébε. Alūmēd nhóg edəŋge tómaa aníní, ké’ε átīmēn nhóg, abánge aníní áyāl. Weéhēlēē-se ebé mbàledε a bad bébε abé ahóg. Weéhēlēē-se ebé mbàledε a Dyōb se ebé-’ε mbàledε a mənέ.”

Nguse é ngan éche Yesue

(Mat 11.12-13, 5.31-32; Mak 10.11-12)

14 Befarisia bēnwōg mímén mésyāāl, boŋ ngáne bém̄bēē bedəŋ bé ngáb, bēnswēdē mó swéd̄tén.

15 Yesue anláá bó aá, “Nyēdíi bad ábe bélúmte bán bésáá á’sō é’ bad, boŋ Dyōb ábíi nyé nlém áte. Kéchéé éche baányoŋ békēmtéé, édii abúú ngēn á’sō é’ Dyōb.”

16 Yesue ambád bó aláa aá, “Mam míme mēntenléd á kálag é mbéndé é Dyōb, bekal bé’dáədəŋ bómpē bēnhōb mó káəŋne á pónde eche Jōne. Taase nē, nkalaŋ mí bwām mé nkamlēn ní Dyōb níkanlad, mod téé-’ε abune mímē nkamlēn abé áte.

17 “Ké nēŋgáne nkoŋ rísé ne mí mín béhele bémaa, atote ké ahóg á mbéndé e Dyōb déekwaá.

18 “Kénzéé awē anané mwaád, boŋ awōŋ mmwaád ampée, né akábé asón. Ké nzé-móde-’ε awē awóó mmwaád awē bēnáné á ndáb e’wōŋgé, né akábé asón.

Ngan e nhən mí mod ne Lazarose

19 “Nhən mí mod nhóg mém̄bē, kəse é mebad chóo áwáá’áá á yāl. Mwenze ne mwenze móo ádyágáá mbwe téé.

20 Ntógétōke mí mod nhóg mó-’ε rínánge’áá áwē mmwe mé e’ké bán Lazarose. E’kwese bēnlōn mó á yāl.

21 Mewêmtɛn mém̄bē mó aá, bébe mó púuted é medyé éche éhúné'áá á tébele a nhɔn ní mod. Mbwé ch́o épágé'áá áhed, boŋ ényāŋgē mó e'kwɛɛ áte.

22 “Ade ntógétoke ní mod mē ŕwédé, ángel éntēd mó, ékēēn mó á akéb áde Abrahamɛ. Mmē nhɔn ní mod mómpē ménwē, bélime-'é mó.

23 A mbwóg e kwééd wê, nhɔn ní mod mbédé á metuné-te. Héé ányéné nló ám̄n boŋ anyín Abrahamɛ se wíníí, ne Lazarɔɛ áwe akéb.

24 D́o alébpéé nén aá, 'A-Tê Abraham, sôn, wóg me ngɔl, élóm Lazarɔɛ átode dúu dé e'mii á mendíb-te, áhye áhóded me echém, áyāle meewógéé bu á dŭ-á-muú hén.'

25 Abrahamɛ anláá mó aá, 'A-mwän, ewêmtan á pónde eche wémbēē á nkõsé ngáne wênkudté bwēm é' bwâm, boŋ Lazarɔɛ mó-'é ákūd bwēm bé mbéb-ε? Bɔɔb-pɔɔ awóge nímē menyinje hén, wémpē edé á metuné-te.

26 Néé éhúdé nê áte, wéé sédíí ne wéé édíí, sánkalaa a mbáŋ akabé syánē áte, ábel nén mod eéhēlē asyā wén se ápe wê. Modmod eéhēlē-'áá ásyā wê, se ápē áwēd.'

27 Nhɔn ní mod ménhɔb aá, 'Ncháa-ɔ́, a-Tê mēé, élóm Lazarɔɛ á ndáb echē echem sán.

28 Nlyágé bānned bétáan. Aké álēb bó ábel nén, b́ompē béepág á hóm dé metuné hén.'

29 Abrahamɛ anhób aá, 'Béwóó metelag míme Mosɛ ne míme bekal bé'dáádəŋ. Béwógen chõm-éé bétélé ásē.'

30 Nhɔn ní mod ménhɔb aá, 'Aáy, a-Tê Abraham. Nzé mod akií bó atán awě abíde á mbwóg é kwééd, né bétédé ábel dé mbéb bétímēn Dyõb.'

31 Héε Abrahamε áhóbεé aá, ‘Nzé béekwentene Mosεε ne bekal bé’dáédəη awógεn, né béewógénné ké mod awě apuúdé á mbwóg e kwééd bonj aláá bó.’ ”

17

Abeled mod mbéb

(*Mat 18.6-7, 21-22; Mak 9.42*)

1 Yesue anláá ábē bembapεε aá, “Nyébii bán mekágsen míme mébelte bad mbéb métəηgéné nyé apii. Bonj édé ngəl ne kénzée awě əpεén mó!

2 Embē mbonj né bēntəó ene ndín e mod sənkalaa a aláá á nkəη, bébwém mó á edíb-te, tómaa mó ábεled ábén bēndem mbéb.

3 Nyétédεn yəl pónδέ.

“Nzé mwənyonj abelé wε dyam dé mbéb, échu mó aláa wεé nē déεboo’é. Nzé achemé-’ε ádē awusé bonj ahəηléné, élagsén mó.

4 Nzé apənné wε ngen saámbe áyāle epun é bin, bonj apedé-’ε áwōη ngen saámbe áchóm alagsen aá, ‘Nhəηléné’, etəηgéné mó alagsen.”

Adúbe déechinéé

5 Bembapεε bé nlomag bēnlāā Səηgwée bán, “Wéd sé adúbe áte.”

6 Səηgwée anhób aá, “Nzé nyēnwōη adúbe áde áde mwəmpin nēηgáne mbál-e-bū, né nyéεkamlén ádén alín dé e’sáá bán, ‘A-bwεl, wubé ásē, éke ésumεn á edíb é nkwx-te’, é’wógén-ne nyé.

Abel dé nsón

7 “Détéd bán, nyé mod nhóg nyēwóó mbəlede awě akií nzag alíi, káa akií ənən rídyonj ní mbód. Nzé ahúú á nsón, chán wélāā’é mó? Wəlāā mó wεé, ‘Hyě édyεε ásē hén, édyē ndyééd,’

⁸ káa wεέ, ‘Belé me ndyééd étômteḍ me, étyéem-me á nkæg, kóóŋ nímáḍ adyé, boŋ ámbíḍ é pónḍé, wε-’ε édyág?’

⁹ Nyéláa me ké wēsāgnēn ane mbáledε áyāle ábélé níme nsón?

¹⁰ Né-ḍó nyémpē, nzé nyēmaá chōm ésyāāl éche bétínédé nyé abel, nyéhôb bán, ‘Sédii bembáledε ngēn, nímēḍ nsón-naá sébélé sé ngáne.’ ”

Yesuε asánté bad bé meləŋ dyôm

¹¹ Ade Yesuε ákagké á Jerusalem, atómé’áá á nchii ní nzii mé aloŋ á Samaria ne aloŋ á Galilia.

¹² Asól áde ásólé mwă dyad nhóg, antán bad dyôm ábe meləŋ mékóbé. Bentyēem nchabnede,

¹³ bélébpē mó ne esaád bán, “A-Yesu, a-Sán, sôn, wóg sé ngəl!”

¹⁴ Ade ányíné bó, anláá bó aá, “Nyékag wée beprise, nyélúmed bó yəl.” Ade békagké nê, yəl é nsán bó.*

¹⁵ Bó mod nhóg, annyín nén aá módyéé bwâm. Héε átímé ámbíḍ, ákené Dyōb ne ehób éche échágké.

¹⁶ Ankwe Yesuε á mekuu, ásāgnān mó. Anén mod abédéε mod a Samaria.

¹⁷ Yesuε ansedéd mó aáken, “Eesaá mbále bán nsánté nyé bad dyôm-ε? Héé ábíníí abog bédíí?

* **17:14 Asaad á yəl:** Nzé meləŋ ménkōb mod bétédé’áá mó née mod awě eesáa. Bébéné’áá mó bán, eesíté wée bad bédíí. Prise chóo énwōŋ kunze ásimen mod meləŋ boŋ ébided mbakú nén bán asáá, boŋ ábootéd ape wée bad bédíí.

18 Nédē mod ké nhóg ampée eétiméé ámbid áhye dé abe Dyöb mekenag, éetóméé anén mod a nken-ε?”†

19 Héε álângeé mó aá, “Tyéém ámīn, ékag. Adōn adube ádíde we bwām.”

*Epe é nkamlen ní Dyöb
(Mat 24.23-28, 37-41)*

20 Befarisia bēnsédéd Yesue bánken, “Póndé ehéé nkamlen ní Dyöb mépéé?” Yesue anláá bó aá, “Nkamlen ní Dyöb méesaá dyam áde mod ányīnnéé dīd,

21 káa dyam áde mod áhōbpē aá, ‘Nōné,’ mōmén,’ káa ‘mōmíníí.’ Aáy, nkamlen ní Dyöb ní máá abé átíntē echēn.”

22 Héε álângeé bembapεε nén aá, “E’pun é’ bīn é’húε á’sō abe nyédəngé bán né nyényín ké mbwe nhóg níme Mwān-a-Moonyonj álūmédtē nyé yāl, boj nyéenyinné.

23 Bélāā nyé á póndé eched bán, ‘Mōnén,’ káa ‘Mōníníí,’ boj nyéehántán bó.

24 Ayāle, ngáne emwεdmwεd étóméé, boj épenté ngob e Dyöb pεd póg ne eníníí, nê dōó epun éche Mwān-a-Moonyonj áπεé ébēε.

25 Boj édēbé nê, atəngéné metuné híin akud. Kəne enén nyongel e bad eébānj mó áyāl.

26 Ngáne émbēε á póndé eche Noa, nê dōó ébēε á póndé echē Mwān-a-Moonyonj.

27 Bad bédyágé’áá medyé, bémwāg mīm, baachóm bédwóó’áá bebaád, bebaád-te békāg

† 17:18 Bad bé Israel béntéd bad bé Samaria née benzínéé. Bóbó béekagé’áá ké mwāmpīn áyāle nyaa e mekan mé mbwóg ne mekan mé alonj. Ké nyaa e abele á Dyöb ne hōm dé mekáne bémbe bó nhəjlén.

á mewónḡé kááḡ ne mbwε níme Noa ásólé á bǎle é'mbáá-te boḡ mbúú echó, mesén melóne, méhōōd ábē bad bésyāēl.

28 Melemlem nê dōō émbēē á pōndé eche Lōte. Bad bédyágé'áá medyé, bémwāḡ mīm, békābē dyōn, bēwēnē bwēm, bēlōō-'ε mendáb.

29 Boḡ mbwε níme Lōte ásyáḡḡé á dyad á Sodom, níme mbwε dēn muú ne meláá níme méhyāḡtan, mémbíd ádyōb nēe mbúú, ríwúú ábē bad bésyāēl.

30 Melemlem nê dōō ébēē níme mbwε níme Mwān-a-Moonyon ányīnnēdtē.

31 “Eché epun, mod awē adé á nnon ḡ ndáb mīn áde nhōn rídíí mó á ndáb-te, eētōḡné asud ásē áhye dé atéd mó. Melemlem-'aá mod awē adé á nzag-tē, eētōḡné atim ámbíd á ndáb.

32 Nyéwēmtēn dyam áde dēmbēnléd ne Lōte mwaád.

33 Kénzēé awē awóó mewēmtēn áson ádē alongé, ábōd dō. Kénzēé-'ε awē abódé ádē alongé, né asoó dō.

34 A mbále, bad bēbe bēnaá anḡ ahóḡ nkuu, bétéd nhóḡ, bētēdē aníníí.

35 Bebaád bēbe békōḡé medyé, bétéd nhóḡ, bētēdē aníníí.”‡

37 Dōō bembapεε bésēdtēé mó bán “A-Sāḡ, héé nê dēbēnlédte?” Yesue antimtēn bó aá, “Wéε ndim níbāḡkē, áhed dōō benhōḡnōné bēladnéé.”

18

Ngan e ngwεε e mod bó nkúd é mmwaád

‡ 17:35 Donḡe á kálag dé'só ábádé nchoo 36: *Bad bēbe bēbe á nzag-tē. Bétéd nhóḡ, bētēdē aníníí.*

1 Yesue ankalé ábē bembapεε ngan álúmed bó áte nén aá, bétǎngéné békānnē pón dé téé ésebán béhúnte nlém á abum.

2 Anhób aá, “Mod abédé dyad ahóg, awě akáadte’ bad. Ane mod eebáa’aá Dyöb, eébage’aá-’ε mod-mod edúbé.

3 Nkúd é mmwaád-te abédé melemlem mé dyad, eémaa’aá’ wéε ane mod. Pón dé téé álāngē mó aá, ‘Sé mod sēwónné mehób. Káád sé ésuud me nzǝm.’

4 A mbooted ane mod enkēnháá mó dúu. Boŋ ámbíd é pón dé anláá yǎl aá, ‘Ké nēngáne méebagéé Dyöb edúbé, méēbāā-’aá modmod,

5 ngáne édíí bán anén nkúd a mmwaád ahédé me nló, mǝkāā míme nkáá ábel ísud mó nzǝm. Esebé nē, né káǎŋ ne á asóg éemwaá aá ínkún ne epe éche ápagké nén pón dé ésyāǎl.’ ”

6 Héε Sǎngwéé áhóbéé aá, “Nyéwógé chǝm-éε ekúkú é mod awě akáadte’ bad awě eebíi Dyöb éhóbé-yε?

7 Nédē Dyöb déekunné ábē bad ábe ápwédé-yε? Béchyεene’ mó nwōŋgen nkuu ne müte, nédē ákǎlēn bó metúu pón dé té-yε?

8 Nlāa nyé mεé ákun bó mehélé mehélé. Boŋ nyédúbpé bán Mwǎn-a-Moonyon átān adúbe á nkǝŋsé-te á pón dé echē ápeé-yε?”

Ngan e bad bébe ábe bēnkǝ akáne

9 Yesue ankāl ngan empée tǎngene bad ábe bényíné’aá yǎl néε bad ábe bésáá, bényīnē-’ε bad bémpée nkǝŋtéd.

10 Anláá bó aá, “Bad bébe bēnkǝ á Ndáb-e-Dyöb ákáne. Nhóg abédé Farisia, aníní-’ε abé nlad-é-tááε.

11 “Ane Farisia antyéém á ámīn, ákânne’, áhōbē á nlém-té* aá ‘A-Dyōb, nságnéné wε. Ayāle nén, meésáá nēngáne bad bémpee, ábe bédume bwēm é’ bad, ábe bébébé nlém ábum, ábe békábe mesón á ndáb e e’wóngé. Nságnéné wε áyāle meésáá nēngáne anén nlad-é-tááε hén.

12 Ndé nén, ndide’ yāl nzaa á mekáne-tē ngen éβε sōndé téé. Chōm téé éche níkudεé-’ε nkabe chó áte moŋge dyōm, mbagé wε akab nhóg.’

13 “Nlad-é-tááε pen antyéém nchabnede, eéhele ké mīd anyen ádyōb. Ambán ekáá á nlém, ákânne aá, ‘A Dyōb, wóg me ngol. Ndíi mbélé-mbéb.’ ”

14 Héε Yesue ábádé aá, “Nlāa nyé nén meé, anén mod awē nídimténé nyé aláa, ansú áwe ndáb néε mod awē asáá á’sō é’ Dyōb. Ayāle mod ké ahéé awē achógté yāl, bésudéd mó. Boŋ ane awē asūdté eche yāl, béchāgēd mó.”

Yesue ne bānbān

(Mat 19.13-15; Mak 10.13-16)

15 Bōob-pōó bad bépééné’áá bēndem wéε Yesue nén bán ábán bó ekáá á yāl ánamed bó. Ade bembapεε bényíne nē, bēnkānē ábē bad áte.

16 Boŋ Yesue anchélé ábē bān, áhōbē aá “Nyéte de bānbān béhyag áwēm. Nyéekáá bó áyāle nén, nyaa e bad néε bó chóó éwóó nkamlen ní Dyōb.

17 Ne mbále, nlānge nyé nén meé, kénzée awē eékobe nkamlen ní Dyōb nēngáne mwēndem, éesónlé áwēd-te.”

Mod a nkamlen

(Mat 19.16-30; Mak 10.17-31)

* **18:11** *Antyéém ámīn, ákânne, áhōbē á nlém-té:* donje á kálag áwóó atyéém á nkag, ákannād yāl.

18 Nkamlɛnɛ nhóg ansɛdéd Yesuɛ aá, “A-meléed a bwâm, cheé mébenlé ábel nén nkud alongé áde déemaá?”

19 Dóo Yesuɛ ásɛdteé mó aáken, “Cheé ékээ bon échagé me meléede a bwâm? Mod ké nhóg eésáá mod a bwâm étómɛé Dyöb dɛmpɛn.

20 Ebíí mbéndé éche éhóbe bán, weekábé asón á ndáb e e’wóngé, weewúé mod, weechíbé’, weebídé mbón e metóm, bée sóó ne nyon edúbé.”

21 Ane mod a nkamlɛn antimtén aá, “A meléed, nhídé échén mbéndé ésyāāl bootya se á mwěndemé.”

22 Yesuɛ awógé-’aá nê, bon álāngē mó aá, “Dyam ahóg éhedne wɛ. Sóm bwëm é’syāāl ábe éwóó, étêd mímê mɔné, ékabe betóótōkē bé bad. Nzé ebelé nê, wěkũd nhɔn ádyōb. Ene pónde éhyɛ éhíde me.”

23 Awóg áde ane mod a nkamlɛn áwógé nê, anwóg ndutul bwâmbwam, áyāle ambé nhɔn bwâmbwam.

24 Yesuɛ anyíne-’aá ngáne ásúdné bon áhōbē aá, “Elɛl áte bwâmbwam behɔn bé bad ásol á nkamlɛn ní Dyöb.

25 Edé mwăn e akan sánkalaa a nyam née kamêl ápon á epɔn é ndɔnde, tómaa nhɔn mí mod ásol á nkamlɛn ní Dyöb.

26 Bad ábe bɛnwōg chōm echě Yesuɛ ánhōbpē, bɛnhōb bán nzé née édíí, né nzéé-ō ahele ákud e’sóoson?”

27 Dóo Yesuɛ áhóbéé aá, “Dyam áde baányon bényíneé bán álélé áte, déelenledɛé Dyöb áte.”

28 Héɛ Petro áhóbé aá, “Nɔné’, sɛtɛdté ábed bwëm é’syāāl áhíd wɛ.”

29 Dóo Yesuɛ álāngéé bó aá, “A mbále, nlānge nyé mɛé, kénzée awě atɛdté eche ndáb káa mwaád, káa

baányan, káa sáá ne nyan káa bán, áyāle nkamlen ní Dyōb,

³⁰ ākūđ nsyāŋ ámbīđ mbád ne mbád enén pónđé. Akud-te alongé áde déemaá’ á pónđé éché ehúé.”

*Yesue akänlé eche
kwééd ne mpuu
ngan ámpē*

(Mat 20.17-19; Mak 10.32-34)

³¹ Hēε Yesue átímné ábē bembapεε dyōm ne béβε kun boŋ, álāŋgē bó aá, “Pón nyébíi bán dekağ á Jerusalem. Mam mésyāāl-le níme bekal bé’dāóđəŋ bétélé ásē tŋgene Mwān-a-Moonyon mébenléd áned.

³² Éténlédé nén bán bébĕ mó á mekáá mé bad ábe béesĕ bad bé Israel. Bó-’ε béwēlé mó, básyāā mó, básobé-’ε mó meléed á yāl. Bébəmtéd mó, béwúú-’ε mó.

³³ Boŋ ámbīđ e e’pun é’láán āpuú.”

³⁴ Boŋ bembapεε bó-’ε bénkēnsóŋténné dyamdyam áyāle nímén mam mésyāāl. Enén ngan entóm bó debyéé áte. Bénkēnchemmé chōm éche Yesue áhóbé’áá.

*Yesue achōŋte mod a ndím
(Mat 20.20-34; Mak 10.46-52)*

³⁵ Bəəb-pəó áde Yesue ákwógé apε á dyad á Jeriko, mod a ndím nhóg andyεé á nkəğ ní nzii, áchōmē bwēm.

³⁶ Awógé-’aá ndun e mod etóme, boŋ ásedté bad dyam áde ádé.

³⁷ Dóó bélāŋgē mó bán, “Yesue, mod a Nazaret mó atóme nê.”

38 Hée ábóné aá, “A-Yesu, Mwǎn a mbyaa míme Dabide, wóg me ngól!”

39 Bad ábe bémbē á’sō bēnkānē mó áte, bēlāā mó bán ádíb nsəl. Boŋ mó-’ε ambé ábōnē aá, “A-Mwǎn a Dabid, wóg me ngól!”

40 Dóo Yesue átyéémé, boŋ áhōbē aá béhyεene ane mod. Ane mod apedé-’aá mó benben, Yesue áseǵté mó aá,

41 “Cheé éhédeé wεé, míbele wε?” Mó-’ε anhób aá, “A-Sǎŋ, bēl nínyínen ámpē.”

42 Dóo Yesue-’ε álāngē mó aá, “Nyínén-nō! Adúbe ádōŋ ádíde wε bwām.”

43 Abwōg-ábwōg ambootéd anyínen, áhídē-’ε mó, ábagé Dyōb mekenag. Ade ene ndun e mod ényíne nē, bōmpē bēmbootéd Dyōb akémed.

19

Yesue atáne nlad a táase bán Sakio

1 Yesue ampōŋ á dyad á Jeriko, boŋ atómé’áá tómén.

2 Mod nhóg-ke abédé áwed bán Sakio, abédé-εé nlad-é-tááse ambáá, abé-’ε nhōn mí mod.

3 Ahédé’áá aá mónyín ane mod awe béchagéé Yesue, boŋ nzii enkēmbagnédté mó, ngáne amute démbēē áhed, mó-’ε ambé esōŋ.

4 Hée ányágté á’sō boŋ áchāgkē bwel é’ sikamō ábel boŋ ányín Yesue. Yesue ahúé’áá ene pēd.

5 Apedé-’aá áhed, boŋ aá mósad díd ámín, ányínē Sakiose. Dóo álāngéé mó aá, “A-Sakios, súd áse á mehéle-te. Ntāngéné nken abé áwōŋ ndáb chii.”

⁶ Hê dɔɔ Sakioε ásúdé ásē ésebán abéɓte pónde, boŋ ákobé Yesue nken ne menyinje mésyāāl.

⁷ Bad bésyāāl ábe bényin nê, bényónǵé'áá áte bán, “Akií nken abε á ndáb wée mod awe adé mbélé-mbéɓ.”

⁸ Sakioε antyéém ámin, álāŋgē Sāŋgwée áá, “Nɔné', a-Sāŋ, mētēd nhɔn nímēm, níkab mó áte e'pəd é'be, níbé epəd ehóg wée betóótókē bé bad. Nzé édé-'ε bán nkǔbné mod kéchéé á edoké-te, mētímtéd mó chó ámbíd ngen éniin.”

⁹ Boŋ Yesue mó-'ε anláá mó nén áá “A epun é bɪn é' chii, e'soósɔŋ é'báǵnéde ne enén ndáb. Anén mod mómpē adíi mwǎn a Abraham.

¹⁰ Mwǎn-a-Moonyon apedé ábel boŋ áhed bad ábe bébóó, áhood-te bó.”

*Ngan eche bénlyāgnēdtē bembəlede ngáb
(Mat 25.14-30)*

¹¹ Bad béwóglánnáá chǔm-ée Yesue áhóbé'áá. Yesue ammad apε benben ne dyad á Jerusalem. Né-ɔ́ó béwēmtān bán nkamlen ní Dyǔb mépě ábwōg-ábwōg.

¹² Hé-'áá áhóbéé áá, “Kunze e mod póg eladé'áá yāl áke eke á alon áde áchábnéde ábel nén béwóged mó kâŋ, boŋ ásūε'.

¹³ Ade ákagké, anchélé ábē bembəlede dyôm, ábagé nhóg téé ekálé é kábpe dyôm áá, ‘Nyétéd nén, nyékábe nyonǵé kóóŋ ne á pónde echē méhūū'é.’

¹⁴ Boŋ adē alon á bad dénkēndəŋgé mó. Bénlōm mésénze áhíd mó áláa ngómenaa bán, ‘Séekobéé bán anén mod ábē echəd kâŋ.’

¹⁵ “Ké nê bēmbel mó kâŋ, átīm-me ámbíd áwē dyad. Ade áhúú, ábwōg-ábwōg anlóm ábē

bembaledε ábe âmbagké ngáb achəg âbel bonj ábii nsyáŋ míme békúdé á nyonjé-te.

16 A'só ampě ahób aá, 'A-Sán, échon ekálé dyôm échyáá nsyáŋ míme rídé ngen dyôm.'

17 Ane mod anláá mós aá, 'Nê ábóó, edfi mbaledε a bwâm! Ngáne éhélé mekan mésad alyáged ngáne éhednadté, mbage wε ngíne âkamlɛn myad dyôm.'

18 Mbaledε awě alónténé bébe mómpē ampě ahób aá, 'A-Sán, échon ekálé dyôm échyáá nsyáŋ míme rídé ngen é'táan.'

19 Ane mod anláá ane ámpē aá, 'Wěkamlɛn myad métáan.'

20 "Dóo mbaledε ampée ápédé bonj áhōbē aá, 'A-Sán, ábonj e'kálé dyôm wε bɛn. Menkanj bó á wánjgesɛ-tê, ríkoo.

21 Mbáá'áá mε ngé, ngáne mbíi bwâm mεé, échon chǒm éhūnēē á ndɔɔb. Weébēlēē bonj edyág, ehúde-'ε wée wéewēnēé.'

22 Héε ane mod átimtanné ane mbaledε aá, 'Mmōŋ nsəl mɛn mós méwūū wε. Ebébtéd é mbaledε née wε. Néε emōŋ émáá abii wεé, échêm chǒm éhūnēē á ndɔɔb, ebíi-'ε wεé, meébēlēē bonj rídyág. Néε ebíi wεé nhúde-'ε wée méewēnēē,

23 cheé-ɔ ênkǎŋ bonj weehéde echem ngáb á ndáb echě bad békonjéé ngáb, âbel bonj nzé ríhúú ríkob chó ne nsyáŋ ámīn?'

24 "Héε álânjéé bad ábe béntyēēm á nkəg áhed aá, 'Nyékoben mós ábê e'kálé dyôm, nyébag bó wée mod awě awóó mbwókel e ekálé.'

25 Abê bad bó-'ε bɛnlāā mós bán, 'A-Sán, ane mod amaá mbwókel e ekálé awóŋ!'

26 Héε ane mod átimtanné bó aá 'Nlāa nyé mεé, kénzée awě awóó, Dyōb débād mós abe. Bonj

ane awě mó-'ε eewóo, Dyöb dékobén mó káēne mwāmpīn awě awóo.

27 Boη bad ábe békóo με, ábe béehede'aá bán mbê echab kâη, nyéhyyene bó hén. Bévúu bó áwem e'só hén.' ”

Yesue asólé á Jerusalem née kâη

(Mat 21.1-11; Mak 11.1-11; Jōn 12.12-19)

28 Yesue amaá-'aá enén póle akal, abwógé ásē ámpē, áke á Jerusalem.

29 Ade ákwógé ape á myad mé Betpeg ne Betani á Ekone é Menzab, anlóm bembapεε bébe aá,

30 “Nyéke á dyad áde áde á múde nímíníí. Nzé nyépedé á nló ní dyad nyéēnyīn ngáne bétāηgé mwān a ésel awě mod éēdīdēē mbéd. Nyéhune mó, nyéhyyene hén.

31 Nzé mod asēdté nyé aáken, cheé ékáá boη nyéhunné chó, nyéláa mó nén bán, ‘Sāηgwéé* atógnéné chó.’ ”

32 Bad ábe ánlōmmē békíí-'aá, bétān-ne chó melemlem ngáne ánlāā'έ bó.

33 Ade béhunnεέ ésel, bewōη bēnsedéd bó bánken, “Cheé ékáá boη nyéhunné échē ésel?”

34 Bó-'ε bēnhōb bán, “Sāηgwéé atógnéné chó.”

35 Héε bépééné chó wéε Yesue. Bēntāl échab mbóté áwedé-mīn, boη béchāgtē Yesue áwedé-mīn.

36 Ade ábóótédé akε, bad bétánlé'aá mó échab mbóté á nzii-tē.

37 Ade ábóótédé Ekone é Menzab asyōge ásól á Jerusalem, ndun e bembapεε embootéd abwεen

* **19:31** *Sāηgwéé káa nwōη.*

ámín ne menyinje, békené Dyöb ne esaád áyāle ndāle é mekan ésyāāl éche bényíné,

³⁸ Béhābē bán,

“Nnam ne kān echē epag á dīn áde Sāngwéé!

Nsaŋ mbê ádyōb,

Ehúmé ébê-’ε ne Dyöb áde ádé se ámín!”

³⁹ Nguse é Befarisia éche énsōblēn amute á bad áte bēnlāā Yesuε bán, “A-meléed, láá ábōŋ bembapεε bēlām!”

⁴⁰ Mō-’ε antimtén bó aá, “Ne mbāle, nzé ábén bad bédíbé nsəl, né meláá múmó mébootéd abón.”

Yesuε alebe dyad á Jerusalem

⁴¹ Ade Yesuε ápédé á nkæg ní dyad á Jerusalem, annyín dyad á’sō. Dóo mēsod mébóótédé mó abíd á mīd, áchyεé’ Jerusalem

⁴² aá, “Embōŋ bán nyébii mekan míme mépεεne nsaŋ. Boŋ bōob, nyéēhēlēē mó anyín.

⁴³ E’pun é’ bīn é’húε nyé á’sō á póndé echē bad ábe békóó nyé bēlāŋnédté nyé nkúmbág née e’ké, bēbentén-ne nyé pεd ésyāāl,

⁴⁴ boŋ bēmad nyé, nyáābe áben bán moosyāál. Aláá ké ahóg déelyəgké ásē áyāle nyēnkēchemmé póndé echē Dyöb ápédé āson ádén alonjé.”

Yesuε apedé á Ndáb-e-Dyöb

(Mat 21.12-17; Mak 11.15-19; Jōn 2.13-22)

⁴⁵ Yesuε ansól á Ndáb-e-Dyöb, ábootéd bad ábe bésómé’áá bwēm áwēd-te ananted,

⁴⁶ álāŋgē bó aá, “Eténlédé á kálag e Dyöb nén bán Dyöb áhóbé aá ‘Echem ndáb ēbē ndáb e mekáne.’ Boŋ nyētímté chó mbwəg mé bechīb.”

⁴⁷ Bootya nê, Yesuε ayágté’áá bad á Ndáb-e-Dyöb. Bepriε bēmbáá ne bemeléede bé mbéndé bōobε

belyáged bé dyad, bó-'ε béhédeé nzii eche béwúé'έ
mó.

⁴⁸ Nzii-'ε eebédeé bó âbel dyam ádíi dyam, áyāle
moosyāal andǎŋ e'yale ábe Yesue awóg ne kán
esyāál.

20

*Nsɛdtéd tâŋgene kunze eche Yesue
(Mat 21.23-27; Mak 11.27-33)*

¹ Mbwe nhóg Yesue ambé á Ndáb-e-Dyöb áyāgtē
bad, ákanlé-'ε bó nkaŋ ní bwām. Héε beprise
bémbáá, bemeléede bé mbéndé ne bad bémbáá
bé dyad, bépédé áwē,

² boŋ bésɛdté mó bánken, “Láá sé, kunze ehéé
éwóó âbel nímén mekan? Nzé-módé abagé-'ε we
enén kunze?”

³ Dóó Yesue átimtanné bó aá, “Mémpē meésédéd
nyé dyam ahóg; nyéláa me

⁴ wéε kunze echě Jone ádúsánnáá bad émbídtē,
wéε Dyöb, káa wéε moonyon?”

⁵ Bēn ne bēn bēmbootéd atāŋten bán, “Nzé
dehóbé bán, ‘Jone echě kunze enhúú ne Dyöb,’
né äsédéd syánē aáken, ‘Cheé-ō enkǎŋ boŋ
nyénkëndúbé mó?’

⁶ Boŋ nzé dehóbé bán, ‘Echě kunze ehúú ne
baányon,’ né ábén bad bésyāal bélūm syánē meláá,
áyāle béndübē bán, Jone abédéε nkal é'dǎádǎŋ.”

⁷ Hē dóó bétímténé mó bán, “Séebíi'έ wéε ene
kunze émbídtē.”

⁸ Dóó Yesue álāŋgέé bó aá, “Né ké me-'ε ámpē
méeláá'έ nyé kunze echě níwóó âbel nímén
mekan.”

*Ngan e bebel bé nzag ntéd
(Mat 21.33-46; Mak 12.1-12)*

⁹ Héε Yesue ákanléé bad ngan nén aá, “Mod nhóg ambé, ankwěł nzag e e’pum é mēl ábe bébenléé mīm. Ambě ene nzag wée bad ábe bóbōó békāb mbote áte, ákē eke á alonj démpēe, ábēm-me áwed.

¹⁰ Póndé epedé-’aá eche bepádeé e’pum, bonj álōmē mbaledε wée bebel-bé-nsón, ákobe mó áde asii dé e’pum. Héε ábē bebel-bé-nsón béwānnē ane mbaledε, bésúúd-te mó ámbíd ne mekáá mé ngēn.

¹¹ Anlóm mbaledε ampée, bonj bēmbōm ane mómpē, béwōgēd mó e’són bwāmbwam, bésúúd-te mómpē ámbíd ne mekáá mé ngēn.

¹² Ambé alóm awě alónténé beláán. Awed bēnlōgēn, bébwēm-me mó ámbíd e e’ké.

¹³ Héε nwóó-nzag ádolé áte chóónj, bonj áhōbē aá, ‘Chán-nō mébenlé bōob? Mēlōm awem mwān awě ndáá bwāmbwam. Kapóg bébe mó edúbé.’

¹⁴ Bonj áde bebel-bé-nsón bényíné mó, bēnnōnén á mesó, bēhób bán, ‘Ndyé-a-mbwóg mwēn nén. Déwúu mó, ábel eche mbwóg ésuuned syánē?’

¹⁵ Dóó bēbídne mó á nzag-té, bonj béwūē-’ε mó.” Héε Yesue ásedtée aáken, “Bōob-póó, cheé nwóó-nzag ábenlé bó?”

¹⁶ Apě awúú bó, ábē-’ε ene nzag wée bebel-bé-nsón bēmpēe.” Awóg áde bad béwógé nē, bēnhōb bán, “Ene ndín e dyam eébenlád mbéb!”

¹⁷ Yesue annōn bó á mesó, ásedté bó aáken, “Chán nyésónténé eyale é Dyōb éche éténlédé bán, ‘Aláá áde belónj-bé-ndáb bēnchenéé dōó átímé aláá dé etógnén abé.’

18 Mod ké ahéé awě ălūm ádê aláá ámīn ābōgtēd áte. Boŋ mod awě déhūntēdtē ámīn, ānyogtēd áte átīm mbúbú.”

19 Bemeléede bé mbéndé ne beprise bémbáá bénhěd nzii eche békóbéé Yesuε ábwōg-ábwōg, ngáne bēnchemmé bán áyāle echāb dōo ákálé enén ngan. Boŋ bémbāŋ bad ábe bébédé áhed.

*Nsēdtéd tāŋgene asaa á tááse
(Mat 22.15-22; Mak 12.13-17)*

20 Né-ōó, bemeléede bé mbéndé ne beprise bémbáá béhédé'áá kase e etál, ákób mó. Bēmpwěd bad, bésábé bó, bélóm bó áhíd mó. Abé bad bēntāŋgēn ábānten nén bán, béhíde mó ne nlém nhóg, ábeɪ boŋ békób mó awusé á nsəl, boŋ ene pónde bébé mó á mekáá mé ngómenaa a Roma awě adé á nkamlēn.

21 Héε bad ábe bēnlōmmē nê bēlāŋgēé Yesuε bán, “A-meléed, sēbíi bán ehóbe', eyágte-'ε mam míme métāŋgéné. Weékwognádté modmod. Eyágte-'ε bad mekan mé Dyōb á nyaa echē etāŋgéné bwām.

22 Mbéndé eche syánē ehóbe nén bán désaŋge' tááse wéε Kaisεε, kāŋ e Roma-yε?”

23 Boŋ Yesuε anchem bó akwāb. Héε álāŋgēé bó aá,

24 “Nyélúmed me mōné mé ekii. Edíídingε éche nzéé chén, dīn áde nzéé-'ε dén?” Bēntimtén mó bán, “Dīn ne e'só ábe Kaisεε.”

25 Dōo Yesuε áhóbéé aá, “Nyébag-kōó Kaisεε éche édé éche Kaisεε, nyébag-ke Dyōb éche édé é Dyōb.”

26 Bōob-pōó, nzii ké póg enkēmbáá eche békōbēnnē mó póle e awusé á nsəl. Né-ōó, bēndīb mímb nsəl ngáne dyam dénkēmbōŋgé bó ahób.

Nyaa eche Yesuε ántimténné bó enkóméd bó yǎl áte.

*Nsɛdtéd tâηgɛne mpuu
(Mat 22.23-33; Mak 12.18-27)*

²⁷ Donje á Besadusia bêmpě wée Yesuε. Besadusia béndübē bán mpuu méesaá ámbíd e kwééd.

²⁸ Dóo béhóbεé bán, “A-meléed, mbéndé e Moseε ehóbe nén bán, ‘Nzé mod awóó mmwaád, boη awédé áde bó ane mmwaád béepedεé mwǎn awále, mwǎnyanη a abum ahóg atáηgéné ane nkúd awónη, ábel boη đín áde mwǎnyanη déebō’.”

²⁹ Bōb-pōó, bad bébéde mod saámbé ábe bémbíd abum ahóg. Mod a’só anwónη mmwaád boη awé áde bó mmwaád ne béepedεé bán awále.

³⁰ Mod awě anlóntén bébe anwónη ane mmwaád. Mómpe awé ésebán achyáá mwǎn.

³¹ Ámbíd é pónde awě anlóntén beláán mómpe anwónη mó, kááη bó mod saámbé bébom mó awónη, nhóg ámbíd a aníní. Boη bó mod ké nhóg bénkênchyáá mwǎn ne ane mmwaád, kááη bó moosyáál béwé-’ε.

³² Kááηne á asóg ane mmwaád mómpe anwé.

³³ Bōb-pōó á pónde e mpuu, mmwaád awě nzéé ane mmwaád áchagnédté áyále bó moosyáál saámbé bēnwōη mó?”

³⁴ Dóo Yesuε átimtanné bó aá “A pónde eche dedíí áte nén chii, bebaád ne baachóm béwōηne’.

³⁵ Boη bad ábe békwógnédé ábé á mpuu á kwééd boη básón-le á alongé dékōlē béewōηnēē.

³⁶ Bébéē néε ángel, béewág-kaá ámpē. Apuu áde bépuú’é, bán bé Dyōb bóo bébéē.

37 Mosεε mwën ámpē alúmté áte aá, bad bépuude'. Wée Mosεε átélé á Kálag e Dyöb aá, mwă bwel akóbé muú, achəgé Səngwéeé áhed aá, Dyöb áde Abrahamε, Dyöb áde Aisige ne Dyöb áde Jakəbe.

38 Dyöb ádi Dyöb á bad ábe bédé á alongé, saké Dyöb á bad ábe bəwédé. Nê dën álúmté bán ne Dyöb, bó moosyáál bédé á alongé."

39 Donje dé bemeléede bé mbéndé bənhəb bán, "A-meléed, chöm éche éhóbé étəngéné."

40 Né-əó modmod enkənchu'é mó dyamdyam aseded ámpē.

*Nsədtéd təngene Ane-awě-Béwógté
(Mat 22.41-46; Mak 12.35-37)*

41 Héε Yesue ásepteé bó aáken, "Cheé ékáá bon bad bəhəbē bán Ane-awě-Béwógté abidé á mbyaa míme kəŋ Dabide?"

42 Ngómē Dabide mwën ahóbé á Kálag e Ngəse aá,
"Səŋ Dyöbe anláá awēm Səngwéeé aá,
'Dyεé áwēm ekáá émbáá,

43 káəŋ ne á pónde eché mébenlé bon ékəgtéd ábōŋ bad bé ekəyí ámín ne mekuu.'

44 Néε Dabide mwën ásébpé mó achəg aá Səngwéeé, chán-nō Ane-awě-Béwógté áhεεé abé awe mwăn?"

*Yesue abage elébé aá,
bétédεn bemeléede bé mbéndé pónde
(Mat 23.1-36; Mak 12.38-40)*

45 Bad bésyāál bəwógé'áá chöm éche Yesue áhóbéé. Héε áləngéé bembapεε, aá,

46 "Nyétédεn bemeléede bé mbéndé pónde. Bédəə mengombe ahyómεn áte, bédəə-ε bán bad

bélente bó á dyɔn-tê ne edúbé. Bédæ metii mé edúbé adyé á ndáb e mekáne ne á hõm á ngande.

⁴⁷ Boŋ bóɔ bédume' mbwóg é bekúd, bédogé-'ε bad ne ntón-ntón mé mékáne. Echê nyaa é bad éküd nkógsen míme ríchábé ámín."

21

Mende míme nkúd a mmwaád

(Mak 12.41-44)

¹ Ade Yesue ásádé díd, anyín néε behɔn bé bad béhāgkē mɔné á ntyág mé mende.

² Annýín-ne ntógétōke a nkúd a mmwaád nhóg ahâg bedálee bébe.

³ Héε áhóbéé áá, "A mbále, nlânge nyé meé, mímén ntógétōke mé mmwaád ríhédé mende á ntyág-te tómaa bó moosyāál.

⁴ Mɔné míme ábê bad béhédé, ndii mɔné míme ríchábé bó ásē, boŋ anén mmwaád ne atóg áde ádíí ahédé mɔné rísyāāl míme áwóó, rísyāāl míme ámbēē atagnan yāl."

E'chemléd bé asóg dé nkõjsé

(Mat 24.1-2; Mak 13.1-2)

⁵ Bembapεε behóg békálé'áá ngáne Ndáb-e-Dyõb ébóó, ngáne bélõhné chó kãse é meláá, boŋ bénābē-'ε chó áte ne mende míme bad bésánjé. Héε Yesue áhóbéé áá,

⁶ "Abén bwēm ábe nyényínεé nén, pón dé ãpě echē aláá ké ahóg déelyægkē ámín e waáb. Bépāŋtéd mó áte mésyāāl."

⁷ Bēnsedéd mó bán, "A-meléed, súútán nén débenlédté? E'chemléd é'héé bélüméd bán nén áhede abenled?"

⁸ Yesue antimtén bó aá, “Nyétêd pónde nén mod eépuutád nyé. Ekud é bad épě, á dĭn ádêm, bédogé nyé, mod téé aá móo módē Ane-awě-Béwógté, béhōbē bán e’pun bé asóg é’pédé áte. Boŋ nyéehídé bó.

⁹ Nzé nyêwógé-’ε bán bel é’wanté’, káa bán ekíde épánge áte, modmod eebáá’. Mmén mekan mésyāāl métángeéné abenled, boŋ saké mó mélūmēd bán, asóg áamáá apε.”

¹⁰ Hée álángeé bó aá, “Aloŋ ahóg détyēēmēn ádíníí nzum. Nkamlēn nhóg-ke rítyēēmēn rímíníí.

¹¹ Ndōob eēnəŋnéd ásē ngine-ngine. Nzaa ne nkole bébē hōm ásyāāl. Mekan míme mébānte bad mébē. E’chemléd é’mbáámbāa bómpē bébĭd ádyōb.

¹² Mmén mésyāāl médēbenléd, béhē nyé abum ámĭn, bétagté nyé. Békeén nyé á ndáb é mekáne, békáád nyé áwed, béhé-’ε nyé á mbwōg. Nyébĭi-’ε bán, bépēén nyé á’sō é’ kŋ é bad ne benkamlēne áyāl e dĭn ádêm.

¹³ Nê débe nyé etál pónde eched, áláa bó mekan mésyāāl míme nyésóŋténé á yāl echēm.

¹⁴ Né-ōó, nyémad á nlém tē ngen póg bán nyéetángeéné atag áte ngáne nyékāā’é.

¹⁵ Mmēn mēbe nyé dyam áde nyéhōbpē ne debyéé áde nyéhōbēnnē dó, nyaa echě ábēn bad bé ekōyí béehenlé nyé atyéemēn. Béehĭl-laá ahób bán dyam áde nyéhóbēé déetángeéné.

¹⁶ Kŋne besóó ne benyoó, bóobe áben baányan ne bĕn, bĕn bēpalé nyé áte, béwúú-’ε nyé nguse é bad.

¹⁷ Bad bésyāāl békōó nyé áyāle dĭn ádêm.

¹⁸ Ké nê, dyamdyam déebenlé nyé, ké mbum e

esid póg éebóó'é nyé á nló.

¹⁹ Nyékanj nlém ábel nyékud e'soósonj."

Yesuε ahóbé ngáne

dyad á Jerusalem dépāā'é

(Mat 24.15-21; Mak 13.14-19)

²⁰ Yesuε anláá bembapεε aá, "A póndé eche nyényinnē sánze éláñnéde dyad á Jerusalem, dóo nyébbī'é bán ekíde éhede apâñted áte.

²¹ Nzé nyényiné nê, bad ábē bédé á Judeya bétóm mehélé békε bésəəm á e'kone mīn. Ane awě adé á dyad-tê wê, ából. Awě mó-ε adé ámbíd e ebwóg eéəgné mó asól á dyad á Jerusalem.

²² Ayāle nén, nímē mesú níme ríhóbéé nê, médií e'pun bé nkógsen. Póndé eched dóo mekan níme méténlédé ásē mēlōnnē.

²³ Ebē ebébtéd ne bebaád ábe bēbē nkog ne ábe bémwāñtē nímē mesú. Ayāle nén, metake híin mébē á nkōñsé-te, enén nyonjel e bad ékūd-te metuné bwāmbwam.

²⁴ Adén alonj á bad déwē á bel-tê. Békōb nguse é bad née betāñ, békēēn bó á melonj mémpēe. Bad ábe béesě bad bé Israel békəgtéd dyad á Jerusalem áte, káāñ né póndé echě Dyōb átíínédé bó émaá áte.

Epe é Mwān-a-Moonyonj

(Mat 24.29-31; Mak 13.24-27)

²⁵ "Etondeε bóəbe ngən ne betintine bēlūmēd e'chemléd. Edíb é nkwe édūm áte, étəg née ahóbpε dé edíb. Nén dékōbēd bad bé melonj mé nkōñsé mbwóg káāñ béēbyē' née bēbeléé.

²⁶ Bad bēpimén ne mbwóg ní ngíne áyāle ebébtéd éche éhúe á nkōñsé, ngíne-ε éche édé ámīn éñəñnéd á e'dii.

27 Ene pón dé dǒo bényinnē nées Mwǎn-a-Moonyon ahúé' é á mbag-té ne ngum ne ehúmé é ngíne.

28 A pón dé eche nyényinnē nées nímén mekan mébóótédé abenled, nyétyéem ámín, nyésād díd, áyāle nén pón dé e e'soóson emaa nyé apε áte."

Mel méyágte syánē debyéé

(Mat 24.32-35; Mak 13.28-31)

29 Héε Yesue álangeé bó ene ngan, aá, "Nyênön alín á ngəl bwâm, káa bwel ké é'héé bempēe.

30 Abíd áde byaa é'bootadté bó abíd, nyébën nyébele nyébíi bán nchoy nímáá abé benben.

31 Melemlem nzé nyényíné nímén mekan mésyāāl mébenlad, nyébíi nén bán, nkamlen ní Dyǒb níkwógé apε.

32 Ne mbále, nlánge nyé nén meé, enén nyongel e bad éemaá' é kááñne nímén mekan mésyāāl mémáá abenled.

33 Nkoñ mí mín ne nkǒñ nísé bémaá boñ ábêm e'yale bébē abé ne abé.

Nyétéd pón dé

34 "Nyétóo nén nyéetómté echen pón dé esyāál ádyé ndyééd ne ámwé mím bwámbwam. Nyéébūdē-'ε atag áte áyāle mekan mé alongé. Nzé nyébele nê, né échê epun étān nyé tǎléd nées melám.

35 Epun éched épií moonyon asyāál awě adé á nkǒñsé.

36 Nyétéd pón dé, pón dé ésyāāl. Nyékáñne bán nyéwón ngíne átóm nímén mekan níme mébenléd áte, ábel nén nyéhel atyéem á'sō wée Mwǎn-a-Moonyon."

³⁷ Mmê mesú mésyāāl Yesuε ayágté'áá bad á Ndáb-e-Dyöb. Nzé ngukél empě, áke ánāá á ekone é Menzab.

³⁸ Nzé bñn bénsāā sánǵén, ekud é bad éhyágáá mó atán á Ndáb-e-Dyöb áwóǵlen mó.

22

Békii kun áwúu Yesuε

(Mat 26.1-5; Mak 14.1-2; Jǵn 11.45-53)

¹ Bǵǵb-pǵǵ, Ngande e Ewele-é-Nǵên emmad abé benben. Enén ngande ebédée dñn bán Nnyíme-ámñn.

² Beprise bémbáá ne bemeléede bé mbéndé béhédé'áá nzii eché béwúé'é Yesuε á mesǵǵm-té. Bébbá'áá pen bán bad bésǵntēn.

Judasε akwenténé ásóm Yesuε

(Mat 26.14-16; Mak 14.10-11)

³ Satanε ansól mbapεε awe Yesuε nhóg áte, awě béchǵǵéé bán Judasε. Dñn démpée démbē mó bán Iskariǵde. Ambé nhóg áfñnté bembapεε dyǵm ne bébe.

⁴ Héε ásyǵǵǵé boǵ, áke atán beprise bémbáá bǵǵbe bekamlēn bé Ndáb-e-Dyöb, ábel ntíi ásóm Yesuε áwāb.

⁵ Nén dénwǵǵéd bó menyǵǵe bwāmbwam. Bǵbǵǵó bémpě á nchemtēn. Bénlāā mó bán bésābē mó mǵné.

⁶ Mó'ε ankwentén. Dǵǵó ábǵǵótédé nzii ahed ásóm Yesuε áwāb ésebán bad bébíi.

Yesuε abǵǵsan Ngande e Nnyíme-ámñn

(Mat 26.17-25; Mak 14.12-21; Jǵn 13.21-30)

⁷ Βαῶb-πῶός, epun é ngande e Ewele-é-Ngên áde béwúé'έ ἵdyῶη ἡ mbód mé Nnyíme-ámīn êmpě áte.

⁸ Δῶο Yesue álóméé Petro bó Jῶn aá, “Nyéke nyéboṅsen syánē ndyééd e Ngande e Nnyíme-ámīn.”

⁹ Bēnsédéd mó bánken, “Héé wédəngé wéé séke séboṅsen ádyé chó?”

¹⁰ Δῶο ákwentanné aá, “Nyénəne'. Nzé nyépédé á dyad-tē, mod ābómén nyé awě apémé apom dé mendīb. Nyéhíd mó á ndáb ké ehéé eche ásōnlē.

¹¹ Nyéláa nwóó-ndáb bán, ‘Awed meléede aáken, héé toṅ e beken édíí echě módyēē ndyééd e Nnyíme-ámīn áte ne ábē bambapεε?’

¹² Bélūmēd nyé toṅ echě ekalé áte eche bénábpé áte. Ene toṅ edé ámīn á ndáb-te. Nyébele syánē mboṅsén ḡ ndyééd áhed.”

¹³ Δῶο békíí, bétán-ne mekan melemlem ngáne ánlēbēē bó, bēmbōṅsén-ne ndyééd e Ngande e Nnyíme-ámīn.

Ndyééd e Sáṅgú

(Mat 26.26-30; Mak 14.22-26; 1 Kor 11.23-25)

¹⁴ Ade pón dé e ndyééd épédé áte, Yesue andyεé á tébele ne bambapεε bé nlomag.

¹⁵ Héé álāṅgεé bó aá, “Mendəṅ bwāmbwam mεé ḡdyē enén ndyééd e Nnyíme-ámīn ne nyé boṅ ḡkude metuné.

¹⁶ A mbále nlāṅge nyé mεé méedyáá chó ámpē káəṅ ne á pón dé echě Dyōb délōnēdtē chó mbon á pón dé echě ḡmē nkamlen mēpεé áte.”

¹⁷ Δῶο átédé mbwendé, boṅ ábagé Dyōb mekenag, álāṅgē-'ε bó aá, “Nyékob nén, nyémwē, nyétōmted ḡhóg ne aníníí.

18 A mbále, nlânge nyé með bootya бөөб âke á'sō, méemwáá mímén mím ámpē káəŋ né nkamlen í Dyöb nípédé áte.”

19 Antéd kəŋne ewele, ábe Dyöb mekenag, ákabtéd chó áte, ábē-’ε bó chó aá, “Echem yǎl nén, ebǎgnédé áyǎl echên. Nyébele nén ákamten me.”

20 Ade bémáá ndyééd adyé ambël melemlen ne mbwendé í mím. Anhób aá, “Mmén mbwendé ndíi melē mékǎǎlē míme nsógténé ne mekií mímém, míme mésyǎgé áyǎl echên.*

21 Boŋ nyénəne’, mod awě akií me ntúré, adyág ndyééd ne me hén.”

22 Mwǎn-a-Moonyoŋ áwē ngáne éténlédé, boŋ medim ne ane mod awě ášōm mó.

23 Héε bembapεε bĕn ne bĕn bĕbóótédé nhóg ne aníníi aséded, ábíi bó mod awě ábĕl enén ndín e dyam.

*Bembapεε bĕswanŋtan tǎŋgene
mod awe adé ambáá*

24 Bembapεε bĕn ne bĕn bĕmbootéd aselen, béhédé ábíi bó mod awě adé mod ambáá áwab tǎntĕ.

25 Dóo Yesue álângeé bó aá, “Kəŋ é meloŋ élúmte ngaŋlen ámín e bad ábe békamlanné. Benkamlene béchəge yǎl bán, ‘Eboŋ-nléme.’

26 Boŋ éetǎŋgenéé abé nĕ átǎntĕ echên. Embon bán ane awě adé mod ambáá átǎntĕ echên, átim néε ane awě atómténé mpín abé. Ane awě mó-’ε alyǎgte’, átim néε mbəlede.

* 22:20 Donje á kálag dé’só éewóó’é e’yale ábe Yesue ámbíd e Echem yǎl nén; á nchoo 19 ne nchoo 20 ísyǎǎl.

27 Nzé bad bédé bébe, nhóg adyéé á tébele, aníní-
'e abenle mós, ahéé atóme waab e'del áte? Saá ane
awě adyéé á tébele-ye? Bon me, ndé áwen títê néé
ane awě abenle nyé.

28 Nyéē nyédé bad ábe béwéséné me á póndé
eche nkúdé metuné.

29 Ngáne Titée ábágé me kunze ákamlen, né-'aá
mémpē mébéé nyé.

30 Nén débēl nyēdyé ndyééd, nyēmwé-'e mīm
hōm ahóg ne me áwem nkamlen-tē. Nyé mod té
ádyéé-'e á atii dé nkamlen, nyékaadtē metúmbé mé
Israel dyōm ne mébé.

*Yesue ahóbé á'sō é' póndé aá,
Petro ābān mós áyāl*

(Mat 26.31-35; Mak 14.27-31; Jōn 13.36-38)

31 “A-Simōn, Nōné! Satanε akudé kunze ákag
nyé moosyáál, ákab-pe nyé áte. Abane bé bwām
ne bé mbéb nēngáne mod apebe kón éche bésálté.

32 Bon nkánnédé we méé adúbe áde éwóó
déésudé'. A póndé echē wétiménné me ámpē,
éwéd baányonj áte.”

33 Petro anhób aá, “A-Sánj, ké á mbwog dóó
bétimnéé we káa á kwééd, mbōjséné we ahíd.”

34 Dóó Yesue álāngéé mós aá, “Nlāa we, a-Petro,
nchóm-a-kúb adēhób aá mótōo' nkuu nén, wēbān
me áyāl ngen éláán.”

Póndé e metake ekwogé ape

35 Dóó Yesue ásedtéé ábē bembapεε aá, “A
póndé eche ménlōmmē nyé ésebán nyéewánlé
ekwe é ngáb, káa ekwe, káa metámbé, nzé-
chómé nyéntōgkē?” Bembapεε bēnkwentén bán,
“Chōmchōm.”

³⁶ Dóo Yesue álângeé bó aá, “Bɔɔb-pɔɔ, mod awě awóó ekwe é ngáb ké’ε ekwe, áwále áyāl. Ane awě mó’ε eewóo nkwáté, ásóm nímē nkobe, áchan nkwáté.

³⁷ Nlânge nyé mēé kálag e Dyɔb ehóbé aá, ‘Bébánné mó nchoo nhóg ne bechíb.’ Né’áá ébenlédte áyāl echēm. Etángeéné ébenléd áned.”

³⁸ Bembarεε bēnlāā mó bán, “A-Sán, nɔné’, sēwánlé nkwáté míbe hén.” Mó’ε antimtén bó aá, “Désob nê bɔɔb.”†

*Yesue akii akáne á ekone é Menzab
(Mat 26.36-46; Mak 14.32-42)*

³⁹ Hê dóo ábíde á ebwóg, áhídē á dyad-tê, ákē á ekone é Menzab ngáne ámmēténne abel. Bembarεε bó’ε bēnhíd mó ámbíd.

⁴⁰ Ade bēpédé áwed anláá bó aá, “Nyékánnē’ bán mekágsen méepiidé nyé.”

⁴¹ Ansyáó bó á nkæg, asídé mwă nchabnede, akóg mebóbón, ákännē nén aá,

⁴² “A-Tê, nzé ébónnéde we, ékōbēn me nímén metuné. Bon ké nê, saké ngáne ébónnéde me, bon bēl ngáne ébónnéde we.”

⁴³ Ade Yesue ákännēé nê, ángel embíd ádyōb, éhye ewéd mó áte.

⁴⁴ Anwéd mekáne áte ngáne ámbēē á ndutul-tê. Ebábé éche ébíde mó á yāl émbē ngáne metóté mé mekií, étēnē’ á ndɔɔb taáb, taáb.‡

⁴⁵ Ade áamáá akáne, antyéém ámín, áke wée bembarεε bēbédé. Antán nēe békúnēé áyāle ndutul e ngíne.

† 22:38 *Désob nê bɔɔb*; káa *Nê akwógé*. ‡ 22:44 Donje á kálag dé’só déewóó’é nchoo 43 ne nchoo 44.

46 Dóo áseɗteé bó aáken, “Cheé nyékúneé? Nyépáde ásē, nyékánnē nēn mekágsen méepiidé nyé.”

Békóbé Yesuε

(Mat 26.47-56; Mak 14.43-50; Jɔn 18.3-11)

47 Yesuε eépedeé ké amad á nsəl dóo amute á bad ápedé. Mod awě antómén bó abédée Judase, mbapεε nhóg átíntē e bembapεε dyòm ne bébe ábe Yesuε. Apedé-’aá Yesuε á nkəg ahé mó tâl.

48 Bon Yesuε ansedéd mó aá, “A-Judas, nédē ahé áde éhédé Mwǎn-a-Moonyonj tâl ádíi ásom mó-ye?”

49 Ade bembapεε ábe bóobe Yesuε bébedé áhed bényíné dyam áde áhede abenled, bēnsedéd mó bánken, “A-Sánjú, sēhele séwān ne ríməd nkwaté-ye?”

50 Héε mbapεε nhóg átómté nkwaté, áselē ntān awě prise ambáá etúu é ekáá émbáá.

51 Bon Yesuε anláá bó aá, “Nyésob nê boob!” Ansidtén mó ene ped e etúu, ádid mó bwām.

52 Héε álângeé beprise bémbáá bóobe benkamlεε bé mésénze mé Ndáb-e-Dyöb ne belyóged bé dyad, bad ábe bēnhye mó akób aá, “Nchíb móo nyéhyédé akób, bon nyêwálé nkwaté ne mbid-ε?”

53 Mbwε téé syánē debágáá á Ndáb-e-Dyöb, nyénkēmbánné me ké ekáá á yǎl. Bon echen pónde epedé boob. Ehintén chóo édé á nkamlεn boob.”

Petro abáá Yesuε á yǎl

(Mat 26.57-58, 69-75; Mak 14.53-54, 66-72; Jɔn 18.12-18, 25-27)

54 Héε békóbé Yesue, boη békεεné mós, bétimēn mós á ndáb wée Prise Ambáámbáa. Petro mós-ε ahidé'áá bós ámbíd mwă etûn.

55 Bēnkonéd muú átintē e dyad, bad bēlādēn áhed. Petro mómpē anhyě adyεε áhed.

56 Mbəlede a mmwaád nhóg annyín née Petro ádyéé á nkəg rí dŭ. Dóó ánóné mós chósóη, boη áhəbē' áá, “Anén mod mómpē ambé ne Yesue.”

57 Boη Petro antáη áá, “A-mwăn-a-mmwaád, meebíi'έ me mós.”

58 Eebeméé áte, mod ampée anchem mós. Anhób áá, “Wémpē edé nhóg áwāb echoη.” Boη Petro anhób áá, “Amúē, weéhyāg me ngáne áyāl.”

59 Ambíd e háwa póg mod ampée ambádnén áá, “Ntāηten ké nhóg méesaá. Anén mod abédé ne Yesue, áyāle adii mod a Galilia.”

60 Boη Petro anhób áá, “A-mod-e-ngé, meebíi'έ chōm éche mmōη ékoo'έ ahób.”

Abwōg-ábwōg áde áhóbé nê, nchóm a kúb antóη.

61 Héε Sāηgwéé ákúnné boη mīd mébomé bós Petro. Dóó Petro áwémténé e'yale ábe Sāηgwéé ánlāā'έ mós áá, “Nchóm-a-kúb adēhób áá mótōo' chíi nén, wēbāη me á yāl ngen éláán.”

62 Héε ábídé á ebwóg, abálé-ε awé. Anchií bwāmbwam.

*Bébómtédé Yesue, béwélé-ε mós
(Mat 26.67-68; Mak 14.65)*

63 Bóob-póó, bad ábe bénóné'áá Yesue bēmbootéd mós awel, bēbómtád mós,

64 békəη mós mīd, bésēdtē mós bán, “Láá sé, nzé-módé abomé wε?”

65 Bésyáá'áá mós nzyáη nyaa ne nyaa.

*Bépééné Yesue wée belyáged bé dyad
(Mat 26.59-66; Mak 14.55-64; Jøn 18.19-24)*

⁶⁶ Née bñn é'sánjé, bad bémbáá bé Israel, beprise bémbáá ne bemeléede bé mbéndé bénkōb mbom, bépēen Yesue áwab káánsel.

⁶⁷ Héε básedtéé mó bán, “Láá sé nzé we-εé edé Ane-awě-Béwógté?” Dóo Yesue áhóbεé áá, “Ké menláá nyé, nyéedúbéé me.

⁶⁸ Ké menséded-te nyé akan, nyéekwenténné me.

⁶⁹ Boñ bootya bōōb, Mwǎn-a-Moonyon ǎdyéé á ekáá émbáá é Dyōb á Ngum.”

⁷⁰ Bó moosyǎál bēnsédéd bánken, “Nédē we-εé edé Mwǎn a Dyōb-ε?” Ankwentén áá, “Nyé bēn-εé nyéhóbé bán née édíí.”

⁷¹ Dóo béhóbεé bán, “Nzōm ehéé empée déhedεé? Syánē bēn dewógé áwē nsəl.”

23

*Payledε akáádté Yesue
(Mat 27.1-2, 11-14; Mak 15.1-5; Jøn 18.28-38)*

¹ Héε belyáged bé dyad básyāál bétyéémé ámin, boñ békeené mó wée Payledε.

² Awed-taá bébóótédé mó mekan abán áyāl bán, “Sékóbé anén mod ngáne ápuutadté sé alon áte. Ahóbé nén áá, séēsajñád Kaisεε tááse, áhōbē-ε nén áá, mó mwěn móō módē Ane-awě-Béwógté, nédē ahóbe' áá módē kēñ.”

³ Dóo Payledε ásedtéé Yesue aáken, “We-εé edé kēñ e bad bé Israel-le?” Yesue ankwentén mó áá, “Ngáne éhóbé.”

4 Boŋ Paylede álāngē beprise bémbáá ne amute á bad nén aá, “Meenyíneé atote ké ahóg áde anén mod ákwééné.”

5 Boŋ bémbē békag á’sō, béhōbē bán, “Anén mod akóne bad ne mam míme áyágtéé á mbwóg e Judeya esyāól. Ambootéd á Galilia, apedé-’ε hén bōob.”

Herode akáádté Yesue

6 Néε Paylede áwógé nê, ansédéd ké Yesue adfi mod a Galilia.

7 Bénlūmēd mó áte bán, nê dēn dōó édíí. Ngáne alon á Galilia abédé ásē e nkamlen míme Herode, Paylede anlóm Yesue áwē. Herode mwēn ámpē ambé á Jerusalem ene pónde.

8 Ayōgké mewēmtēn awōŋ ányín Yesue áyāle awógé’áá mó dúu. Ahédé’áá aá mónyín menyáké míme ábeléé. Né-óó anwóg menyinŋe áde bépééné Yesue áwē.

9 Ansédéd Yesue ekud é mekan, boŋ Yesue enkēntimténné mó dyamdyam.

10 Beprise bémbáá ne bemeléede bé mbéndé béntyēēm ámín, bēbāntād Yesue mekan áyāl.

11 Héε Herode, bōobe éche sánze bēbóótédé mó awōó, bēwélé-’ε mó. Dōó bēwāádtē mó kase é bwēm, boŋ álōmē mó ámbíd wēε Paylede.

12 Nén dēnkōŋ Herode bó Paylede bēntīm ásē échē epun; édé ape nê, búmō bénsēbē ekōyí awonŋ.

Bébidté mbakú bán bēwíu Yesue

(Mat 27.15-26; Mak 15.6-15; Jōn 18.39-19.16)

13 Hê dōó Paylede áládé beprise bémbáá áte nchoo ne belyáged, ne bad bēmpēe,

14 boŋ álāngē bó aá, “Nyēnsébé anén mod apεen áwēm. Nyé bán apuutad bad nló áte. Bōob-pōó nhédé áte áyāl échē wēε nyébēn nyédíí,

boŋ meekóbnεé mó dyam dé mbéb ké ahóg áde nyéhóbé bán abelé.

¹⁵ Ké Herode ampē eekóbnεé mó awusé ké ahóg, né-’aá ákáo boŋ álōmē mó ámbíd. Bwab-pwó dyam dé mbéb ké ahóg déesaá áde ábélé áde álúmte bán atəŋgéné kwééd.

¹⁶ Né-’wó mǝhōb békúidé mó, rítēdē mó, ákag.”*

¹⁸ Dóo amute ásyāēl ábónεé bán, “Téd anén mod, éwúu mó! Bídtéd sé Barabase.”

¹⁹ (Barabase abédéε mod awǝ bėnhēē á mbwəg áyāle bel ábe āmbootédté á dyad-tē ne awúu áde áwúé’áá bad.)

²⁰ Ngáne Payledε ánwōŋgē mewēmtēn ātēde Yesuε, ambé aláá bó nē ampē.

²¹ Boŋ bėmbē bėbōnē’ bán, “Bomé mó á awəg! Bomé mó á awəg!”

²² Anláá bōmpē ngen éche élonténé éláán aá, “Ayāle chán? Ebébtéd éhéé ábélé? Meekóbnεé mó awusé ké ahóg áde átəŋgéné kwééd. Né-’wó, mǝkūdē mó, rítēdē-’ε mó, ákag.”

²³ Ké nē bėmbē bėbōnē’ bán ábome mó á awəg. Káoŋ ne á asóg, échab ehób ênkobnéd.

²⁴ Payledε ambídéd mbakú aá, mówbēl nēŋgáne bėhóbé.

²⁵ Antédé mod awǝ bėnhōbpē, awǝ ambé á mbwəg áyāle bel ne awúu áde áwúé’áá bad, boŋ ábagé bó Yesuε aá, bétiméd mó ngáne bédóó.

*Bébómmé Yesuε á awəg
(Mat 27.32-44; Mak 15.21-32; Jəŋ 19.17-27)*

* **23:16** Donje á kálag dé’só ábádé nchoo 17: Bwab-pwó, mwǝ téé, nzé Ngande e Nnyime-ámín embé, Payledε antəŋgén bad bé dyad mod a mbwəg nhóg achenned.

26 Ade sánze éκεεεεé Yesue á hõm dé mpanag, êmbomén Simõne, mod a dyad á Sirine. Anén mod ambíd á mwă dyad awě adé á ahángé. Héε békóbé mó, bépémtéd mó awõg áde Yesue bán áhídne mó dó ambíd.

27 Atíntê e ndun e mod echě enanáá Yesue ámbíd, bebaád bémbē áwed, béchyé'áá, bélebe-'ε mó.

28 Dóo Yesue ánóné ámbíd, álāngē bó nén aá, “A-băn bé bebaád bé Jerusalem, nyéēchyēē' me, nyéchyé' échen yāl ne áben bán.

29 Nhóbe nê áyāle nén e'pun é' bīn é'húε, áde bad béhōbpē bán, ‘Nnam ne ábē ábe bédé ekõm, ne ábē ábe béēchyāá’, ne ábē ábe béēmwāntē mbêd!’

30 A póndé eched dóo bad bēlāngēē mbõõd bán, ‘kúmtéd sé ámīn,’

káa e'kone bán,

‘kútén sé.’

31 Nzé bébele' nímén mésyāāl bõõb, áde bwel é'lyágé é'díi mendíb áte, chán-náa bébenlé áde bwel békinnē-yε?”

32 Bõõb-põõ bēnkεén e'bébtéd é' bad é'βε, ápan bó nchoo ne Yesue.

33 Ade bépédé hõm áde béchõgεé bán Ebõngél é Nló, bēmbomé Yesue á awõg, ne ábē e'bébtéd é' bad é'βε. Bēmbomé nhóg á ekáá é emwεd, aníní-'ε á ekáá émbáá.

34 Héε Yesue ákânneé nén aá, “A-Sán, lagsén bó áyāle béēbii'ε chõm éche bébeleé.”† Sánze ênsíd mbambú, ákab mbóté éche Yesue.

† 23:34 Donje á kálag dé'só déewóó'ε: Héε Yesue ákânneé nén aá, “A-sán, lagsén bó áyāle béēbii'ε chõm éche bébeleé.”

35 Ndun e mod entyéém á nkæg, bénɔné' chõm éche ébenlad. Boη benkamlɛɛ bé Israel béwéláá mó, béhōbē bán, “Achõηt'é'áá bad bémpēe, áchood-tó eche yǎl, nzé ne mbále mó adé Ane awě Dyõb Apwédé, boη Awógéd-ɛ.”

36 Sánze chómpē éwéláá mó. Empiined mó ebéntéd é mĩm,

37 élāngē mó bán, “Nzé wée edé k̄η e bad bé Israel, ésōη echoη yǎl!”

38 Bēntēl áwe nló ámin nén bán, “K̄η e bad bé Israel ch́o nén.”

39 Atíntē e ábê e'bébtéd é' bad é'be ábe bēmboméé b́oobe Yesue á awog, nhóg ansyāη mó aá, “Saá we edé Ane awě Dyõb Awógté-yɛ? Sõη-õ échoη yǎl, ésoη-'ɛ sémpē!”

40 Boη aníní mod ankáné waáb áte aáken, “Weebáá' é Dyõb-ɛ? Sóo bad bébe dekudé melem-mé nkógsɛn níme mómpē ákudé.

41 Boη pɛn, nkógsɛn níme dékudé, rítāηgéné ne níme sóo mbéb. Boη anén mod eébeleé dyam dé mbéb ké ahóg.”

42 Héɛ ane mod ábádéé ahób aá, “A-Yesu, sōn, weéchatán me á pónde eche wésōnlē á nkamlɛn.”

43 D́o Yesue álāηgēé mó aá, “A mbále, nlāηge we meé, chii nén dēn wěbē ne me á Paradis.”

Yesue awédé

(Mat 27.45-56; Mak 15.33-41; J̄on 19.28-30)

44-45 B́oob-ṕoó b̄in bēmbē dyam k̄ad. Etondeɛ andím, ehíntén ékwē-'ɛ ekíde áte ésyā́l ḱáāη ne á ngáη éláán. Abad áde dēnkāb Ndáb-e-Dyõb áte dēnsalé áte e'ped é'be.

46 Hê dǎo Yesuε álébpé esaád aá, “A-Tê, áwôn mekáá dǎo nlyágé échem edǎádǎn!” Amaá-’aá ahób nê, ámñi-’ε nlém, awé-’ε.

47 Ade mod ambáá a sánze ányiné nê, ankéméd Dyǒb nén aá, “A mbále, anén mod abédé-’ε mod a bwâm.”

48 Née ndun e mod echě enhyě anǎn, ényiné mekan mé ményáké míme mébénlédé, mod téé ambán ekáá á nlém, ásūē’ á ndáb.

49 Yesuε ábe besón bésyāāl ne bebaád ábe bêmbootéd mó anan ámbíd se á Galilia, béntyēem etûn, bénǎné mímén mekan mésyāāl.

Bélimmé Yesuε

(Mat 27.57-61; Mak 15.42-47; Jǎn 19.38-42)

50-51 Bǎob-pǎó mod ambé awě abédé dñn bán Joseβε. Anén mod ambíd á dyad á bad bé Israel áde béchǎgεé bán Arimatia. Abédé mod a edúbé. Abédéε mod a bwâm, asǎn-’ε. Kénéε abédé mod a káánsel enkênkwenténné mbakú echě ábíní belyáged bé dyad bémbíđedtē áwúu Yesuε. Abédé mod nhóg awě anlyág nlém nén aá epun épě éche Dyǒb dékǎbpé nkamlǎn.

52 Ankě Payledε achán aá, áβε mó ndim míme Yesuε.

53 Née ákúdé kunze, anhúd mó á awǎg, ákáān mó kǎse e mbóm, áke alímé mó á soŋ echě bépwǎgé á eláá-tê, éche béēsēbpεé mod alíme áte.

54 Nén démbē á Mbwe mé mboŋsén, áde mbwe-mé-nkóme-áte nhédé’áá abooted.

55 Bebaád ábe bêmbootéd Yesuε anan ámbíd se á Galilia, bénhíd Joseβε, bényín soŋ, bényín-ne ngáne bénǎnté mó ndim á soŋ-tê.

⁵⁶ Dóo bétímé ámbìd á dyad-tê, béboṅsán mǒg ne mekún níme bénabnadté ndim. A mbwε-mé-nkóme-áte bénkōmē áte ngáne mbéndé e bad bé Israel étíídé.

24

Yesue apuúdé

(Mat 28.1-10; Mak 16.1-8; Jǎn 20.1-10)

¹ A epun é'sō, nédē á Sǎndé mbwεmbwε pírib, ábê bebaád bēnkě á soṅ. Bénwālē mekún mé ndim níme bēmbōṅsénné.

² Béntān nées aláá áde bénkōlennē nsəl ní soṅ ásyǎṅgé á e'dii.

³ Bénsāl á soṅ-tê, boṅ bēnkētánné ndim níme Yesue áwēd-te.

⁴ Nén dēmbootéd bó ataged á mewēmten. Dóo bad béε bébídé tǎléd, bétyéém bó á nkæg ne mesāṅ níme mékine' áte.

⁵ Ne mbwóg bwāmbwam bēnsōṅ mǐd ásē. Héε ábê bad béε bēlāṅgεé bó bán, “Cheé ékǎá boṅ nyéhεdé mod awě adé á alongé átíntê e bad ábe béwédé?”

⁶ Eésáá hén, apuúdé. Nyékamten ngáne ánlā'é nyé, áde ábédé á Galilia,

⁷ áá bétǎṅgéné Mwǎn-a-Moonyoṅ abε á mekáá mé bebel bé mbéb, bēbōmē mó á awog. Boṅ āpuú á e'pun ábe é'lónténé é'láán.”

⁸ Hê dóo ábê bebaád békámténé ábē e'yale.

⁹ Ade béhúú á soṅ, bēnkálé bembapεε dyóm ne nhóg ne ábíníi bēmpēε mam mésyāāl níme bényíné.

¹⁰ Bebaád ábe bēnkálé bembapεε bé nlómag nímén nkalan, bēbédéε Maria Magdalεε, Joanaa,

ne Maria, nyaá awe Jemse, nchoo ne bebaád bémpēe.

11 Boŋ bembapεε bé nlómag bénwēmtēn bán ene póle edíi ngwεl. Bénkēndúbéé chό.

12 Hê dόó Petro ápádté ásē, boŋ ányǽgté á soŋ. Ade ápédé áwed anwúlén ásē, ánōn soŋ áte. Anyín dásō mbóm chēmpen. Dόó ásúú á ndáb. Mewēmtēn mékógládtáá mó áte tâŋgene dyam áde ábénlédé.*

*Yesue apiidé bad bébe á nzii e Emās
(Mak 16.12-13)*

13 Bōob-pōó, échē epun dēn, bembapεε ábe Yesue bébe békágé'áá á dyad áde béchǽgέé bán Emās. Abíd á Jerusalem ápe á Emās ábédé etūn dyam máyl saámbé.

14 Abē bembapεε békágé'áá békálé nímén mekan mésyāāl níme mékébenléd.

15 Ade békékanlé kááŋ, dόó Yesue mwēn áhyédé bó atán, boŋ áwoŋné bó.

16 Boŋ pen mīd mēnkēnnédndédté bó, áchem mó.

17 Héε Yesue ásedtεé bó aáken, “Póle ehéé nyépagké akal á eke-tê nén?”

Hê dόó bétyéémé ne ngol esyāál.

18 Dόó bó mod nhóg awe béchǽgέé bán Klopase, átimtanné mó aáken, “Emōŋ pen-εé edé nken a mod á Jerusalem, áde wéébíi mekan níme níkébenléd nímén mesú-yε?”

19 Dόó Yesue ásedtεé bó aáken, “Mekan méhéé mē?” Boŋ bélāŋgē mó bán, “Mekan níme mébenlédé tâŋgene Yesue, mod a Nazaret. Ambé

* 24:12 Donje á kálag dé'só déewóó'ε nchoo 12.

nkal é'dæádæŋ awë ahóbé'áá, ábelé-'ε ndæle é mekan á'sō é' Dyöb ne á'sō é' baányonŋ.

20 Abed beprise bémbáá ne belyáged bé dyad bêmbε mós á mekáá mé nkamλεε, ábíded mbakú bán béwúu mós. Dós bebómmé mós á awog.

21 Bon sênlyág nlém bán, mós adé ane awë áwobé bad bé Israel. Néε éhúdé nê áte, chii dós álontan e'pun é'láán taa nê ábenlede.

22 Amin e nê ámpē, nguse é bebaád átíntē echêd bépéénédé sé menyáké mé póle. Bēnkě á son epog é mbwεmbwε,

23 bon béētānēé ndim míme Yesuε. Bēnhūū ámbíd, bēhōbē bán, ángel épíídé bós á ndóg-te, élāŋgē bós nén bán, Yesuε adé á alongé.

24 Nguse é bad átíntē echêd énkě á son, bétán chó melemlem nēŋgáne bebaád bēnhōbpē, bon béēnyīnēé mwēn."

25 Dós Yesuε álāŋgeé bós áá, "E'yókél é' bad bós nyédíí. Nyéewámsánné mam mésyāāl míme bekal bé'dæádæŋ bēhóbé adúbe!

26 Ngómē éhédnádttáá bán, Ane-awë-Béwógté ákud nímén metake mésyāāl, bon ákud éche ehúmé."

27 Yesuε antógnéd bós mam mésyāāl tāŋgene eche yāl, ngáne méténlédé á Kálag e Dyöb-te, mbooted ne kálag éche Mosεε ne kálag éche bekal bé'dæádæŋ bésyāāl.

28 Ade bépédé benben ne dyad áde bekágé'áá, Yesuε anlúméd byánán eke élyágé édé mós á'sō.

29 Bon bēnkāŋ mós bán, "Hyě édyεε áwēd ngáne bīn é'máá ahín, póndé-'ε emáá atóm." Dós áhídé bós ádyεε áwāb.

³⁰ Ade bóbɔ́o bédyéé ásē á tébele ádyé ndyééd, antéd ewele, ánāméd chó, ásāl chó áte, boŋ ábagé bó.

³¹ Hê dɔ́o mǐd métánlédé bó, boŋ béchemé mó. Dɔ́o ányóó bó á dǐd-te.

³² Bénlāā nhóg ne aníníí bán, “Ngómē nlém ríhógkáá syánē á abum áde ákánlé’áá syánē á nzii, boŋ átānlād syánē Kálag e Dyòb?”

³³ Abwōg-ábwōg dɔ́o bésyǎngé ásē, boŋ bétim-me ámbíd á Jerusalem. Dɔ́o bétáné bembapεε dyòm ne nhóg ngáne béléádné áte hǒm ahóg bóɔbe bembapεε bémpēe.

³⁴ Hēε bembapεε ábe bétáné á ndáb-te béléngé bó bán, “Sǎngwéé apuúdé ne mbáá, apíídé-’ε Simɔn!”

³⁵ Dɔ́o bó bad bébe bómpē béhóbé dyam áde ábénlédé bó á nzii, béhǔbē-’ε ngáne béchémé mó áde ásaleé ewele áte.

Yesuε apiídé ábē bembapεε

(Mat 28.16-20; Mak 16.14-18; Jɔn 20.19-23; Mbεl 1.6-8)

³⁶ A póndé eche békaleé nê, dɔ́o Yesuε mwën ábídé bó áfintê, boŋ álenté bó aá, “Nsaŋ nǐbê ne nyé!”†

³⁷ Mbwóg ménkōb bó bwāmbwam, bēwēmtān bán, bényíné nwú.

³⁸ Dɔ́o álǎngéé bó aá, “Cheé nyétageé áte? Cheé nyényágeé á nlém-tê.

³⁹ Nyénɔn me mekáá nyénɔn-ne me mekuu, boŋ nyébíí bán mměn-εé ndé. Nyékiten me yǎl, nyényín nzé nwú ríwóó nson ne e’hid ngáne nyényínεé nwóó nén.”

† **24:36** Donje á kálag dé’só déewó’ó: *álenté bó aá, “Nsaŋ nǐbê ne nyé!”*

⁴⁰ Ade áamáá ahób nê, anlúméd bó ríme mekáá ne mekuu.‡

⁴¹ Ade bélyágé bényágéé nê ne menyinge mésyāāl, békoglad-táa á nlém-tê, dóo áseǵtēé bó aáken, “Nyêwóo chõm éche bédyágkē hén-ε?”

⁴² Dóo bébágé mó esõj é súu echê bétúmé.

⁴³ Boj ákobé', ádyāg-ke chõ áwab e'só-te.

⁴⁴ Héε álāngéé bó aá, “Mmēn mam móo rílánǵé'áá nyé áde rílyágé ndé ne nyé méé, dyam téé átánǵéné alón ngáne éténlédé áyāl echēm á kálag é mbéndé éche Mosεε ne á kálag é bekal bé'dəádəŋ, ne á Kálag e Ngəse-tê.”

⁴⁵ Dóo ánédte bó debyéé áte, ábel nén bésõŋten Kálag e Dyõb,

⁴⁶ boj álāngé-ε bó aá, “Bétélé á Kálag e Dyõb nén bán, Ane-awě-Béwógté atánǵéné metake akud, awé, boj e'pun ábe é'lónténé é'láán, ápuu.

⁴⁷ Bétélé bán, bad békale melõj mé bad mésyāāl nén bán, bad bétede ábel dé mbéb á dīn á Yesu, ábel boj Dyõb álagsen bó mbéb. Bébootéd bad nímé nkalaŋ akale á Jerusalem.

⁴⁸ Nyé-'aá, nyêdé bad ábe bényínné nímén mekan dīd.

⁴⁹ Mmēn mēlõmē nyé chõm éche Titée ánhõbpē aá mólõmē nyé. Boj nyélyəg nyédyεε á dyad-tê káəŋ né nyékudé ene ngíne echê ebíde ámīn.”

Yesuε apūmmé

(Mak 16.19-20; Mbél 1.9-11)

⁵⁰ Dóo Yesuε ásyəŋnéde bó á dyad-tê, áprené bó benben ne dyad á Betani. Héε ányéné mekáá ámīn, boj ánámté bó.

‡ 24:40 Donge á kálag dé'só déewóo'é nchoo 40.

⁵¹ Ade ánamtεέ bó nê, dáo áchēnnē bó, boŋ ápummé ádyōb.Š

⁵² Abē bembapεε bémbwōgē mó mebóbóŋ. Bēntīm ámbīd á Jerusalem ne menyīŋge mésyāāl.

⁵³ Békăg-kε á Ndáb-e-Dyōb pón dé ésyāāl, ákémed Dyōb.

Š **24:51** Donje á kálag dé'só déewóó'é boŋ ápummé ádyōb.

Mel̃ Mékō̃lē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files dated 29 Jan 2022

0143729f-907e-5098-b6ce-63b1629b8e48